

Yesu -bha bɔmɛ -nu

Këyuö -nu

'sëédhɛ

-Zuu 'slööslö 'tɔ -go Yesu -bha bɔmɛ -nu -dhë -sü

1 ¹N dheglu Teofilö, ma 'sëédhɛ -be -blɛɛzë 'a- =bɛɛn -a mɛ 'ö =nɛ -a 'dhiö bhë Yesu këyuö -nu 'töüdhö waa- -a -bha mɛ =daan' -wo -nu 'wo bhë =nɛ, 'a -an -ya -a 'gü, 'ö sü -a -bha yuö züdüyi -bha ²'ö yöë yi 'ö -Zlan -ya =luu -a 'ka 'ö dhoë dhang- 'gü -a -bha, a- 'plɛ -blɛɛ 'sëédhɛ -be bhë -a 'gü. =Dhɛ 'ö 'dhoë- dho dhang- 'gü, -yö ö -wo -to mɛ -nu 'ö -an sü ö bha bɔmɛ -nu 'ka sia- zö bhë -an -gɔ -Zuu 'slööslö -bha 'piigbeedhɛ -kwaaw'. ³=Dhɛ =ya 'go ga 'gü, -yö ö -de -zɔn -an -dhë =plɛɛzë 'ka kpinngdhö, -dhekpaɔyi 'gɔɔ- -yiisië 'piö -a -zɔn -sü 'ka -an -dhë =nɛ ö 'bhee-. 'Wo- yö 'ö 'wun 'ö -gban -Zlan -bha -gludédhɛ -bha 'ö- -blɛɛ -an -dhë. ⁴Yi do 'ka kö Yesu =ya nu -an 'piö 'zü -dëüwo, wo -nu -wo -kë wo 'ko -bhaa pë -bhö -dhia, 'ö- pö -an -dhë: «-Ka 'to Zeluzalemë zö, 'ka ka 'yan 'to pë 'ö n Dë -ya 'tɔ go ka -dhë, 'a- -wun -blɛɛ ka -dhë bhë -a -gɔ! ⁵Bhii Zan -yö mɛ -nu -bɔ yiö 'yi 'ka, 'kɛɛ ka -zë, -a yi 'yaa -gbiin gbɔ, -Zlan -dho -a kë 'ö ka pa -Zuu 'slööslö 'ka!»

Yesu -yö -dho dhang- 'gü

⁶'Yö mɛ -nu 'ö waa- Yesu -nu 'wo -kë wo 'ko -bhaa bhë, 'wo- =dhɛɛ' kpɔ 'wo- pö: «Yi Dëmɛ, ü- -pö -a yi =ya -lo kö 'üën- -gludédhɛ nu Izlaelö 'në -nu -dhë kö -wo 'sɛ 'bhaa -nu =kɔɔn -a 'ka 'zü -dëüwo =a?» (=Dhɛɛ' 'ö bhë, -wa -kpɔ 'dhö 'ö tɔɔ -a 'töng bhë -a 'ka, -wo -kë Wlɔmë -mɛ -nu -kɔ =löö.)

⁷'Ö Yesu -ya -daa -kë -an -gɔ 'ö- pö: «-Abi!, 'go mü 'zü ka =dua' 'yaa -mü kö 'ka- yi -nu waa- -an 'töng -nu 'kaan- -an dɔ, 'ö tɔɔ n Dë -de 'sloo =nɛ 'ö 'wun bhë 'ö- kë -yi -nu, -a kë 'töng -nu 'plɛ dɔ. ⁸'Kɛɛ =ya kë =nɛ -Zuu 'slööslö =ya nu ka -ta =sia, -Zlan -yö -dho 'piigbeedhɛ nu ka -dhë, kö 'wun 'ö -gban n -ma 'kaan- -a

=blee'- me -nu 'wo Zeluzalemë zö, Zude -se 'saadhö 'gü -me -nu waa- me -nu 'wo Samali -se 'gü 'ö dho 'ö yöë 'se -nu 'wo 'ma -gbiin -an 'gü -me -nu -dhë.»

⁹=Dhe Yesu -yö yën 'wun -nu 'wo bhë -an -blee' -sü -bha, 'ö -luu -Zlan -bha 'piigbeedhe -kwa' 'ö dho dhang- 'gü. -Wo -to -a -ga -dhia 'ö dha kpö do -yö sɔ -a -zü.

¹⁰-An 'yan -yö -to dhuö, zian 'ö Yesu -yö dhoë bhë -a 'ka -piindhö. =Dhe 'wo -ga zlöö wo 'sɔɔ, kö -Zlan -bha bɔme -nu =ple -wo -gbaannu -süë' mü. ¹¹'Ö -Zlan -bha bɔme -nu =ple 'wo bhë 'wo- pö -an -dhë: «Galile -me -nu 'ka =ne, -më 'ö -kë 'ö 'ka -dhe -ga -na dhang- 'gü -kplawo =ne =e? Yesu 'ö 'go -na ka ziën 'ö 'dho -na dhang- 'gü bhë, -yö -dho ye 'ö 'zü 'ö nu =ne -kɔ gia- 'ö 'dho -na -a 'ka 'ö 'ka- =gaa' -a 'ka bhë -a 'dhö.»

-Yö Zuda piën- -me

¹²=Dhe =ya kë 'pö Yesu -bha bɔme -nu -wo -go -tɔn 'wo- dhe Olivie -tɔn bhë -a tuö, 'wo -ye wo 'zü, 'wo dho Zeluzalemë plöö. 'Go Zeluzalemë 'ü 'dho Olivie -tɔn bhë -a tuö -yö -mɔ 'kilong do -bha. ¹³=Dhe 'ö -wa -lo Zeluzalemë, 'wo dho 'kɔ -ta dhuö, 'kɔdhi 'ö -dhe =tun 'dhiö, =ya kë 'wo dho wo 'ko =bhaa -a 'gü bhë -a 'gü. Me 'wo dho mü bhë -an 'tɔ =ne: Piεε, Zan, Zakö, Andre, Filipö, Toma, Batelemi, Matiö, Zakö 'ö -kë Alefe gbö 'ka, Simɔ 'ö 'wo- dhe 'yënnngsiöme waa- Zudë 'ö Zakö gbö 'ka. ¹⁴=Dhe 'wo- -bha 'saadhö, -an =zuö' -kë do =bhea' -sü 'gü -kplawo wo 'ko =bhaa. Yesu dhe Mali oo, Yesu dhegluzë -nu waa- dhoo -nu 'bhaa -nu -wo -kë -an 'piö.

¹⁵Yi do 'ka kö Yesu -wun -dhe 'wun gia- -me -nu 'wo dho -mɔ me -lü -këng' do 'ö -kɔ =ple -bha =wa 'dho 'ko =bhaa bhë, 'ö Piεε -yö -luu -an 'ple 'dhiö mü 'ö- pö -an -dhë: ¹⁶«N dhegluzë -nu, pë 'ö -Zuu 'slööslö -ya =blee 'dhiö 'ö bɔa Davidö -ta 'ö =been' =süë' -Zlan -bha 'sëedhe 'gü 'ö -gban Zuda 'ö 'dhiö sü me -nu 'wo Yesu kun -an 'ka -a -bha bhë pë 'ö dho kë yö -mü. ¹⁷Zuda 'ö bhë -yö -kë me -nu 'kwa -kë Yesu 'piö bhë -a me do 'ka, 'ö tɔɔ Yesu -ya -sü kö kwa -nu kwa -bha yuö 'kwa dho -a kë -Zlan -dhë kö -yaan kë do. ¹⁸'Wëüga 'ö -kë -a -bha me zë =saan' 'ka bhë, -yö =bhlöödhe do -dho -a 'ka. =Dhe =ya kë 'pö, 'ö dho 'ö -gɔ bhlöödhe 'ö bhë -a -bha, ('ö 'ö -de dun). =Dhe =ya kë 'dhö, -yö -piüo sia-, 'ö- bun -yö wü, 'ö- gblëen- 'ple -yö -lo plaan 'ö ga. ¹⁹Me -nu 'wo Zeluzalemë 'töüdhö, -wo 'wun 'ö bhë -a ma. Pë 'ö -kë 'ö =bhlöödhe 'ö bhë 'wo- -dhe wo -wo 'gü Akelödama (-a -gen 'ö tɔɔ =bhlöödhe 'ö me fei -yö -lo -a 'gü). ²⁰Bhii 'wun 'ö -gban Zuda -bha -yö -kë =been' -sü 'ka 'Tan 'sëedhe -bha 'sëedhe 'gü 'dhiö -a pö -sü 'ka =neε: -Wo wo =kwa' -a -bha 'kɔ -wun -zü, 'ö tɔɔ 'kɔ bhë -a =kɔɔnme 'yaa 'dhö gbɔ. 'Ö =been' -sü 'ka 'zü =neε: Me do -yö yö -a piën-! » ²¹⁻²²'Yö Piεε -ya pö 'zü: «=Dhe 'ö 'pö, kö me do -yö kpa kwa -bha kö -yaan kë kwa Dëme Yesu -bha -go ga 'gü -sü =goo- do 'ka. Me 'ö 'dhö bhë -yö kë me 'ö -kë kwa ziën 'töng 'saadhö 'ö kwa Dëme Yesu -ya -kë 'ö bɔa 'se -nu 'gü, 'ö sü yi 'ö Zan -ya -bɔa yiö 'ö yöë yi 'ö goë kwa ziën 'ö -Zlan -ya -luu -a 'ka dhang- 'gü -a -bha bhë -a me do 'ka.»

²³-Dhe =ya kë 'dhö, 'wo me =ple 'tö sü: -A me do tɔɔ Zozefu 'wo- -dhe Baasaba 'wo- 'tö kpɔ Zutusö 'ka waa- Matiasö. ²⁴-Dhe 'ö =ya kë 'dhö 'wo -bhea, 'wo- pö: «Yi Dëme, bhi 'ü me -nu 'saadhö -an =zuö' dɔ, -bhö me =ple 'wo -ne -a me 'ü- sü -a -zɔn yi -dhë ²⁵kö -yaan yö Zuda piën-! Bhi 'ö tɔɔ Zuda -yö -go ö -bha yuö 'ö -kë ü -bha bɔme -yuö 'ka bhë -a 'dhiö, 'ö dho -dhe 'ö- =tei' 'ka bhë -a -bha.»

²⁶'Ö 'wo 'töü- -bhö, kö me =ple 'wo bhë, me 'ö 'töü- =yaa- 'sü kö -waan 'sü. 'ö 'töü- -yö -püö Matiasö -ta, 'ö -da Yesu -bha bɔme -nu 'gɔɔ- do ö ga do 'wo bhë -an 'piö ('wo -kë 'zü 'gɔɔ- do ö ga =ple).

-Zuu 'slööslö -bha nu -sü

2 ¹-Dhe 'ö Zuifö -nu -bha 'wlaan- -yi 'wo- -dhe Pantëkotö -yi bhë -ya -lo, Yesu -wun -dhe 'wun gia- -me -nu 'saadhö -wo -kë wo 'ko -bhaa 'kɔ do 'gü. ²-Dhe do bhë 'wo to -a -bha 'ö -zuö 'ö- -vinnng -yö -kë =ne 'buu 'gbee- -vinnng 'dhö bhë 'ö go dhang- 'gü =zian', 'ö me -nu 'wo -kë 'kɔ bhë -a -dhe 'saadhö 'gü, wo 'ple 'wo- ma 'gbee- 'ka. ³'Ö pë -nu 'wo -kë =ne 'siö ne- -nu 'dhö bhë 'wo- yö, 'ö -ya -an tuö do do 'ka. ⁴'Ö -Zuu 'slööslö -yö -da -an 'gü, 'ö -an 'ple pa, 'wo yö 'wun =blee' -sü -bha -wo 'waa gbë -nu 'gü -a -bha 'piigbeedhe =kwa.

⁵-A yi bhë -a 'ka, Zuifö -nu 'wo go Zeluzalemë plöo waa- -an me -nu 'wo go 'se 'saadhö 'gü 'wo -kë -Zlan gbame -nu 'ka, -wo -kë Zeluzalemë mü. ⁶-Dhe -zuö 'ö bhë =waa- ma, 'ö- me gbung =va -wo nu 'kɔ bhë -a 'dhiö mü, -zuö 'ö dɔ -na kɔɔ bhë -a -wun 'gü. -Dhe 'wo- -bha 'saadhö 'wo -da 'tetundhe =va 'gü, bhi 'ö tɔɔ -wo Yesu -wun -dhe 'wun gia- -me -nu -yö kö -a me 'ö -dhö -yö 'wun =blee' -na me 'ö -dhö -a -de -wo 'gü do do 'ka. ⁷'Yö 'wo- pö wo 'ko -nu -dhë: «E, -ka ka 'to 'to 'dhe! Me -nu 'wo 'wun =blee' -na =ne, Galile -me -nu 'waa -mü -an 'ka a? ⁸-Dhe 'ö -kë 'pö =ne -yö -kɔklë 'ö 'wo 'wun =blee' -na kwa -dhë, -dhe 'kwa- -bha 'töüdhö kwa -de -wo 'gü do do 'ka =nee? ⁹'Kee kö kwa ziën, me 'bhaa -nu -wo -go 'segɔgüdhe -nu 'wo -kë Paatö -se, Medi -se, Elamë -se, Mezopotami -se, Zude -se, Kapadɔsö -se, Pɔng -se, Azi -se, ¹⁰Flizi -se, Panfili -se, Ezitö -se waa- Libi -pö -nu 'wo Silenë -pö -zü 'to -an 'gü. Me -nu 'wo go Wɔlmë -nu, ¹¹me -nu 'wo Zuifö giagia 'ka -nu, me -nu 'wo wo =zuö' -dhië Zuifö -nu -bha -bhea' -kɔ 'gü -nu, me -nu 'wo go Kletö waa- Alabi -dhe -an -bha -nu, 'ö me -nu 'wo 'wun =blee' -na bhë 'kwa -an -wo ma kwa -de -wo -nu 'gü kö -Zlan këwun -nu -së 'wo bhë -wa -wun =blee' -na bhë -ɔɔ.»

¹²-An 'ple -wo -kë pa -sü 'ka 'tetundhe 'ka, 'ö pë 'wo dho -a -blee waa- dɔ. 'Ö 'wo- pö wo 'ko -nu -dhë: «=Ya kë 'dhö kö 'wun 'ö =ne -a -gen 'ö tɔɔ -më -e?»

¹³'Kee me 'bhaa -nu -wo -kë duö 'luu 'sü -dhia, Yesu -wun -dhe 'wun gia- -me -nu 'wo bhë -an -bha -a pö -sü 'ka =nee: «Ma, yö =ya -an 'kun!»

Pië -bha 'wun -gen bhö -sü

¹⁴'Yö Pië waa- Yesu -bha bɔme -nu 'gɔɔ- do ö ga do 'wo to 'wo dho me gbung -nu 'wo bhë -an 'dhiö, 'ö Pië -yö -ya 'wun =blee' -sü -bha -wo 'gbee-

'ka 'ö- pö: «Me -nu 'ka Zeluzalemë zö 'saadhö waa- -me -nu 'ka go -dhe gbe 'gü 'ka nu, -ka ka 'to 'to n -ma -së 'ka kö 'wun 'ö kë -na bhë 'a- -gen pö ka -dhë! ¹⁵Bhii 'ö tɔɔ 'töng 'kwa dɔa -ne -yö 'lɛlɛ 'seisië 'ka -dhiadhio; gɔɔn- -nu 'wo -ne yɔ yaa -an kë -ne -kɔ 'ö 'ka ka -zo -taa' bhë -a 'dhö ('lɛlɛ 'seisië -naa 'ka -dhiadhio bhë 'ö tɔɔ Zuifö -nu -bha -bhɛa' 'töng kö waa pë gbe -bhö -kun. -A 'tɔ =va -yaan 'dho kë yɔ -mü -sü 'ka kö yɔ -yaan -an kë). ¹⁶Kɛɛ pë 'ö -Zlan -yö bɔa ö -wodhiölome Zoelö -ta 'ö- -bleɛ 'dhiö bhë 'ö- -de 'dho kë -na -dɛɛ bhë. ¹⁷Ö tɔɔ -Zlan -ya -pö pë 'ö dho kë 'töng -kaanta 'gü 'ö -nɛɛ: -Ya -pö ö -dho ö -bha -zuu -da mɛ =suu'- 'oo =suu'- -an 'gü 'töüdhö, kö ka gbö -nu, ka 'dhu -nu -waan ö 'dhi -wo =blɛɛ'-, kö kaa -dadhëü -nu -waan 'yanpiöpë 'ö -gban -Zlan -bha 'wun giagia -bha -a yö; 'go mü 'zü, ka -bha mɛ zii -nu -wo -dho -Zlan -bha 'wun giagia -nu yö yio. ¹⁸Yö- pö -a -de -a yi 'ö 'dhö bhë -a 'ka, ö -dho ö -bha -zuu -da ö -bha yuökëgɔɔn -nu waa- ö -bha yuö kë -dhoo -nu -an 'gü kö -waan ö 'dhi -wo =blɛɛ'-. ¹⁹Ö dho pë 'gblüünzë -nu kë dhuö dhang- 'gü, 'ö -dhidhaapë -nu -kë 'kpongtaa. Fei -nu, 'siö -nu waa- 'siɔn 'tëë -nu -wo -dho kë -dhö. ²⁰Lan- -dho trö, 'ö 'su -yö -kë nuɛazë =ne fei 'dhö, 'dhiö kö yi 'ö kwa Dëmɛ -Zlan -ya -ya ö -de -zo 'kun -wun 'ka kö -yaan ö -bha za kaan bhë -yaan =tun -lo -na. Yi bhë -yö -dho kë yi =va 'ka. ²¹-Ya kë 'dhö mɛ =ya kwa Dëmɛ -dhe, -yö -dho nu -a -dhë kö -ya dha.»

²²Ö Pieɛ -yö 'wun =bleɛ 'ö dho -a 'ka 'dhiö 'ö- pö: «Izlaelö -mɛ -nu, -ka ka 'to 'to n -wo -bha! Yesu 'ö 'go Nazaletë bhë, -Zlan 'yö- bɔ kwa -dhë. 'Ö -dhidhaapë -nu waa- pë 'gblüünzë -nu -kë, -bɔ -a -ta -sü 'ka, -a -zɔn -sü 'ka =ne yö giagia 'ö- bɔ kwa -dhë. Pë -nu 'wo bhë ka gia- ka- -dɔ 'ö tɔɔ -yö -kë kwa ziën. ²³Kɛɛ ka ka -kɔ -bho -a -loo 'gü, 'ka- dɔ =sɔɔnyaame -nu kwɛɛ, 'ka- -kë 'wo- zë -a -dɔ -gaatalü -bha -sü 'ka. 'Kɛɛ kë- wo 'dhö, mɛ bhë -a dɔ 'wo- wo ka kwɛɛ bhë, -yö -kë -ne -kɔ 'ö bhë -a 'dhö. ²⁴Kɛɛ -dhe 'ö =wa yën -a 'klo bhɔ -sü -bha 'ö =ya ga, -Zlan -ya -bho ga 'gü, bhii -a këdhe gbe 'yaa -dhö kö ga -bha 'piigbeedhe -ya kuënnu ²⁵=ne -kɔ 'ö Davidö -ya =bleɛ -a 'ka 'dhiö bhë -a 'dhö. -Ya -pö: A- =tei' -dua' =nɛɛ n Dëmɛ -yö n 'piö -kplawo, 'ö n -maa kë -na. -Dhe -kë 'pö kö n yaagüme -nu 'ka 'dho pë 'dhiö- gbe kë n 'ka. ²⁶-A -wun 'gü, n 'gludhi -sü -mü, 'ö 'a 'wun -nu =bleɛ 'gludhi 'ka. Ma 'a dho ga -dhekpacyi do 'ka bhë, a n -zo 'tën -na -kplawo pë 'ö -Zlan -ya pö ö -dho -a kë n -dhë bhë -a -dhë. ²⁷Ö tɔɔ a- -pö -Zlan -dhë: Ü 'ka 'dho ü =kwaal- n nii -wun -zü =glööbɔɔ, 'ö 'go mü 'zü, ü 'ka 'dho we -a -bha kö ü -bha yuökëme 'slöösLö bun -yö 'bu. ²⁸'Bha =toëpö -këdhösü -zian 'po n -dhë. N =zuögludhi -sü =va -mü -kplawo, ü -bha -kë n 'piö -sü bhë -a -wun 'gü. »

²⁹Ö Pieɛ -yö 'wun =bleɛ 'ö dhoë 'dhiö -a pö -sü 'ka =nɛɛ: «N dhegluzë -nu, -ka 'we -a -bha n -gɔ kö 'wun 'ö -gban kwa 'bhema -wungbeezë Davidö -bha 'a- =bleɛ'- ka -dhë 'kpakpadhö. 'Ö tɔɔ Davidö 'ö bhë -yö -ga, 'wo- -bin, 'ö- blɔɔn- -de 'dhö kwa -gɔ zö. ³⁰Kɛɛ kö -yö -kë -Zlan -wodhiölome 'ka, 'ö- dɔa =ne -Zlan -yö 'wun =bleɛ ö -dhë -wo -bhö -sü 'ka =ne yö -dho -a =suu'-

-ta 'gü -mε -nu do -ya -a -bha 'gɔ -gbloo 'gü, -gludë 'ka -nε Davidö 'dhö 'pö.
 31Ka -dhe -yö bhë -a! -Kɔ 'ö Davidö -yö pë -nu 'wo dho kē -nε -a -tɛi' dɔa
 'dhiö bhë yö -ga 'ö bhë. 'Yö- -wun 'gü, 'ö 'wun 'ö -gban -Zlan -bha -Yame
 -bha -go ga 'gü -sü -bha bhë 'yö- -blɛɛ 'ö- pö: -Zlan yaa ö -kwa' -a -wun -zii
 -glööbɔɔ kö -a bun -yaan 'bu.

32-Zlan -bha Yesu 'a- -bha 'wun -blɛɛ' -na -nε -a -bho ga 'gü -sü bhë, me
 'plɛ 'yi- -goo- 'ka. 33'Ö -Zlan -ya -kë 'giansë 'ö- -ya ö -bha -yadhɛ -bhlézë
 -bha ö 'sɔɔ. 'Ö Yesu -yö -Zuu 'slööslö 'ö- Dë -Zlan -ya 'tɔ go bhë -a yö, 'ö-
 -yɔɔ yi -ta -dɛɛ. -Kɔ 'ö -kaa' 'ö 'ka pë -nu 'wo -nε 'ka -an yö -na 'iin 'ka -an
 ma -na bhë 'ö bhë. 34Bhii Davidö yaa -da dhang- 'gü -nε Yesu 'dhö; 'kɛɛ -ya
 -pö -a -wun 'gü -nɛɛ: *N Dëmɛ -Zlan -ya -pö n dëmɛ -dhë: -Bhö -ya ma -yadhɛ
 -bhlézë 'ö -nε -a -bha.* 35-Yö toë 'dhö -yö yöë yi 'a dho ü toë -a 'gbee- 'ka ü
 yaagüme -nu -ta bhë -a -bha! 36=Dhe -ya kē 'dhö 'ö- pö: Izlaelö -mε -nu
 'saadhö, -kaa dɔa giagia 'ka -nɛɛ: Yesu 'ö 'ka- dɔ -gaatalü -bha bhë, yö -nε
 'ö -Zlan -ya -kë me 'plɛ Dëmɛ 'ka. Yö -nε 'ö tɔɔ -a -bha -Yame.»

37=Dhe =wa Pieɛ -wo ma, 'ö -yɛ -an -zuö' -bha -nε 'siö 'dhö, (bhii kö =waa-
 -tɛi' dɔa -nε 'wa 'wun yaa kē -Zlan 'ka). 'Ö Pieɛ waa- Yesu -bha bɔmɛ -nu
 'wo to bhë 'wo -an -dhɛɛ' kpɔ 'wo- pö: «Dhegluzë -nu, -më 'yi dhoë- kē =ɛ?»

38'Ö Pieɛ -ya -daa -kë -an -gɔ 'ö- pö: «Me 'ö -dhö, -yö 'go ö -bha =sɔɔn
 yaa -nu 'gü, -yö -dhië'- -Zlan 'piö, -wa bɔ yiö Yesu 'tɔ 'ka kö -Zlan -yaan ziö
 -a -bha =sɔɔn yaa -nu -ta! -Ya kē 'dhö -Zuu 'slööslö 'ö -Zlan -ya gbaɔ -kë bhë
 ka -dho ka -bha yö. 39Bhii -Zlan -ya 'tɔ -go -nε -yö -dho -Zuu 'slööslö bɔ ka
 'dhö, kaa- 'në -nu 'dhö ka -dhë. -Ya 'tɔ -go 'dhö 'pö mε -nu 'wo 'ma -gbiin
 -an -dhë 'wo tɔɔ mε -nu 'töüdhö 'ö kwa Dëmɛ kwa -bha -Zlan dho -an
 -dhɔɔ kē -waan kē -a -bha 'në -nu 'ka bhë.»

40Pieɛ -yö 'wun -blɛɛ -an -dhë 'zü -va 'ka, -dhio -dɔ -an -dhë -sü, -an
 -faan' 'më -sü 'ka kö =ya kē -nε -wa 'we dha -sü -wun -bha, -waan 'go
 =sɔɔnyaame -nu 'wo Yesu zë 'ö -an 'klo- dho bhɔ bhë -an 'piö.

41-Zlan -wo 'ö Pieɛ -ya pö bhë medhevadhɛ -wa -dhe 'wun gia-, 'ö 'wo
 -an -bɔ yiö Yesu 'tɔ 'ka. 'Ö mε -lü -vuu -yaaga -wo -da Yesu -wun -dhe
 'wun gia- -mε -nu 'piö yi do gia- 'ö bhë -a 'ka. 42-Faan' -yö -kë -an 'plɛ -gɔ
 -kplawo 'tɔ -to mε -daan' -wo -nu 'ö Yesu -bha bɔmɛ -nu 'wo -kë -an -daan'
 -dhia -a 'ka bhë -a -bha. 'Ö -an -zuö' -yö -kë do. 'Wo pë -nu -bhö wo 'ko
 -bhaa. 'Go mü 'wo -bhɛa' -nu wo -Zlan -dhë wo 'ko -yöë'.

-Tosiadhɛ kē -kɔ 'ö Yesu -wun -dhe 'wun gia- -mε -nu ziën

43'Suö -yö -kë mε 'saadhö 'gü, 'ö 'wo Yesu -wun -dhe 'wun gia- -mε -nu
 -bhlë -ya, bhii 'ö tɔɔ Yesu -bha bɔmɛ -nu -wo -kë -dhidhaapë -plëézë kē
 -dhia. 44Yesu -wun -dhe 'wun gia- -mε -nu -wo -kë wo 'ko -bhaa dosen. 'Ö
 -an -gɔ -pë 'plɛ -wo -kë do. 45-Ya kē -nε mε do -bha -wun -ya yö pë 'bhaa
 -bha -an ziën 'ö mε 'bhaa -nu -wo wo -bha -bhlöödhɛ -nu 'iin 'kweandhe
 -nu waa- pë -nu 'ö -an -gɔ -pë -nu 'ka -nu, 'wo -an 'dhɔɔ dɔ, 'ö mε 'ö- -bha

-wun -yö yö pë -bha bhë, 'wo pë 'ö -mɔ -a -bha -a =tian' 'wo -nu -a -dhë.
 46'Ö -dhekpaɣyi 'saadhö 'ka 'wo dho wo 'ko -bhaa, -Zlan -gba -a 'gü -kɔ
 'gü; 'ö 'wo pë -nu -bhö wo 'ko 'piö wo -gɔ kɔɔ, =zuögludhi waa- =zuö'
 -së 'ka. 47-'Wo -Zlan 'tɔ -blü, 'ö 'go mü 'següme -nu -wo -an -dhɔ -kë. 'Ö
 -dhekpaɣyi 'saadhö 'ka 'ö mɛ -nu 'ö kwa Dëmɛ Yesu 'dho -an dha -na bhë 'ö
 -an -da -an 'piö.

Gɔɔn- do -genlosüzë -dhe bo -kɔ

3 ¹Yi do 'ka Piɛ waa- Zan -wo -kë 'dho -dhia -Zlan -gba -a 'gü -kɔ 'gü,
 'wo 'ye -lan 'ö -kë 'següme -nu -bha -bhea' 'töng 'ka bhë -a 'ka. ²'Wo
 -genlomɛ do yö kö -yö -yaannu -sü 'ka 'kodhi mɛ 'wo- -dhe 'kodhi -sëézë
 bhë -a 'dhiö. Gɔɔn- 'ö bhë -yö -bho 'yua bhë -a 'ka. 'Ö -dhekpaɣyi 'saadhö
 -a 'ka, 'wo nuë 'wo- -ya mü, kö -yaan 'wëü- -gba -dhe, mɛ -nu 'wo -da -na
 -Zlan -gba -a 'gü -kɔ 'gü bhë -an -gɔ. ³Dhe 'ö Piɛ waa- Zan -an yö kö -wo
 dhoë- -Zlan -gba -a 'gü -kɔ 'gü, 'yö -gba -dhe -an -gɔ. ⁴'Ö Piɛ waa- Zan
 'wo- -ga -piindhö, 'ö Piɛ -ya pö -a -dhë: «-Bhö yi -ga!»

⁵'Yö gɔɔn- bhë 'ö -an -ga -së 'ka, bhii -a 'yan -yö pë 'wo dho -a nu -a
 -dhë zlöö -a -gɔ. ⁶'Ö Piɛ -ya pö -a -dhë 'zü: «'Wëü- 'yaa n -gɔ kö 'aan- nu
 ü -dhë, 'kɛɛ pë 'bhaa -yö n -gɔ, 'a dho -a nu ü -dhë; ö tɔɔ: Yesu Klito 'ö go
 Nazaletë bhë -a 'tɔ 'gü, -bhö -luu- 'ü 'ta 'sü!»

⁷=Dhe =ya kë 'pö 'ö -ya -a -kwɛɛ- 'gü -kɔ -bha 'ö- -luu. =Dhe do bhë 'wo
 to -a -bha 'ö gɔɔn- 'ö bhë 'ö- -gen -nu -wo -po, 'wo -kë 'gengen. ⁸'Ö -luu
 'budhö, 'ö dɔ ö -gean, 'ö yö 'ta 'sü -sü -bha. 'Ö waa- Yesu -bha bɔmɛ -nu 'wo
 -da wo 'kuë -Zlan -gba -a 'gü -kɔ 'gü kö -yö 'ta 'sü -na -löö 'lö -sü 'ka -Zlan
 'tɔ -blü -sü 'ka. ⁹Mɛ -nu 'wo -kë mü 'töüdhö -wa -yö kö -yö 'ta 'sü -na -Zlan
 'tɔ -blü -sü 'ka. ¹⁰=Dhe =waa- -ga 'ö 'wo- dɔ 'sabla -nɛ gɔɔn- 'ö -kë -ya -sü 'ka
 -Zlan -gba -a 'gü -kɔ 'kodhi -sëézë 'dhiö, -gba -dhe -sü 'ka bhë yö -mü. 'Ö
 -dhe 'wo- -bha 'saadhö 'wo pa 'suö waa- 'tetundhe -an 'ka, pë 'ö -kë -a -dhë
 bhë -a -wun 'gü.

Piɛ -yö 'wun -bleɛ -Zlan -gba -a 'gü -kɔ 'gü

¹¹Gɔɔn- 'ö bhë yaa 'go Piɛ waa- Zan -an 'piö. 'Ö mɛ -gbaa 'wo -kë -Zlan
 -gba -a 'gü -kɔ 'gü bhë, 'ö -an 'te -yö tun, 'ö -an 'plɛ 'wo -bla sü 'wo nuë -an
 'piö, 'kɔdɔdɔdhe =vaazë 'wo- -dhe Salomɔ -bha 'kɔdɔdɔdhe bhë -a 'gü.

¹²=Dhe mɛ -nu 'wo bhë 'ö Piɛ =ya -an yö, 'ö- pö -an -dhë: «Izlaëlö -mɛ
 -nu, -më -kë ka 'te- tun mɛ 'ö -nɛ -a -dhe 'ö bo -nɛ -a -wun 'gü i? -Më 'ö
 -kë 'ö 'ka yi -ga -nɛ pë 'wo- pö yi -nɛ 'yi gɔɔn- 'ö -nɛ 'yi- -dhe bo yi -de
 -bha 'piigbeedhe waa- yi -bha -klu -Zlan -bha -sü -wun 'gü -a 'dhö e?

¹³Ablaamö 'dhö, Izaakö 'dhö waa- Zakɔbö -an -bha -Zlan 'ö kwa 'bhema
 -nu -bha -Zlan 'ka bhë, yö -nɛ 'ö 'tɔbhɔdhe nu ö -bha yuökëme Yesu -dhë.

Yesu bhë -nɛ 'ö Zuifö -nu ka gia- 'ka- kun, 'ka- dɔ kaa- mɛ -nu 'ö
 -wogbiindhe 'dhö -an -gɔ -an kwɛɛ, 'ö 'ka 'wun yaa -nu dɔ -a -bha Pilatö

'dhiö, 'kɛɛ kö Pilatö -zë, -yö -kë -a 'piö kö 'ö ö -kwaä' -zü. ¹⁴Yö mɛ 'ö 'slööslö, 'ö kpengdhö -Zlan wö 'dhiö bhë, kaa 'we -a -wun -bha, 'ö mɛ 'ö -kë mezmɛ 'ka bhë, 'ka -dhɛ Pilatö -gɔ kö -ya bho -kanso 'gü ka -dhë. ¹⁵Me 'ö -kë -a 'gü -sü gia -nu mɛ 'kpekpe -dhë bhë, -a kë -kɔ 'ka -kë 'ka -zë bhë yö -ga 'ö bhë. 'Kɛɛ -Zlan -ya -bho ga 'gü 'ö 'yi- -goo- 'ka. ¹⁶Zo -yö Yesu 'tɔ 'piigbeezë -bha -sü 'ö -faan' nu, gɔɔn- 'ka -dɔ 'ö 'ka- -ga -na -nɛ -a -dhë. -Zo -yö Yesu -bha -sü bhë 'ö gɔɔn- -nɛ 'ö- -dhe bo ö 'plɛ 'ka, ka 'plɛ 'töüdhö ka 'yaan 'ka -nɛ.

¹⁷Dhe -kë 'dhö bhë, n dhegluzë -nu, a- dɔa -nɛ 'wun yaa 'ka- -kë Yesu 'ka 'dhö bhë, ka -nu oo, ka -gɔmɛ -nu oo, kaa- -gen dɔ bhë yö -mü. ¹⁸Kɛɛ -kɔ 'ö bhë -a 'ka, 'ö pɛ 'ö -Zlan -ya pö 'dhiö -be 'ö bɔa ö -wodhiölomɛ -nu 'saadhö -ta, 'ö- -blɛɛ yö -mü; 'ö- -kë 'dhö kö -yaan 'dhiö -yaan -mɔ 'kuë bhii -ya pö ö bha -Yamɛ 'klo- -dho bho.

¹⁹-A -wun 'gü -ka ka -bha -tosiadhe -dhië' -kwaä, 'ka -dhië' -Zlan 'piö kö -yö ziö ka -bha -sɔɔn yaa -nu -ta. ²⁰Go mü 'zü kö -yaan 'tɛɛpadhe -nu nu ka nii -nu -dhë kö -a -bha -Yamɛ 'ö -yaa- 'sü ka -bha 'ka 'saadhö, 'ö Yesu 'ka bhë, -yaan -a bɔ ka -dhë. ²¹Go mü 'zü pɛ dho kë 'ö tɔɔ Yesu Klito -dho to dhang- 'gü -kun 'ö dhoë 'ö yöë 'töng 'ö -Zlan dho pɛ 'plɛ kaa -dëü -nɛ -kɔ 'ö- -blɛɛ -a 'ka 'ö bɔa ö -wodhiölomɛ 'slööslö -nu -ta 'ö- -dhe -ya -glɔɔ bhë -a 'dhö. ²²'Wun 'ö -gban Yesu -wun -bha, Moizö -ya -blɛɛ 'yö- pö: *Kwa Dëmɛ, kwa -bha -Zlan -yö -dho ö -wodhiölomɛ 'ö -kë -nɛ n 'dhö, 'yö dho go ka -suu' -ta 'gü 'ö- bɔ ka -dhë. 'Wun -nu 'saadhö 'ö 'dhoë- -blɛɛ' ka -dhë bhë, -kaa ma -a -ta!* ²³Me 'oo mɛ 'ö yaa dho 'wun ma -a -ta, -yö -dho go -Zlan -bha mɛ -nu ziën, 'ö 'wo- zë. ²⁴-Zlan -wodhiölomɛ -nu 'töüdhö 'ö goë Samielö -bha 'ö yöë -dɛɛ -bha, -an 'plɛ 'wun 'ö -gban yi 'ö 'kwa- 'gü -nɛ -a -bha, -wa -blɛɛ. ²⁵Pɛ 'ö -Zlan -ya 'tɔ go 'ö bɔa ö -wodhiölomɛ -nu -ta bhë, -yö ka -bha 'ka, 'ö 'go mü -dhi 'kuë 'ö -Zlan -ya -da waa- ka 'bhema -nu wo ziën, 'ö ka -bha 'ka 'pö; 'ö tɔɔ -Zlan -ya -pö Ablaamö -dhë: «A -dho 'dhuë- kpɔ ü -suu' -ta 'në -nu -bha, 'ö 'a dho bɔ -an 'gü kö 'aan- 'dhuë- kpɔ 'kpongtaame -nu 'saadhö -bha.» ²⁶-Kɔ 'ö -kaa' 'ö -Zlan -yö ö bha yuökëmɛ Yesu sü 'ö- bɔa ka -dhë 'dhiö -kun bhë 'ö bhë. -Ya -bɔ 'dhö kö -yaan 'dhuë- 'kpɔ ka -bha 'ö- -kë kö mɛ 'ö -dhö -yö 'go ö -bha këpɛ yaa -nu -zian -ta.»

Piɛɛ waa- Zan -wo zakanmɛ -va 'dhiö

4 ¹Piɛɛ waa- Zan -wo -to 'wun -blɛɛ' -dhia 'següme -nu -dhë, 'ö slabhome -nu, 'yan -to -Zlan -gba -a 'gü -kɔ -bha -mɛ -gɔmɛ -nu waa- Saduse -mɛ -nu -wo -wo. ²Yaa dhi -an -dhë kö Yesu -bha bɔmɛ -plɛ 'wo bhë -wo 'següme -nu -daan, -a -pö -an -dhë -sü 'ka -nɛ Yesu Klito -yö -go ga 'gü, kö -a -gen -yaan kë -nɛ game -nu -wo -dho go ga 'gü. (Bhii 'ö tɔɔ Saduse -mɛ -nu 'waa -go ga 'gü -sü -wun -dhe 'wun gia-) ³'Wo -an kun 'wo -an -zuö -kanso 'gü 'wo -wɔ mü 'ö -dhe -yö -kpɔɔ -a 'ka. Bhii 'ö tɔɔ -dhe 'wo -an 'kun -na kö 'bin -ya 'më 'saadhö.

4=Dhe 'ö kē -na 'dhö kö 'wuntaasë 'ö Piëe waa- Zan 'wo- =blee bhë me -nu 'wo- ma, -an medhevadhe =wa Yesu -wun -dhe 'wun gia-. 'Ö Yesu -wun -dhe 'wun gia- me -nu -kpa 'kuë- -sü -yö -kē =va 'ö dho 'ö yöë me -lü -vuu 'sɔɔdhu -bha.

5=Dhe 'ö- -ta -dhe =ya 'po, Zuifö -nu -gɔmɛ -nu waa- -an -bha me ziizii -nu, waa- tɔnggɔmɛ -nu -wo -dho wo 'ko -bhaa Zeluzalemë plöö. 6'Ö -dhe bhë -a 'gü slabhome =va 'wo- -dhe Anë waa- Kaifö 'dhö, Zan 'dhö, Alezandrë 'dhö waa- slabhome =va -gɔ 'kɔɔmɛ -nu 'töüdhö 'dhö -wo -kē mü. 7'Ö 'wo nu Yesu -bha bɔmɛ -nu 'wo bhë -an 'ka -an 'dhiö, 'ö 'wo -an =dhe' kɔɔ 'wo- pö: «-Genlome 'ö =ne 'ka- -dhe -bo -kɔklë =ɛ? 'Piigbeedhe -mlë 'ö 'ka 'yua =ne 'ka- boë =ɛ? Dö -de 'ka 'yua =ne 'ka- bo -a 'tɔ 'gü i?»

8'Ö to mü -Zuu 'slööslö -yö Piëe pa, 'ö- pö -an -dhë: «'Se -kɔɔnme -nu, me ziizii -nu, 9'ka nu yi 'ka =dɛɛ zakanme 'dhiö zö, nu 'yi- wo -genlome 'ö =ne -a -dhë -a -dhe bo -sü 'ka bhë -a -wun 'gü, 'go mü 'ö -kɔ 'ö dha -a 'ka, 'ö 'ka- dhë' kɔɔ -na yi -gɔ bhë. 10'Kɛɛ pë 'ö dho kē 'ö tɔɔ 'ka 'dhö, Izlaelö -següme -nu 'dhö, ka 'plɛ ka- dɔa =nɛɛ gɔɔn- 'ö =ne =ya -potaasü yö 'fefedhö Yesu Klito 'go Nazaletë 'ö 'ka- zë -a -dɔ -gaatalü -bha -sü 'ka, 'ö -Zlan -ya bho ga 'gü bhë -a 'tɔ 'piigbeezë bhë -a 'ka. 11 Yesu bhë =ne 'ö 'wun -yö -gban -a -bha 'ö =been' -sü 'ka -Zlan -bha 'sëédhe 'gü =nɛɛ: -Guö 'ö 'kɔɔdɔmɛ -nu 'ka- =zong bhë, =ya 'ye 'zü =ya kē 'kɔ -gen -gban -a -ta -guö gia- 'ka. 12 Yö dosen 'kpaan =ne 'ö dhasü -yö go -a 'gü. Bhii 'tɔ 'waa gbɛ 'ö -Zlan dho -a nu me -nu -dhë 'kpongtaa kö 'kwaan- bɔ -a -ta 'kwaan- dha 'yaa -dhö.»

13=Dhe =wa Piëe waa- Zan -an -bha 'wun =blee' -kɔ 'ö -kē -zo -gban -sü 'gü bhë -a yö, 'ö -an 'te -yö =tun, 'ö tɔɔ -wo -kē =ne 'següme -nu me 'wo to -an 'dhö, 'waa me -nu 'wo dhoë- pö -kwa -an -bhlë -ya -an 'ka 'pö 'sa. 'Go mü 'zü waa -an =daan' -kö -waan 'wunbhokou dɔ. 'Ö 'wo -an dɔ =ne -wo -kē Yesu 'piö -be. 14 Yö 'wo gɔɔn- 'ö- -dhe -yö bo bhë -a yö kö -yö dɔ -sü 'ka -an 'sɔɔ mü, 'ö pë 'wo dho -a =blee' -waa- dɔ.

15=Dhe =ya kē 'pö 'wo- pö Piëe waa- Zan -an -dhë -wo yö plaan. =Dhe =wa 'kan wo 'kuë-, 'ö zakanme -nu 'wo wo 'ko yö, pë 'wo dho -a kē Piëe waa- Zan -an 'ka -a -wun 'gü. 16 'Wo- pö wo 'ko -nu -dhë: «-Më 'ö 'kwa dho -a kē me 'wo =ne -an 'ka ɛ? Bhii me -nu 'saadhö 'wo Zeluzalemë plöö zö, -wa =dua' -së 'ka =ne, -dhidhaapë 'gblüünzë 'ö -kē =ne wo =ne 'wo- -kē, 'ö kwa gia- kwa 'ka 'dho -a -kploo wo. 17'Kɛɛ -kwa yö -an -gɔ 'sei -a -pö -an -dhë -sü 'ka kö =kun 'ö 'wo 'wun =blee me gbɛ -dhë gbɔ Yesu 'tɔ 'ka, -yö kē 'dhö kö =kun 'ö 'wun =nɛ, 'ö- -taɔ -yö -pen.»

18'Ö 'wo Piëe waa- Zan -an -dhɔɔ -kē, 'wo- pö -an -dhë, -wo wo bo 'ö plɛ 'ka 'wun -blee me -nu -dhë -sü waa- -an =daan' Yesu 'ö bhë -a 'tɔ 'ka -sü 'ka.

19'Yö Piëe waa- Zan 'wo- pö -an -dhë: «Ka gia-, 'ka -dhe -ga -a 'gü, =yö -së -Zlan wö 'dhiö kö 'yi ka =bhlë 'kɔɔ 'yi ziëë -Zlan -ta -a? 20 -Abi, yi 'ka 'dho -mɔa 'yi yi bo 'wun 'yi- yö, 'yi- ma bhë -an =blee' -sü 'ka!»

21'Ö zakanme -nu -wo 'suö -da -an 'gü 'zü 'ö =zië' -a me 'wo- -da -an 'gü 'dhiö bhë -a -ta, 'ö 'wo wo =kwa -an -zü, 'ö 'wo dho. 'Ö waa kédhe gbɛ

yö kö -waan -an 'klo bhö 'ö tɔɔ 'següme -nu 'saadhö -wo -kë -Zlan 'tɔ -bliü -dhia, pë 'ö -kë bhë -a -wun 'gü. ²² Gɔɔn- 'ö- -dhe -yö bo -dhidhaazë 'ka bhë, -a -kwë -yö -ziö 'gɔɔ- -yiisië 'gü.

Yesu -wun -dhe 'wun gia- -me -nu -bha -bhea' -sü

²³ Dhe 'ö =wa wo =kwaa' -an -zü, 'ö Piɛ waa- Zan 'wo dho woë- me -nu 'piö, 'ö 'wun -nu 'ö slabhome -gɔme -nu waa- me ziizii -nu 'wo- =bleë -an -dhë bhë, 'wo bɔ -a 'plë 'gü 'wo- -gen bho -an -dhë 'pö. ²⁴ Yö Yesu -wun -dhe 'wun gia- -me -nu -wo =bhea -Zlan -dhë =zuö' do 'ka 'wo- pö: «Yi -Gɔme, bhi =ne 'ö dhang- 'dhö, 'se 'dhö, 'yi waa- -an 'gü -pë -nu 'saadhö -an -kë. ²⁵ Bhi =ne 'ö -Zuu 'slööslö -kwaa' 'ü bɔ yi 'bhema ü -bha yuökëme 'ö -kë Davidö 'ka bhë -a -ta 'ü- pö: -Më 'ö -kë 'ö me 'waa Zuifö 'ka 'ö -naadhe -va =suu' -'ö =ne 'ö -da -an 'gü -desivadhe 'ka ε? 'Ö 'wo 'slë 'ö- -yöë -bha -pë gbe 'yaa 'dhö bhë 'wo- kan kwa Dëme -gɔ -ε? ²⁶ Kpongtaa -gludë -nu =wa dɔ -a -gɔ 'yënnɔ. 'Go mü me =kɔɔnme -nu =wa 'dho wo 'ko =zlöö kwa Dëme -Zlan waa- 'ö -bha -Yame -an -gɔ. ²⁷ Yö 'wun giagia 'ka =ne Elɔdö 'dhö, Pɔnsö Pilatö 'dhö, me 'bhaa -nu 'waa Zuifö 'ka waa- Izlaelö -me -nu 'dhö, -an 'plë 'töüdhö, -wo -dho wo 'kuë-, pödhe bhë -a 'gü, ü bha yuökëme 'slööslö Yesu 'ö ü -bha -Yame ka bhë -a -gɔ. ²⁸ -Kɔ 'ö bhë -a 'ka, -wo pë 'saadhö 'ü -we -a -bha 'dhiö ü -bha 'piigbeedhe 'ka kö -yaan kë ü -dhi -a -dhë -wun 'ka bhë -wa -kë.

²⁹ Dhe 'ö 'pö bhë, n Dëme, -an -bha 'suö -da me 'gü -wo -nu -ne -bhöë ma, -bhö 'we -a -bha yi 'yi -kë ü -bha yuökëme -nu 'ka bhë yi -gɔ, kö 'yi ü -bha 'wun =bleë' -zo -gban -sü 'ka! ³⁰ -Bhö ü -bha 'piigbeedhe -zɔn me -nu -dhë, me -dhe bo -sü waa- -dhidhaapë -nu kë -sü 'ka, ü -bha yuökëme 'slööslö Yesu 'tɔ 'ka.»

³¹ Dhe 'ö =wa yën =bhea' -sü -bha, 'ö -dhe 'wo -kë -a -bha bhë, 'ö yö =zluun -sü -bha; 'ö -Zuu 'slööslö -yö -an pa 'töüdhö 'ö 'wo yö -Zlan -wo =bleë' -sü -bha -zogbandhe 'ka me -nu -dhë.

Yesu -wun -dhe 'wun gia- -me -nu -bha wo -bha pë -nu -glu wo 'kuë -sü

³² Yesu -wun -dhe 'wun gia- -me -nu gbung 'wo bhë -an -zo -ta -a 'gü -wun waa- -an -dhi -an -dhë -wun -yö -kë do. Me do gbe 'yaa- pö: «Pë -së -nu 'wo =ne, ma do ma pë -mü.» 'Kë me 'ö -dhö -yö 'ö -gɔ -pë -nu -glu me 'kpaan -nu 'wo to -an 'ka. ³³ Piigbeedhe =ne 'ö Yesu -bha bɔme -nu -wo kwa Dëme Yesu -bha -go ga 'gü -sü -tɔmɔdhe -kë -a 'ka. 'Ö -Zlan -yö 'dhuë- kɔɔ -an -bha =va 'ka 'töüdhö. ³⁴ 'Ö -an ziën pë -wun -saan 'yaa me gbe kë. Bhii 'ö tɔɔ =ya kë =ne me -nu 'ö =bhlöödhe -nu, 'kɔ -nu 'dhö -an -gɔ, =waa- 'dhɔɔ dɔ ³⁵ 'wo dho 'wëü- 'ö bhë -a 'ka Yesu -bha bɔme -nu =dhia, 'wo- =waannu kö -waan -glu me -nu 'ka. 'Ö me 'ö -dhö, -kɔ 'ö- -bha -wun -yö yöë 'wëüga -bha 'ö- =bleë 'ö- me 'ö- =tian' 'wo- gbaa -a 'ka.

³⁶ -A -de Zozefu 'ö -kë Levi -bha 'gunng 'gü 'në do 'ka, 'ö bhö Siplë 'ö Yesu -bha bɔme -nu -wa 'tɔ kɔɔ Baanabasö 'ka (-a -gen 'ö tɔɔ Glëkö -wo

'gü «gɔɔn- 'ö me =faan' mä»), 37-yö ö -bha -bhlöödhe do 'dhɔɔ -dɔ, 'yö nu -a 'wëüga bhë -a 'ka Yesu -bha bome -nu -dhia.

Ananiasö waa- Safila -an -bha -sua -kë -Zlan wö 'dhiö -sü

5 ¹Gɔɔn- do 'wo- -dhe Ananiasö waa- ö bɔɔ 'wo- -dhe Safila -wo -kë -an kpö 'gü -mɛ -nu 'ka 'pö. 'Ö yö 'dhö waa- ö bɔɔ 'dhö 'ö -an -wo -yö -kë do, 'wo wo -bha -dhe do 'dhɔɔ dɔ. ²'Ö- 'wëü- bhë 'ö- 'bhaa sü 'ö- -bin ö -bha 'ka, 'ö- mɛ to, 'ö dhoë Yesu -bha bome -nu -dhia; -yö -kë -a bɔɔ 'yaan 'ka -wun 'ka.

³-Dhe =ya kë 'pö 'ö Piɛɛ -ya pö -a -dhë: «Ananiasö, -më -kë 'ü ü -kwaä dü -zü 'ö -ya ü -zuö' 'piö 'ö 'ü =sua -kë -Zuu 'slööslö -gɔ, 'ö -dhe 'ü- 'dhɔɔ dɔ bhë 'ü- 'wëüga 'bhaa -bin -i? ⁴Dö 'ö ü 'gbee- -ta bho kö 'üen- ü bha -dhe 'dhɔɔ dɔ =ɛ? -A 'wëüga bhë, ü bha -pë 'yaa -mü -a? -Më 'ö -kë 'ö 'slë =suu' -ö bhë 'ö -da ü 'gü i? =Sua 'ö =nɛ ü 'ka- kë mɛ 'bhee- -gɔ, -Zlan =nɛ 'ü- -kë -a -gɔ.»

⁵-Dhe 'ö -wo bhë Ananiasö =yaa- ma, 'ö to mü 'ö -püö sia- 'ö ga. 'Ö mɛ 'saadhö 'wo 'wun bhë 'wo- ma, 'ö 'suö =va -yö -da -an 'gü. ⁶'Ö -dadhëü 'në gɔɔn- -nu -wo nu 'wo sɔ më -a -bha 'wo dhoë 'wo- -bin.

⁷-Dhe 'ö pë -mɔ 'lele -yaaga -bha =ya ziö, 'ö Ananiasö -bha dhebɔ -yö -da kɔɔ. 'Wun 'ö -kë bhë yaa- gbe =tei' dɔ. ⁸'Ö Piɛɛ -ya =dheɛ' kpö 'ö- pö: «Bhö 'wun gia- =bleɛ' -n -dhë! 'Wëüga 'ö 'ka ka -bha -dhe 'dhɔɔ dɔ -a -bha bhë 'ö =nɛ =a?» 'Ö- pö -a -dhë: «=Ii-, -a 'wëü- 'ö bhë.» ⁹'Ö Piɛɛ -ya pö -a -dhë =nɛ: «=Më -kë ka =zuö' -yö -kë do kö 'kaan- -Zlan -bha -Zuu 'gü dan =ɛ? -Dhe -ga, mɛ -nu 'wo go ü =gɔn -bin -dhia, -wo 'kɔ 'dhiö kö -waan 'dho ü 'ka 'pö.»

¹⁰-Yö -to -dhe do bhë -a 'gü 'pö, 'ö -püö Piɛɛ =geendhö mü, 'ö ga. 'Ö 'në gɔɔn- -nu 'wo =sia 'zü, 'wo -da kɔɔ 'wo- yö kö =ya ga 'pö; 'ö 'wo dhoë 'wo- -bin -a =gɔn 'sian 'piö.

¹¹-Dhe 'ö 'wun 'ö =nɛ 'ö Yesu -wun -dhe 'wun gia- -mɛ -nu 'saadhö waa- mɛ -nu 'wo to 'ö =waa- ma, 'suö =va -yö -da -an 'gü.

-Dhidhaapë -nu -plëézë -nu kë -sü

¹²Yesu -bha bome -nu -wo -dhidhaapë =plëézë -nu -kë 'següme -nu wö 'dhiö. Yesu -wun -dhe 'wun gia- -mɛ -nu =ya kë -wo -dho wo 'ko =bhaa 'kɔɔɔɔɔdhe =va mɛ 'wo- -dhe Salomɔ -bha 'kɔɔɔɔɔdhe bhë -a 'gü. ¹³Mɛ -nu 'waa Yesu -wun -dhe 'wun gia- -mɛ -nu 'ka bhë, -a -dho 'yaa kë -an -bha kö -wo 'dho -an 'piö, kö 'wo kpa -an -bha. -Yö -kë 'dhö 'kɛɛ -wo -an 'tɔ -blü -an këwun -nu -wun 'gü. ¹⁴'Ö mɛ gbung -nu, gɔɔn- -nu, dhoo -nu -wo nu; -wo kë =va 'ö 'wo kwa Dëme -wun -dhe 'wun gia-, 'ö 'wo -da Yesu -wun -dhe 'wun gia- -mɛ -nu 'wo bhë -an -bhüö 'gü.

¹⁵-Dhidhaapë 'ö Yesu -bha bome -nu -wo -kë -a kë -dhia bhë -an -wun 'gü mɛ -nu -wo nu wo -bha 'yuame -nu 'ka, zian -gblooga 'ö Piɛɛ dho bɔ -a -ta bhë -a 'piö, 'wo -an -da =gba -nu, =sɛɛ' -nu -ta kö =ya kë =nɛ Piɛɛ -yö ziö -na kö -a 'bin 'kpaan -ya kpa 'yuame -nu 'wo bhë -an mɛ 'bhaa -nu -ta kö

-an -dhe -yaan bo. ¹⁶Me -gbaa =va 'wo go 'pö pödhe -nu 'wo Zeluzalemë -zü -zü 'to -dhe -nu -bha -an 'gü, 'wo nu wo -bha 'yuame -nu waa- me -nu 'ö -zuu yaa -nu -kë -an 'gü -an 'ka, 'ö -an 'plë -dhe -yö bo; -zuu yaa -nu -wo -go -an 'gü 'pö.

'Klobhòdhe -da Yesu -bha bómë -nu -ta -sü

¹⁷Dhe =ya kë 'pö slabhome =va waa- ö me -nu 'wo -kë Saduse -me -nu 'ka, -wo pa =druëi 'ka Yesu -bha bómë -nu 'wo bhë -an buëndhö. 'Wo- pö -wo -dho pë 'bhaa kë -an 'ka; ¹⁸'wo Yesu -bha bómë -nu kun, 'wo -an -da -kanso 'kòdhö.

¹⁹Dhe 'ö =wa dɔ gbeng, 'ö -Zlan -bha bómë do -yö nu 'yö -kanso 'kòdhi -po -an -gɔ, 'ö -an yö plaan, 'ö- pö -an -dhë: ²⁰«-Ka 'dho -Zlan -gba -a 'gü -kɔ 'gü, 'ka -tosiadhe kë -kɔ -dëü -zian 'ö bhë -a -wun =blëe'- me -nu -dhë!»

²¹'Ö Yesu -bha bómë -nu -wo 'wun ma -a -wo -ta. 'Ö -dhiadhio tii 'gü 'wo dho -Zlan -gba -a 'gü -kɔ 'gü 'wo yö me -nu =daan' -sü -bha.

'Ö slabhome =va waa- me -nu 'saadhö 'wo -kë -a 'piö, 'wo Zuifö me ziiiii -nu 'saadhö =dhɔɔ -kë wo 'ko =bhaa kö -waan -ya 'kuë- kë. ('Yan -to -Zlan -gba -a 'gü -kɔ -bha -me -nu -gómë -yö -kë -an ziën mü 'pö.)

=Dhe =ya -kë 'pö, 'wo 'dhasi -nu bɔ kö -waan 'dho Yesu -bha bómë -nu 'wo bhë -an -dhe =dhia -kanso 'kòdhö.

²²'Kee =dhe =wa 'dho =wa -lo -kanso 'kòdhö, waa -an yö. 'Wo -yɛ wo 'zü 'wo nu, 'ö 'wun 'ö -kë 'ma bhë 'wo- =blëe, ²³'wo- pö: «=Dhe 'yi -lo 'ma, yi -kanso 'kòdhi -nu -yö kö -wo ta -sü 'ka -së 'ka. 'Yi 'yan -to 'kòdhi -bha -me -nu yö kö -wo dɔ -sü 'ka -kanso 'kòdhi -nu -bha. 'Kee =dhe 'yi 'kwëe -po 'yi -kpɔɔ kɔɔ, yië me gbe yö.»

²⁴Dhe 'ö 'yan -to -Zlan -gba -a 'gü -kɔ -bha -me -nu -gómë waa- slabhome -gómë -nu =wa 'wun bhë -a ma, 'ö- -wun -yö -an 'te tun, Yesu -bha bómë -nu -bha =dhɔng 'wo- wo -kanso 'kòdhö bhë -a -wun 'gü. 'Ö pë 'wo dho -a kë waa- dɔ. 'Ö 'wo- pö wo 'ko -nu -dhë: «-Më 'ö 'dhoë- kë bhë -o?» ²⁵-Wo -to mü, 'ö me do -yö -wo, 'ö- pö -an -dhë: «-Ka dɔ! Me -nu 'ö 'ka -an kun, 'ka -an -da -kanso 'gü bhë, -wo -Zlan -gba -a 'gü -kɔ 'gü -de, me -nu =daan' =dhia!»

²⁶Dhe =ya kë 'dhö, 'ö 'yan -to -Zlan -gba -a 'gü -kɔ -bha -me -nu -gómë waa- ö bha me -nu 'wo -kë -an ziën mü bhë 'wo dho 'wo -an kun, 'wo nu -an 'ka. 'Kee waa pë 'dhiö- gbe kë -an 'ka, bhii -wo -suö kö -kun 'ö 'següme -nu dho wo -zuö -guö 'ka.

²⁷Dhe 'ö =wa -lo, 'wo dho -an 'ka -yakuëkëme -nu 'dhiö. 'Ö slabhome =va -yö -an =dhëe' kpɔ, ²⁸'ö- pö -an -dhë: «Yiëe ka tɔng dɔ, yiëe- pö kö -kun 'ka me gbe =daan gbɔ me 'ö bhë -a 'tɔ 'ka a? 'Yö =dhe -kë 'dhö, -më 'ö 'ka- kë -na -nɛ =ɛ? 'Ka ka -bha me =daan' -wo -nu sa Zeluzalemë plöö -dhe 'plë 'gü; 'yö gɔɔn- 'ö bhë -a -bha ga -sü bhë 'ka- 'piö kö 'kaan- -a -wun -lo yi tuö.»

²⁹'Ö Piëe waa- Yesu -bha bómë -nu 'wo to, 'wo -daa -kë -a -gɔ 'wo- pö: «Yi

-dho 'wun ma -Zlan -ta 'ö -zië' me 'bhee- -ta! ³⁰Yesu 'ka- zë, -a -dɔ -gaatalü -bha -sü 'ka bhë, kwa 'bhema -nu -bha -Zlan -yaa- bho ga 'gü, ³¹-yaa- -luu' ö 'piö -yaa- -ya ö bha -yadhë -bhlëzë -bha. 'Go mü 'ö- -ya -Gome waa- Mëdhame 'ka, 'ö- -kë kö Izlaelö 'següme -nu -waan bɔ -a -ta -waan wo -bha -tosiadhë -dhië' -kwaa kö -wo -dhië' -a 'piö kö -Zlan -yaan ziö -an -bha -sɔɔn yaa -nu -ta. ³²'Wun -nu 'wo bhë yi -an -tɔmɔ 'ka. 'Ö -Zuu 'slööslö 'ö -Zlan -ya nu me 'wo 'wun ma -a -ta -an -dhë bhë, 'ö- -tɔmɔ 'ka 'pö.»

³³-Dhe 'ö -yakuëkëme -nu -wa -wo 'ö bhë -a ma, 'ö 'wun -yö na -an -zuë -duö, 'ö 'wo -kë -a 'piö kö 'wo Yesu -bha bɔme -nu zë. ³⁴'Kee -an ziën, Falizi -me do 'wo- -dhe Gamalielö 'ö -kë tɔnggɔme do 'ö 'següme -nu -wa -bhlë -ya -va 'ka -a 'ka, -yö -kë mü. 'Ö -luu -yakuëkëme -nu ziën, 'ö- pö -an -dhë -wo Yesu -bha bɔme -nu yö plaan.

³⁵-Dhe -ya kë 'pö, 'ö- pö -yakuëkëme -nu 'wo bhë -an -dhë: «Izlaelö -me -nu, -ka ka -zo kë ka -de 'piö, pë 'ka dho -a kë me -nu 'wo -ne -an 'ka bhë -a -wun 'gü 'dhe! ³⁶-A -dhe yaa -glɔɔ -kun 'ö me 'wo- -dhe Tëuda bhë, -yö nu 'ö ö -de sü me 'gianzë 'ka. 'Ö me 'wo -mɔ me -lü -këng' -yiisië -bha 'wo -ziö -a 'piö. 'Kee -wa -zë. 'Ö -dhe -waa- zë 'ö me 'töüdhö 'wo -kë -a 'piö 'wo -pen 'ö -an 'ple -wo -kan wo 'kuë-. ³⁷-Dhe -ya kë 'dhö, me -dhong' -kwe 'töng 'ka 'zü, 'ö Galile mi 'wo- -dhe Zuda, 'ö nu 'ö me -plëzë -gan ö 'piö, 'ö 'wo- zë 'pö; 'kee me -nu 'saadhö 'wo -ziö -a 'piö bhë 'wo -pen 'zü. ³⁸-Dhe 'ö -kë 'dhö -ne, a- -pö ka -dhë: -Ka ka -zo bho gɔɔn- -nu 'wo bhë -an 'piö, 'ka ka -kwaa' -an -zü, -wo 'dho! Bhii 'ö tɔɔ -ya kë -ne -an -bha 'slë waa- -an këyuö -nu bhë -wo -go me 'bhee- 'gü, kö -yö -dho wü. ³⁹'Kee -ya kë -ne -yö -go gia- wo -Zlan 'piö, ka -kɔ 'ka 'dho -mɔa kö 'ka- 'gü -siö'. -Kaa kë 'slë 'ka kö -kun 'ka 'ko zë -Zlan 'ka!»

'ö -yakuëkëme -nu 'wo bhë 'wo -we Gamalielö -wo -bha. ⁴⁰'ö 'wo Yesu -bha bɔme -nu 'wo bhë 'wo -an -dhɔɔ -kë. 'Wo- pö 'dhasi -nu -dhë -wo -an -ma. -Dhe -wa -an -ma, 'wo- pö -an -dhë kö -kun 'wo 'wun -blëe me -nu -dhë gbɔ Yesu 'tɔ 'ka; 'ö 'wo wo -kwaa -an -zü.

⁴¹'ö Yesu -bha bɔme -nu -wo go -ya 'kuë- bhë -a -ta, -zuögludhi -va 'ka, bhii -yö wo -ma 'kun -wun 'ka kö wo 'klo -yaan bho Yesu 'tɔ -wun 'gü. ⁴²'ö yi 'saadhö 'ka, -Zlan -gba -a 'gü -kɔ -dhe waa- kɔɔdhe -nu -bha, 'wo me -nu -daan -kplawo 'wuntaɔsë 'ö -gban Yesu 'ö -Zlan -bha -Yame 'ka -a -bha.

Me -lü 'slaple 'wo- sü kö -waan nu Yesu -bha bɔme -nu -dhë

6 ¹-Dhe 'ö 'töng 'bhaa -ya ziö, kö Yesu -wun -dhe 'wun gia- -me -nu -wo kë -na -va -kplawo, 'wun -blëe -wo -löö -sü -yö -da Zuifö -nu 'wo bhë -an me -nu 'wo Glëkö -wo ma 'wo bho 'se gbë 'gü waa- Zuifö 'në giagia -nu -an ziën. -An me -nu 'wo bho 'se gbë 'gü bhë -wo -kë -a pö -dhia 'waa -bhöpë nu wo -bha -geandhoo -nu -dhë -ne -kɔ 'wo- nu -na -a 'ka -a me 'wo to -an -dhë bhë -a 'dhö, pë -bhöü- 'wo- -glu -na yi 'saadhö 'ka bhë -a 'ka.

²⁻³'ö Yesu -bha bɔme -nu 'gɔɔ- do ö ga -plë 'wo bhë 'wo -to Yesu 'piö -me -nu -dho 'kuë- -sü -dhɔɔ -kë wo 'ko -bhaa, 'wo- pö -an -dhë: «Yi dhegluzë

-nu, yaa 'dho kë -së kö 'yiën- yi -kwaä'- -Zlan -wo =blæ' -sü -zü kö 'yiën- yi -zo kë -bhöpë -wun 'piö! -Dhe -kë 'pö, -ka mæ 'slaple 'ö mæ 'plæ -wo -an 'tö -së to 'ö -Zuu 'slööslö 'dhö -an pa -sü 'ka, 'ö 'kpaakpadhe 'dho -an -gɔ -an 'sü ka ziën kö 'yiën- yuö 'ö bhë -a kɔɔ -an kwæ. ⁴=Ya kë 'pö, 'yi -dho -mɔa kö 'yiën- 'töng 'plæ 'sü 'yiën- dhoë 'dhiö, -bhea' -sü waa- -Zlan -wo =blæ' -sü 'ka.»

⁵Ö -an 'saadhö 'plæ -wo -we -an -wo bhë -a -bha. =Dhe -kë 'dhö 'wo Etienë 'ö pa -sü 'ka -zo -yö -Zlan -bha -sü waa- -Zuu 'slööslö 'ka bhë, 'wo- sü. 'Wo Filipö sü, 'wo Plokölö sü, 'wo Nikanɔɔ sü, 'wo Timɔ sü, 'wo Paamenasö sü, 'ö Nikola 'ö go Anticsö 'ö ö =zuö' =dhië Zuifö -nu -bha -bhea' -kɔ 'gü 'dhiö -be bhë, 'wo- sü. ⁶'Wo -an -zɔn Yesu -bha bɔmæ -nu -dhë; 'wo =bhea -an -wun 'gü wo -kɔ -kpa -an -ta -sü 'ka, -yö kë 'dhö kö -wo -ya -de -ta -Zlan -bha 'ka yuö bhë -a kë -sü 'ka.

⁷-Zlan -wo -yö -kë 'dho =dhia 'dhiö, kö Yesu -wun -dhe 'wun gia- -mæ -nu -dho 'kuë- -sü -yö kë =dhia =va -kplawo Zeluzalemë plöö; slabhome -dhe =va -dhe -wo -we -a -bha kö -wo wo -zo yö Yesu -bha 'pö.

Etienë 'kun -kɔ 'wo- kuën waa- 'wun -gen 'ö- bho

⁸Etienë 'ö -Zlan -bha 'dhuë- waa- -bha 'piigbeedhe -yö -kë -a -gɔ bhë, -yö -dhidhaapë =vava -nu -kë mæ -nu wö 'dhiö. ⁹Yö Zuifö -mæ -nu -bha -bhakuëkɔ 'gü -mæ -nu 'ö 'wo -an -dhe «-go 'gan 'gü -mæ -nu» 'wo go Silenë -sɛ 'gü 'dhö oo, -a mæ -nu -wo go Alezandri -sɛ 'gü waa- Zuifö mæ 'bhaa -nu gbe 'ö 'wo go Silisi -dhe waa- Azi -dhe -an 'gü 'wo yö zaɔdhe kë -sü -bha Etienë 'ka. ¹⁰Këe -an 'dhi -yö -kun 'ö -an -kɔ yaa -mɔa -bha kö -waan 'wun =blæ' - 'zü, bhii Etienë -yö 'wun -blæe 'kpaakpadhe 'ö -Zuu 'slööslö -ya nu -a -dhë bhë -a 'ka.

¹¹=Dhe -kë 'dhö, 'wo mæ mæ -nu 'piö 'wëü- 'ka kö -waan -a pö: «Yi- -wo -ma kö -yö 'wun =blæ' -na Moizö waa- -Zlan -an -gɔ.»

¹²-Kɔ 'ö 'wo 'següme -nu, mæ ziizii -nu waa- tɔnggɔmæ -nu 'wo -an zü -bliüë' bhë 'ö bhë. 'Ö 'wo -lo Etienë -ta 'wo- kun 'wo dho -a 'ka zakanme =va -nu 'dhiö. ¹³Yö 'wo nu mæ -nu 'wo dho =sua -wun dɔ Etienë -bha bhë -an 'ka 'ö mæ -nu bhë 'wo- pö: «Gɔɔn- 'ö =ne 'yaa ö bo 'wun =blæ' kwa -bha -Zlan -gba -a 'gü -kɔ 'slööslö waa- Moizö -bha tɔng -nu -bha -sü 'ka. ¹⁴Yi- -wo -nu -ma =ne Yesu 'ö go Nazaletë bhë -yö -dho -Zlan -gba -a 'gü -kɔ 'gü =siö' 'ö kwa wɔ -kɔ 'ö Moizö -ya nu kwa 'bhema -nu -dhë bhë 'ö- bho piin.»

¹⁵Me -nu 'saadhö 'wo -kë za 'kënnng 'gü mü, 'wo wo 'yan bɔ Etienë 'piö, 'wo- -ga -piindhö 'ö 'wo- wöödhë yö kö -yö 'bhü -na =ne -Zlan -bha bɔmæ wöödhë 'dhö.

7 ¹=Dhe =ya kë 'dhö, 'ö slabhome =va -yö Etienë =dhæ' kɔɔ 'ö- pö -a -dhë: «'Wun -nu 'wo- pö ü- -blæ bhë, ü- -blæ 'dhö gia- 'ka a?» ²Ö Etienë -ya -daa -kë 'ö- pö: «N dë -nu, n dhegluzë -nu, -ka ka 'to 'to! -Zlan 'tɔbhɔsüzë -yö ö -de -zɔn kwa 'bhema Ablaamö -dhë kö -yö -tun Mezopotami -sɛ 'gü kö

-yaan =tun 'dho -na -ya =dhia pödhe 'wo- -dhe Kalan bhë -a -bha. ³Ö -Zlan -ya -pö Ablaamö -dhë: *Bhi 'dhö, ü bha 'kɔɔmɛ -nu 'dhö, -ka 'go kaa- 'kɔɔmɛ -nu waa- kaa- 'següme -nu -an 'piö, 'ka 'dho 'se 'a 'dhoë- -a -zɔn ka -dhë bhë -a 'gü!* ⁴Dhe =ya kë 'dhö, Ablaamö -yö -go Kalidee -se 'gü, 'ö dho 'ö -ya Kalan. -Dhe 'ö bhë 'ö Ablaamö dë -yö ga -a -bha. 'Ö -Zlan -yö Ablaamö bɔ 'se 'ö 'ka- 'gü zlöö =ne -a 'gü. ⁵-Zlan yaa -dhe gbe nu -a -dhë mü. -Dhe pë 'tee gia- 'ö dho kë =ne kwa -gen pin 'dhö yaa- do nu -a -dhë kö -yaan kë -a -de -bha 'ka. 'Kee -Zlan -yö pë 'tɔ -go -a -dhë =woë' =ne -yö -dho 'segɔ bhë -a nu -a -dhë, 'ö- nu -a -suu'- -ta 'në -nu -dhë 'pö. 'Kee kö -a 'töng 'dhö bhë -a 'ka kö 'në gbe yaa kë Ablaamö -gɔ =kun. ⁶-Wo 'ö -Zlan -ya =blee -a -dhë yö =ga 'ö =ne: *Ü =suu'- -ta 'gü -mɛ -nu -wo -dho -tosiadhe kë -nia -dhe 'gü 'se gbe -ta. -Wo -dho kë =nua 'ka mü; 'ö mɛ -nu -wo -an 'klo bhɔ -kwe -këng' -yiisië 'piö. '7'Kee a -dho 'klobhdhe -da 'següme -nu 'wo 'dhoë- -an kë wo -bha =nua 'ka bhë -an -ta. =Ya kë 'dhö, -wo -dho go 'se 'wo -kë -a 'gü bhë =nua 'ka bhë -a -bha kö -waan nu zö n gba -dhia. »*

⁸Ö Etienë -yö dho 'wun =blee' -sü 'ka 'dhiö 'ö- pö: «=Dhe =ya kë 'dhö, -Zlan -yö -dhikuëdhe -kun Ablaamö 'ka, 'ö- =dua' -yö -kë 'bɔn zë -sü 'ka. 'Ö Ablaamö -yö 'ö gbö Izaakö kpɔ, 'ö- zë 'bɔng kö -ya bhɔ -a -dhekpaɔyi -ya kë 'slëaga. -Kɔ do bhë -a 'ka 'pö, 'ö Izaakö -yö Zakɔbö zaa 'bɔng, 'ö Zakɔbö -de 'pö 'ö 'ö -bha 'në -nu 'gɔɔ- do 'ö ga =plë 'wo -kë kwa 'bhëma -wun 'gbeezë 'ka 'ö -an zaa 'bɔng.

⁹Yö kwa 'bhëma -nu -wo =druei -kë wo dheglu Zozefu -bha, 'wo- 'dhoɔ dɔ kö -yaan kë =nua 'ka Ezitö -se 'gü. 'Kee -Zlan -yö -kë -a 'piö, ¹⁰'ö- bho -a -bha =sëëbhodhe 'plë 'gü, 'ö 'kpaakpadhe nu -a -dhë 'ö 'sla kpɔ -a -ta Falaɔn 'ö Ezitö -mɛ -nu -bha -gludë 'ka bhë -a 'dhiö. 'Ö Falaɔn -yö Zozefu -ya Ezitö -se waa- -a -bha =bhɔɔpë 'plë =kɔɔnme 'ka.

¹¹Ö din -yö -da Ezitö -se waa- Kana -se -an 'gü. 'Ö =sëëbhodhe -yö -kë =gbaɔnsü, 'ö pë kwa 'bhëma -nu 'wo dho -a yö -waan -bhö yaa kë -dhö.

¹²Dhe 'ö Zakɔbö =yaa- ma =ne 'blee- 'wo- =bluu'- kë -na bhë -yö =tun Ezitö -se 'gü, 'ö 'ö bha 'në -nu 'wo kwa 'bhëma -nu 'ka bhë -an bɔ 'ma kö -waan 'blee- 'dho. ¹³-A kë -peedë -naa 'wo dhoë zlöö bhë 'ö Zozefu -yö 'ö -de -zɔn 'ö dhegluzë -nu 'wo bhë -an -dhë, 'ö Falaɔn -yö Zozefu -bha 'kɔɔmɛ -nu dɔ 'sabra.

¹⁴Dhe =ya kë 'pö 'ö Zozefu -yö -naɔ dɔ 'ö dhegluzë -nu 'wo bhë -an -gɔ kö -waan dɔ wo dë Zakɔbö -gɔ kö -an dë waa- 'ö bha 'kɔɔmɛ -nu 'ö -an -dho 'kuë- -sü -yö -kë mɛ -lü 'gɔɔ- 'slaple 'ö ga 'sɔɔdhu 'ka bhë kö -waan nu.

¹⁵Dhe 'ö -naɔ bhë =waa- dɔ wo dë -gɔ, 'ö -an dë Zakɔbö waa- 'ö bha 'kɔɔmɛ -nu 'wo dho Ezitö -se 'gü. 'Ö Zakɔbö -nu 'wo bhë 'wo to 'se bhë -a 'gü 'ö yöë -an -bha ga -yi -bha. ¹⁶Dhe 'ö Zakɔbö -nu =wa ga 'wo dho -an =glöö 'ka Ablaamö -bha mɛ -bin -dhe 'ö- dho Emɔɔ -bha 'në -nu -gɔ, Sikemë -pö 'gü bhë -a -bha. -Dhe do bhë 'wo kwa 'bhëma -nu -bin -a -bha 'pö.

¹⁷Dhe pë 'ö -Zlan -ya 'tɔ go Ablaamö -dhë, 'ö- yi 'dhö 'to -na 'tee kö -yaan kë, kö kwa 'bhëma -nu -wo -bhɛɛ -na. 'Yö 'wo -kë =plëëzë Ezitö -se

'gü. ¹⁸-Dhe =ya kë 'pö, -gludë gbe 'ö yaa Zozefu dɔ -ne Falaɔn 'dhö bhë 'ö yö Falaɔn pin =taa Ezitö -se =kɔɔn -sü 'ka. ¹⁹'Ö -gludë me bhë 'yö kwa 'bhema -nu -püö 'ö -an 'klo bho, 'ö -an 'gbeedhe bho kö -waan wo -bha 'në 'puu -nu -lo blöö, -wo wo =kwaal' -an -zü -wo ga.

²⁰Töng gia- bhë -a 'ka 'ö Moizö -yö bhɔa. -Yö -kë 'në 'puu -së =duö 'ö -wun 'yi -yö -kan -Zlan -dhë -a 'ka. 'Ö- 'kpɔme -nu -wa to kɔɔ 'su -yaaga 'piö 'wo wo -zo -kë -a 'piö -bin -blü kö =kun Falaɔn dho -a =tei' dɔ. ²¹-Dhe 'ö- 'kpɔme -nu =wa 'në bhë =waa- dɔ blöö, =wa wo =kwaal' -a -wun -zü, 'ö Falaɔn 'dhu -yö -kpën -a -bha 'ö- sü 'ö dhoë 'ö- -kë 'ö -bha 'në 'ka, 'ö 'ö -zo -kë -a 'piö. ²²-Dhe =ya kë 'dhö, 'wo Moizö =daan Ezitö -me -nu -bha 'wunbhokoudɔdhe 'saadhö 'ple 'ka, 'ö- 'pii -yö -kë 'gbee- 'ö 'dhi -wo waa- 'ö këpë -nu 'gü.

²³-Dhe 'ö Moizö -kwe =ya kë 'gɔɔ- 'yiisië, 'ö- =zuö' -yö =luu kö -yaan 'dho 'ö dhegluzë -nu 'ö 'wo Izlaelö -me -nu 'ka bhë -an 'piö kö -an -kë -a 'gü -kɔ -nu 'wo bhë -yaan dɔ. ²⁴-Dhe 'ö dho, kö Ezitö mi do -yö me -nu 'wo bhë -a me do 'klo bho -na 'kpaan; 'yö dho me 'wo- 'klo bho -na bhë -a -dhë, -a -zo bho -sü 'ka 'yö Ezitö mi bhë 'yö- zë. ²⁵-Yö -kë -a -zo 'piö -bezë =ne 'ö dheglu -nu 'wo Izlaelö -me -nu 'ka bhë -wo -dho -a -gen dɔ =ne, -Zlan -yö -dho bɔ 'ö -ta 'ö -an bho 'gan 'gü; 'kɛɛ waa -dhe gbe yö 'wun bhë -a 'gü. ²⁶-A -dhe me 'ö -po -a 'piö bhë Moizö -yö Izlaelö -me =ple -yö kö -wo 'ko zë -na 'ö- -kë kö 'ö -an dhi 'kuë -a -pö -an -dhë -sü 'ka: «Me 'ka =ne, -abi', kö =kun 'ka 'ko zë ka 'kuë! 'Ö tɔɔ dhegluzë -mü ka 'ka!» ²⁷'Kee -a me 'ö- -bha za 'dhö ya bhë -yö Moizö -kë =woë' =neɛ: «Yö 'ma -zian 'dhe! Dö 'ö ü -ya -gɔme 'ka 'iin zakanme 'ka yi -ta -ɛ? ²⁸Ü- 'piö kö 'ü n zë =ne -kɔ 'ü Ezitö mi zaa yeen bhë -a 'dhö a?» ²⁹-Wo bhë -dhe 'ö -da Moizö 'toodhö, 'yö =duë 'ö dho 'ö -ya Madian -se 'gü. -Dhe 'ö bhë =ne 'ö to -a -bha 'ö 'në gɔɔn- =ple kpɔ.

³⁰-Dhe 'ö -kwe 'gɔɔ- 'yiisië =ya ziö, 'ö -Zlan -bha bɔme do -yö 'ö -de -zɔn Moizö -dhë 'yënnngaadhe 'ö -kë Sinai -tɔn 'sɔɔ bhë -a -bha; 'siö 'ö -kë -kpɔɔ kpö do 'güö -dhia bhë -a 'gü. ³¹'Yö Moizö 'te -yö tun, pë 'ö- yö bhë -a -wun 'gü. -Dhe 'ö =yɔɔn -na -kpɔɔ kpö 'ö bhë -a 'ka -klöö' kö -yaan -a -ga 'papadhö, 'ö kwa Dëme -Zlan -wo ma kö -ya pö -na: ³²Ma 'a tɔɔ ü 'bhema -nu -bha -Zlan, Ablaamö -bha -Zlan, Izaakö -bha -Zlan waa- Zakɔbö -bha -Zlan.

'Ö Moizö -yö yö =zluun -sü -bha 'suö -dhë. 'Ö -dhe -ga 'ma -sü -yö -kë -a -dhë -ziizë. ³³'Ö kwa Dëme -ya pö -a -dhë: «Bhö ü bha -sakpa bho ü -gean, bhii -dhe ü dɔ -a -bha bhë =yö 'slööslö. ³⁴'Yënnghɔdhe kë -na ma me -nu -gɔ Ezitö -se 'gü bhë, a- -yö, a -an 'gbo -wo -ma; pë -kë 'a -yɔɔ 'aan -an bho 'gan 'gü bhë 'ö bhë. -Bhö nu, -a yi =ya -lo kö 'aan- ü bɔ Ezitö -se 'gü 'sabl!» »

³⁵'Ö Etienë -yö dho 'wun =blɛɛ' -sü 'ka 'dhiö 'ö- pö: «Moizö 'ö Izlaelö -me -nu waa 'we -a -wun -bha 'ö 'wo- pö -a -dhë: «Dö ü -ya yi -gɔme waa- yië zadɔme 'ka bhë, yö do gia- bhë =ne 'ö -Zlan -ya bɔ kö -yaan kë -an

-bho 'gan 'gü -me waa- -an -gɔme 'ka. -Zlan -bha bɔme 'ö ö -de -zɔn -a -dhë, -kpɔɔ kpö 'ö kè 'güö -dhia -a 'gü bhë, yö -ne 'ö nu -a -dhë kö -yaan kè Izlaelö -me -nu -gɔme waa- -an -bho 'gan 'gü -me 'ka. ³⁶Moizö -ne 'ö Izlaelö -me -nu bho Ezitö -se 'gü -dhidhaapë -nu kè -sü 'ka 'se 'ö bhë -a 'gü, 'yoo nuëazë 'dhiö waa- -kwe 'gɔɔ- -yiisië kè -sü 'ka 'yënnng -taa. ³⁷Moizö bhë 'zü -ne 'ö- pö Izlaelö -me -nu -dhë: -Zlan -yö -dho ö -wodhiölome do 'ö dho kè -ne n 'dhö 'ö dho go ka -suu' -'gü -a bɔ ka -dhë. ³⁸Moizö bhë 'zü -yö -kè Izlaelö -me -nu ziën 'yënnng -taa. Yö -ne 'töng 'wo- -kaa' mü bhë 'ö -kè -Zlan -bha bɔme waa- kwa 'bhema -nu ziën, 'ö -ya kè 'ö -Zlan -wo 'ö -toëpö -këdhösü nu me -nu -dhë bhë 'ö -yaa- ma 'dhö Sinai -tɔn tuö 'ö -ya kè 'ö nu 'ö -'dhiö -lo kwa 'bhema -nu -bha.

³⁹Këe kwa 'bhema -nu waa 'we -a -bha kö 'wo 'wun ma Moizö -ta. 'Ö 'wo -kɔ Moizö 'ka; 'wo- -dho -kaa' kö 'wo 'yë wo 'zü, 'wo 'dho Ezitö -se 'gü. ⁴⁰'Ö 'wo- pö Aalɔn -dhë: «-Bhö kwa -bha gɔapë -nu 'wo dho 'ta sü kwa 'dhiö -an kè! Bhii Moizö 'ö kwa bho Ezitö -se 'gü bhë, pë 'ö -kè -a 'ka 'kwaa- dɔ!» ⁴¹'Ö 'wo 'sënnng -du 'në do -kè 'ö 'wo sla- bho wo -bha gɔapë bhë -a -dhë. 'Ö wo -kwaa' -pë bhë, 'wo- 'wlaan- -kè. ⁴²'Ö -Zlan -yö ö -ta yö -an -bha 'ö -an -bha -yë 'zü -yö -kè 'susong -nu gba -sü 'ka -ne -kɔ 'ö -been' -sü 'ka -Zlan -wodhiölome -nu -bha 'sëëdhe 'gü bhë -a 'dhö -neë: -Zlan -ya -pö: *Izlaelö -me -nu, ka wü -zë 'ka sla- -nu bhoë -kwe 'gɔɔ- -yiisië 'piö 'yënnng -taa, 'këe n -ma sla- 'yaa -mü.* ⁴³*Ka -bha -zlan Mɔɔkò 'yö 'ka- -bha sɔ 'kɔ sü, 'ka dhoë -dhe 'plë 'ö 'ka dho -a -bha -a 'ka, 'ö kaa- -zlan 'ö- 'tɔ -kè Lefan 'ka 'ö- -dua' -yö -kè 'susong 'bin 'ka bhë, 'ka- sü 'pö. Gɔapë -nu 'wo bhë ka -an -kè ka -kwaa'; 'ö 'ka -an gba. -A -wun 'gü a -dho -a kè kö -waan 'dho ka 'ka -gbiin Babilɔnë -dhe -zlöö.*

⁴⁴-Dhe 'ö kwa 'bhema -nu -wo -kè 'yënnng -taa bhë, sɔ 'kɔ 'ö- -zɔn -an -dhë -ne -Zlan -yö wo 'piö, 'ö -guö 'fa -nu 'ö tɔng dɔ -wo -nu 'dhö -been' -sü 'ka -a -ta -wo -kè -a 'gü bhë -yö -kè -an -gɔ mü. Sɔ 'kɔ 'ö bhë -wa -kè -ne -kɔ 'ö -Zlan -ya -blëë -a 'ka Moizö -dhë, 'ö- -zɔn -a 'ka -a -dhë bhë -a 'dhö. ⁴⁵'Ö sɔ 'kɔ bhë 'ö dɔ 'pö kwa 'bhema -nu 'wo yö -an 'piö bhë -an kwëë. 'Ö Zozue -yö yö -an -dhë 'dhiö, 'wo sɔ 'kɔ bhë 'wo- sü 'wo dhoë Kanaa -se 'gü. -An -lo mü -yië', kö -Zlan -ya 'se bhë -a 'gü -me -nu kè -an 'dhiö; 'yö 'wo -an -bha 'se kun -an -gɔ. 'Ö sɔ 'kɔ bhë 'ö to -an -gɔ, 'se 'wo- kun bhë -a 'gü, 'ö dhoë 'ö yöë Davidö -bha yi -bha. ⁴⁶Davidö -wun -yö -Zlan -zo -kun. 'Ö Davidö -ya -dhe ö -bha -Zlan 'ö -kè ö 'bhema Zakɔbö -bha -Zlan 'ka bhë -a -gɔ kö -yaan -a -bha 'kɔ dɔ. ⁴⁷Këe Salomɔ -ne 'ö 'kɔ bhë 'ö- dɔ zlöö.

⁴⁸Këe a- -blëë ka -dhë giagia 'ka -ne -Zlan 'yö -va, 'yaa -ya 'kɔ -nu 'ö me 'bhee- -nu 'wo- dɔ -an 'gü -ne -kɔ 'ö- -wodhiölome -ya -blëë -a 'ka bhë -a 'dhö -neë: *Kwa Dëme (-Zlan) -ya -pö: ⁴⁹Dhang- 'gü -dhe 'ö tɔɔ ma 'gɔ -gbloo 'gü -dhe, 'ö 'se 'dhö n -gen -gban -a -ta -pë 'ka. -Dhe 'ö 'pö, 'kɔ -suu' -mlë 'ö 'ka dho -a dɔ n -dhë -ë? 'Iin -dhe -mlë 'a dho n 'tëë -nu pa -a -bha -ë? ⁵⁰Ma -de kun 'a pë -nu 'wo bhë 'a -an 'plë -kè -a? »*

⁵¹'Go mü 'zü 'ö Etienë -ya pö: «=Dhe 'ö -kë 'dhö =ne me =güi' 'gbeezë 'ka =ne, 'ö ka =zuö' -nu, ka 'to -nu, =wa ta -Zlan -wo -gö, 'ö 'kaa 'we -a -bha kö 'kaan -'wun ma -Zuu 'slööslö -ta -kplawo bhë, ka bhö ka 'bhema -nu -bha giagiawo -dhë! ⁵²-Zlan -wodhiölome -nu 'wo bhë, -a dö -zë 'ö ka 'bhema -nu waa -a 'klo bho =e? 'Ö me -nu 'wo me kpengdhö do -bha nu -sü -wun =blëe' -bhë, 'wo -an zë. Me kpengdhö 'ö bhë 'ö 'ka -dö me -nu kwëë, 'wo -zë. ⁵³-Zlan -yö täng -nu ka -dhë 'ö bca ö -bha bome -nu -ta; 'ö täng 'dhö bhë kaa -bhlë 'kpo.»

Etienë -bha ga -kó

⁵⁴=Dhe zakanme -nu =wa Etienë 'wun =blëe' -wo ma, 'yö 'wun -yö -na -an -zuë =gbaonsü. ⁵⁵'Kë Etienë 'ö -Zuu 'slööslö -ya pa bhë 'ö -dhe -ga dhang -'gü, 'ö -Zlan -bha 'töbhödhe 'bhü yö; 'ö Yesu yö kö -yö dö -sü 'ka -Zlan -bha -dhe =bhlëzë -bha, ⁵⁶'ö -pö: «=Ka dö 'dhe, dö 'a -wo =ne, 'ma -kpën dhang -nu -bha, -an 'dhi -yö 'po -sü 'ka; Megbö 'ö dö =süë' -Zlan -bha -dhe =bhlëzë -bha bhë a -yö 'pö.»

⁵⁷=Dhe -kë 'dhö 'wo yö -gbla 'gbee -'ka -sü -bha, 'wo wo -kö yö wo 'toë-, wo 'to ta -sü 'ka (kö -waan 'kun 'wun 'ö -blëe bhë -a ma -sü 'ka -a -zön -sü 'ka =ne pë 'ö -blëe' -na bhë -yö -Zlan -sü ya -sü 'ka). 'Ö -an 'ple -wo =luu wo 'kuë, 'wo dho 'wo -lo Etienë -ta. ⁵⁸'Wo -=gblëë 'wo dhoë pö -=taa -bha 'wo yö -a =zëë -zë -guö 'ka -sü 'gü kö -waan -a zë. 'Ö me -nu 'wo -tömhö -kë Etienë -bha zadayi 'ka bhë, 'wo wo -bha -da sö -ta dhuö -sö bho wo -bha, 'wo -nu 'nëgöonzë -dadhëü 'wo -dhe Sölö bhë -a -dhë kö -yaan ö 'yan 'to -a -bha kö 'woë- wo -bha -guö -zuö -dhe yö.

⁵⁹=Dhe 'wo Etienë zë -na -guö 'ka bhë, -yö -bhëa 'ö -pö: «N Dëme Yesu, 'ma n -de -wun -lo ü kwëë.» ⁶⁰=Dhe 'ö -kë 'pö 'ö -lo ö kpön 'gü 'ö -gbla 'gbee -'ka =në: «N Dëme, ü -bha 'gën -mü; ü -zo bho -an -bha =söön yaa bhë -a 'piö!» =Dhe 'ö -pö 'dhö 'ö -zo -yö dö.

8 ¹⁻²Etienë zë -sü bhë, Sölö -zo -yö -we -a -bha. 'Ö me -nu 'wo -Zlan =bhlë -ya 'wo Etienë -bin, 'ö 'wo 'gbo bö =va -a -wun 'gü.

Sölö -bha Yesu -wun -dhe 'wun gia- -me -nu 'klo -bhö -sü

Yi gia- bhë -a 'ka, -Zlan -bha me -nu 'wo Zeluzalemë 'ö -an -bha 'klobhödhe =va zü yö döa. 'Ö -kan Yesu -bha bome -nu -bha, Yesu -wun -dhe 'wun gia- -me -nu 'ple -wo -pen, 'wo dho Zude -së waa - Samali -së 'gü -dhe -nu -bha.

³Sölö -zë, -yö ö =faan' sü kö -yaan -Zlan -bha me -nu 'tiin yën. 'Ö -sö köödhe -nu -bha, 'ö Yesu -wun -dhe 'wun gia- -me -nu, göön -nu, dhoo -nu -an kun 'ö -an -zuö -kanso 'gü.

Filipö -yö Yesu -bha 'wuntaö së -blëe Samali -së 'gü

⁴Yesu -wun -dhe 'wun gia- -me -nu 'wo -pen bhë, -wo 'wuntaö së -blëe 'wo dhoë -dhe 'ple 'gü. ⁵Filipö -yö -dho Samali -pö do 'gü, 'ö -Zlan -bha -Yame

-wun -blee -an -dhë. ⁶Me gbung -nu 'wo -kë mü bhë, 'wun 'ö Filipö -yö -kë -a -blee' -dhia bhë, -an 'ple 'töüdhö -wo -kë wo 'to 'to -dhia -a -bha -së 'ka, -dhidhaapë -nu 'ö -kë -a kë -dhia 'ö 'wo -an yö bhë -an -wun 'gü. ⁷Bhii 'ö tɔɔ me -nu 'ö -zuu yaa -yö -kë -an 'gü bhë, -zuu yaa -nu 'wo bhë -wo -kë -go -an 'gü -dhia -gblaa 'gbla -sü 'ka 'gbee- 'ka; 'tinngme -nu waa- -gentəsiöme -nu 'wo -kë mü bhë 'ö -an -dhe -yö bo 'pö. ⁸'Ö pö- bhë -a 'gü -me -nu 'glu -yö -dhi -va 'ka.

⁹Gɔɔn- do 'wo- -dhe Simɔ -yö -kë pödhe bhë -a -bha. -Yö -kë -debɔme 'gbee- do 'ka, -a -wun kë -kɔ -wun 'gü, 'ö Samali -següme -nu 'te tun, 'yö 'ö -de -kë -bhlëzë. ¹⁰'Ö me -nu 'wo plöö mü 'töüdhö, 'ö yöë me 'giangian -nu -ta, 'wo wo 'to to -a -bha -së 'ka 'wo- pö: «Kwa -bha -Zlan -va bhë -ne 'ö- -bha 'piigbeedhe -yö -kë Simɔ 'ka 'ö -yɔɔ kwa 'piö bhë.»

¹¹-Wo wo 'to -to Simɔ -bha -së 'ka. 'Ö- -bha -de 'ö- bɔ -na mü -kplawo 'ö- -dhe -ya -glɔɔ bhë, 'ö- -wun -yö -an 'te tun. ¹²'Kee -dhe 'ö 'wuntaasë 'ö -gban -Zlan -bha -gludëdhe waa- Yesu Klito -an -bha, 'ö Filipö -yaa- -blee' -an -dhë, 'ö gɔɔn- -nu, dhoo -nu 'bhaa -nu 'wo plöö mü, 'wo -wun -dhe 'wun gia-, 'ö 'wo -an bɔ yö Yesu 'tɔ 'ka. ¹³'Ö Simɔ -de gia- 'pö, 'yö Yesu Klito -wun -dhe 'wun gia-. 'Ö 'wo- bɔ yö. 'Yö to Filipö 'piö; -dhidhaapë -vava -nu 'ö Filipö 'dhö -an kë -na bhë 'ö -an yö 'ö- -wun -ya 'te tun.

¹⁴-Dhe 'ö Yesu -bha bɔme -nu 'wo -kë Zeluzalemë -wa ma -ne me -nu 'wo Samali, -wa -Zlan -wo -dhe 'wun gia-, 'wo Piee waa- Zan -an bɔ -an -dhë.

¹⁵-Dhe me 'wo bhë -wa 'dho -wa -lo Samali -se 'gü, 'ö 'wo -bhea Yesu -wun -dhe 'wun gia- -me -nu -wun 'gü, -yö kë 'dhö kö -waan -Zuu 'slööslö yö. ¹⁶Bhii 'ö tɔɔ kö waa -Zuu 'slööslö yö -kun. -An bɔ 'wo- wo yö 'kpaan 'ka kwa Dëme Yesu 'tɔ 'ka. ¹⁷-Dhe -ya kë 'dhö, 'ö Piee waa- Zan 'wo wo -kɔ kpa -an -ta, 'ö 'wo -Zuu 'slööslö yö.

¹⁸-Dhe 'ö Simɔ -ya yö -ne -Zlan -ya -Zuu 'slööslö nu Yesu -wun -dhe 'wun gia- -me -nu -dhë, Yesu -bha bɔme -nu -bha -kɔ 'wo- -kpa -an -ta bhë -a -wun 'gü, 'ö 'wëü- nu Piee waa- Zan -an -dhë, ¹⁹'ö- pö -an -dhë: «-Kɔ -mɔ 'wuën- -sü bhë, -kaa nu n -dhë, -yö kë 'dhö kö me 'a 'dhoë- n -kɔ kpa -a -ta -yaan -Zuu 'slööslö yö 'pö!»

²⁰'Yö Piee -ya -pö -a -dhë: «Bhi 'dhö, ü -bha 'wëü- 'dhö, ka 'gü -yö -siö'! 'Ö tɔɔ ü ü -zo -ta -ne 'bha 'wëü- nu yi -dhë, -Zlan -dho -kɔ -mɔ 'wuën- -sü nu ü -dhë, 'wëü- bhë -a -truën 'ka kö 'üën- -Zuu 'slööslö nu -a 'ka me -nu -dhë. ²¹Ü -bha 'wun gbe 'yaa pë -nu 'wo -ne -an -wun 'gü. Bhii 'ö tɔɔ 'bhaa 'kpëdhö -Zlan wö 'dhiö. ²²-Bhö ü -ta yö -zo -ta -a 'gü -wun yaa -nu -bha 'ü -bhea' -kwa Dëme -dhë kö -yaan ziö ü -bha -zo -ta -a 'gü -wun yaa -nu 'ö 'wo 'dhö bhë -an -ta! ²³Bhii a- -yö -neë ü pa -sü 'ka 'wun yaa -va 'ka. 'Go mü ü -sɔɔn yaa -gɔ 'gan 'gü.»

²⁴'Ö Simɔ -ya pö Piee waa- Zan -an -dhë: «Ka gia-, -ka -bhea' Dëme -dhë n -wun 'gü, kö -kun 'ö pë -nu 'ka -blee' -na bhë 'ö- gbe dho kë n 'ka!»

²⁵-Dhe 'ö Piee waa- Zan pë 'wo- dɔ Yesu Klito -wun 'gü -waa- -blee' -me -nu -dhë, 'ö -wa kwa Dëme -bha 'wuntaasë -blee', 'wo -yɛ wo 'zü, 'wo dho

Zeluzalemë. 'Ö =dhe 'wo 'dho -na, 'wo 'wuntaasë =blee pödhe -nu 'wo -kë bɔ -dhia -an 'gü Samali bhë -an 'gü.

Filipö waa- -lame do 'ö go Etiopi -se 'gü

26 (Filipö -yö -kë Zeluzalemë, 'ö) kwa Dëme -bha bɔme -ya pö Filipö -dhë: «-Bhö 'dho goo =zian', -kpinngga 'ö go Zeluzalemë 'ö dho Gaza bhë -a 'ka! -Kpinngga 'ö bhë 'yaa me -nu 'gbloo 'ka =duö gbɔ.»

27 'Ö Filipö -yö =luu 'ö dho. 'Ö- -bha 'dho -sü 'ka, 'ö yö gɔɔn- do 'ö 'yaa -gbabhö -a -bha zian-. Gɔɔn- 'ö bhë -yö -kë =lame =va do 'ö go Etiopi -se 'gü 'ö ö -zo -kë Etiopi -se =kɔɔndhe 'wo- -dhe Kandasö bhë, -a -bha =bhɔɔpë -nu 'saadhö -an 'piö -a 'ka. -Yö -nu Zeluzalemë -Zlan gba =dhia. 28 -Yö -kë -ya -sü 'ka ö -bha -yaagüpë 'ö =soo -nu -wa -gan -a 'gü kö -yö 'dho -na ö =plöö. -Yö -kë -Zlan -wodhiölome Ezai -bha 'sëedhe -be pö =dhia.

29 'Ö -Zuu 'slööslo -ya pö Filipö -dhë: «-Bhö 'dho -yaagüpë bhë -a 'sɔɔ!»

30 'Ö Filipö -yö -dho -bla 'ka 'ö yö Etiopi mi 'ö bhë -a -bha. 'Ö Ö- -wo ma kö -yö -Zlan -wodhiölome Ezai -bha 'sëedhe -be pö -na. 'Ö- =dhe' kɔɔ =nɛɛ: «Pë 'ü- pö -na bhë 'ü- -gen -ma -a?»

31 'Ö gɔɔn- bhë 'ö- -daa -kë 'ö- pö -a -dhë: «=Ya kë =nɛ mɛ gbɛ yaa- -gen pö n -dhë, a -dho -a dɔ -kɔklë =ɛ?»

'Ö- pö Filipö -dhë: «-Bhö -da n 'piö!» 'Ö Filipö -yö -da -a 'piö. 32 Pë 'ö -kë =bɛɛn' -sü 'ka -Zlan -bha 'sëedhe 'gü, 'ö Etiopi mi -yö -kë -a pö =dhia dhö bhë -ya pö: -Yö -kë =nɛ 'bhla 'wo 'dho -na -a 'ka -a zë =dhia -a 'dhö. 'Ö -kë =nɛ 'bhlanë 'ö 'wo- kaa- bho -na -a -bha 'ö 'yaa 'we -a 'dhö. Yaa ö 'dhi 'po. 33 Mɛ -nu -wo 'yan =ziö' =kaa' ö waa 'wun gia- =bleɛ', -a -bha za dɔ -sü 'gü. Mɛ gbɛ 'yaa -mɔa -bha kö -ya =suu' -ta 'në -nu -wun =bleɛ', bhii -wa -zë. 34 'Ö Etiopi mi 'ö bhë 'ö Filipö =dhe' kɔɔ 'ö- pö: «=Bhea' 'a- wo ü -dhë, dö 'ö -Zlan -wodhiölome -yö 'wun -gban -a -bha 'ö- =bleɛ =nɛɛ? Yö gia- 'yö ö -de -wun =bleɛ e, 'iin 'wun 'ö bhë -yö -gban mɛ gbɛ -bha e?»

35 'Ö Filipö -yö dɔ 'wun kɔɔ 'ö- pö bhë -a -ta, 'ö 'wuntaasë 'ö -gban Yesu -bha 'ö- =bleɛ -a -dhë. 36 -Wo -kë 'dho =dhia 'ö 'wo yö 'yipuë do 'sɔɔ; 'ö Etiopi mi 'ö bhë 'ö- pö: «'Yi -ga =nɛ; -më 'bhaa 'ö n -ma 'zü 'ö dhoë- kë kö 'üen- 'kun n -bɔ yiö -sü 'ka ɛ?»

37 (('Ö Filipö -ya pö -a -dhë: «'Ö =ya kë =nɛ Yesu -wun -dhe 'wun gia- -sü =ya kë ü -gɔ ü =zuöga 'plɛ 'ka, kö ü -dho -mɔa -bha 'ü -bɔ yiö.»

'Ö gɔɔn- 'ö bhë 'ö- pö: «A- -dhe 'wun gia- =nɛ Yesu Klito bhë -Zlan Gbö -mü.»))

38 =Dhe =ya kë 'pö 'ö Etiopi mi 'ö bhë 'ö- pö mɛ 'ö -yaagüpë -blü -na bhë -a -dhë -yö =gbaannu. =Dhe 'ö =gbaannu, 'ö Etiopi mi waa- Filipö 'wo yö sia-, 'ö -dhe 'wo- -bha =plɛ 'wo =yɔɔ 'yi =bhaa, 'ö Filipö -yö Etiopi mi -bɔ yiö Yesu 'tɔ 'ka.

39 =Dhe 'ö =wa 'go yiö 'ö -Zuu 'slööslo -yö Filipö sü -dhe do bhë -a 'gü 'ö dho -a 'ka. 'Ö Etiopi mi 'ö bhë yaa- yö gbɔ. 'Kɛɛ yö -zë, -yö -dho ö -bha

'ta 'ka 'dhiö 'gludhi 'ka. ⁴⁰Filipö -zë -dhe 'ö dho -a -ga kö -yö Azo -pö 'gü. -Dhe -kë 'dhö 'ö dho ö -bha 'ta 'ka 'dhiö, 'ö 'wuntaö së -blæ pödhe -nu 'gü 'ö dhoë 'ö -loë' Sezale plöö.

Sölö -bha -zuö' -dhië -Zlan 'piö -ko

(Këyuö -nu 22.6-16; 26.12-18)

9 ¹Töng 'ö bhë -a 'ka, Sölö -yö -kë 'suö -da -dhia kwa Dëme -bha -guë' -nu 'gü, -an zë -sü -wun 'ka -kplawo. ²'Ö dho slabhome =va 'piö, 'yö 'wo wo -kɔ pin -kë 'sëedhe -nu -ta kö -ya -zɔn =nɛ -an -zo 'kun -wun -mü kö 'yaan- dhoë Zuifö -nu -bha -bhöküekɔ -gɔmɛ -nu 'wo Damasö plöö -an -dhia. -Yö -kë 'dhö =ya kë =nɛ 'ya gɔɔn- -nu 'iin dhoo -nu -an yö kwa Dëme -bha zian -ta kö 'yaan- -an 'kun 'yaan- nu -an 'ka Zeluzalemë.

³'Ö -da zian 'ö dho Damasö -a -ta. =Dhe 'ö =yɔɔ' -na pödhe bhë -a 'sɔɔ, 'kan 'ö- wo -ta 'ö -dhepuudhe 'ö go dhang- 'gü -a 'bhü =ya =nië' -a -zü. ⁴'Ö go ö -bha =soo =taa 'ö -püö sia-. 'Ö me do -wo -ya pö -a -dhë: «Sölö, Sölö, -më 'ö -kë 'ü n 'yënnng bhɔ 'dhö e?»

⁵'Ö Sölö -ya =dheɛ' kpɔ, 'ö- pö: «Dö -mü ü 'ka ɛ, n Dëme?»

'ö kwa Dëme Yesu -ya pö -a -dhë: «Ma Yesu, 'ü n 'yënnng bhɔ -na bhë (('ko zë 'ü- wo -na n 'ka bhë, pë 'dhiö 'ü- kë -na ü -de 'ka bhë -ɔɔ!» 'Ö 'suö =va -yö -da -a 'gü, 'yö yö =zluun -sü -bha, 'ö- pö: «N Dëme, -më 'ü- 'piö kö 'a- kë =ɛ?» 'Ö kwa Dëme -ya pö -a -dhë:)) ⁶«-Bhö =luu- 'ü 'dho pödhe 'ö ü 'dhiö bhë -a -bha! Pë 'ü dhoë- kë bhë, -dhe bhë =nɛ 'wo -dho -a =blæɛ' -ü -dhë -a -bha.»

⁷Gɔɔn- -nu 'ö waa- Sölö -nu 'wo -kë 'dho -dhia bhë, -an 'te -yö =tun 'ö pë 'wo dho -a kë waa- dɔ, bhii -wo 'ö -kë we -dhia bhë -wa -ma, 'kɛɛ waa mɛ gbe yö.

⁸Sölö -yö -luu sia-, 'yö ö 'yan -po; 'kɛɛ yaa -dhe yö. 'Wo -yaa =kwɛɛ' -bha, 'ö 'wo dho -a 'ka Damasö plöö. ⁹-A 'yënnng -yö -to trö -sü 'ka -dhekpaɔyi -yaaga 'piö. 'Töng 'dhö bhë -a 'ka, yaa pë gbe -bhö 'iin yaa 'yi mü.

¹⁰-Dhe 'ö Damasö bhë, Yesu -wun -dhe 'wun gia- -mɛ do 'wo- -dhe Ananiasö -yö -kë mü. 'Ö kwa Dëme -yö 'wun -blæɛ -a -dhë 'yanpiöpë 'gü, 'ö- pö: «Ananiasö!» 'Yö Ananiasö -ya pö: «Ma -ga 'a =nɛ, n Dëme!»

¹¹'Ö kwa Dëme -ya pö -a -dhë: «-Bhö =luu- 'ü 'dho -kpinngga 'ö 'wo- -dhe -kpinngga 'ö dɔ kpengdhö -a -ta, 'ü 'dho 'ü -da Zuda -gɔ kɔɔ, 'ü gɔɔn- 'ö go Taasö, 'wo- -dhe Sölö bhë 'ü- =mɛɛ' -! -Yö kɔɔ mü =bheɛ' -sü 'gü. ¹²-Ya 'yanpiöpë yö. -A -bha 'yanpiöpë bhë -a 'gü, =ya gɔɔn- do 'wo- -dhe Ananiasö -a yö kö =ya -da -a -gɔ kɔɔ; =ya ö -kɔ kpa -a -ta, -yö kë 'dhö kö -yö -dhe yö 'zü -dëüwo.»

¹³'Ö Ananiasö -ya -daa -kë 'ö- pö: «N Dëme, medhevadhe =wa 'wun 'ö -gban gɔɔn- 'ö bhë -a -bha -a =blæɛ' -n -dhë, 'ö 'wun yaa =suu- 'ö- -kë ü -bha mɛ -nu 'wo Zeluzalemë -an 'ka, -wa 'plɛ -blæɛ n -dhë. ¹⁴-A -bha -nu zö -sü 'ka, slabhome -gɔmɛ -nu -wo -wogbiindhe -nu -a -dhë kö -yaan mɛ -nu 'wo =bheɛ ü 'tɔ 'ka -an 'kun -yaan -an -da -kanso 'gü.»

¹⁵'Yö kwa Dëme -ya -pö Ananiasö -dhë: «-Bhö 'dho 'dhe! Bhii gɔɔn-bhë, 'ma- 'sü kö -yaan n -wun -blee', 'segɔgüme -nu 'ö 'waa Zuifö 'ka waa- wo -bha 'se -kɔɔnme waa- Izlaelö -següme -nu -an -dhë. ¹⁶Ma gia-, 'yënnghodhe -nu 'ö dho bɔ -an 'gü n 'tɔ -wun 'gü bhë, a -dho -an -wun -blee' -a -dhë, 'ö -an dɔ.»

¹⁷=Dhe -ya kë 'pö 'ö Ananiasö -yö dho. 'Yö dho 'ö -lo 'kɔ bhë -a 'gü, 'yö ö -kɔ kpa Sölö -ta 'ö- pö -a -dhë: «Sölö, n dheglu, kwa Dëme Yesu 'ö ö -de -zɔn ü -dhë zian -gblooga 'ü nuë bhë -a -ta bhë, yö =ne 'ö n bɔ ü 'piö kö 'üen- -dhe yö 'zü -dëüwo, 'go mü kö 'ü pa -Zuu 'slööslö 'ka.»

¹⁸-Dhe do bhë =ne 'wo to -a -bha, 'ö pë -nu 'ö 'wo -kë =ne 'yuö- -kia' -nu 'dhö 'ö 'wo go Sölö 'yënnghö, 'wo -lo sia-; 'ö -dhe yö 'zü 'ö 'wo- -bɔ yiö Yesu 'tɔ 'ka. ¹⁹=Dhe -ya kë 'pö 'ö pë -bhö, 'ö -faan' sü 'zü -dëüwo.

Sölö -bha Yesu -wun -blee Damasö plöö -sü

Waa- Yesu -wun -dhe 'wun gia- -me -nu -wo -dhekpaaɣi kpö -kë wo 'ko -bhaa Damasö mü. ²⁰Sölö -yö -to -dhe bhë -a 'gü, 'ö yö -Zlan -wo -blee' -sü 'gü Zuifö -nu -bha -bhɔküékɔ -nu 'gü, -a pö -sü 'ka =ne Yesu -yö -Zlan Gbö 'ka. ²¹Me -nu 'saadhö 'wo- -wo bhë 'wo- ma, 'tetundhe -yö -da -an 'gü, 'wo- pö: «Gɔɔn- =ne yö kun 'ö -kë me -nu 'wo Yesu 'piö -an zë -sü 'gü Zeluzalemë =ne =a? Yaa nu zö -yaan -an 'kun -yaan 'dho -an 'ka slabhome -gɔme -nu -dhia =a?»

²²'Kee Sölö -yö -Zlan -wo -blee -kplawo 'piigbeedhe 'ka. =Dhe 'ö =yaa- -zɔn Zuifö -nu 'wo -kë Damasö -an -dhë =ne Yesu -yö -Zlan -bha -Yame 'ka, 'ö pë 'wo dho -a kë waa- dɔ wo -de -gɔ.

²³=Dhe 'ö -dhekpaaɣi kpö 'bhle =ya ziö, 'ö Zuifö -nu -wo dho wo 'ko -bhaa, 'ö -an -wo -yö -kë -a 'gü do kö 'wo Sölö zë. ²⁴'Ö 'wo wo 'yan to böü- 'kplong 'dhi -nu 'ö me -nu -wo -da -a 'ka plöö bhë -a -bha, lënnng -nu, gbang -nu 'plë 'ka kö -ya kë =ne =wa Sölö yö kö -yö bɔ -na -a 'ka, -waan 'kun -waan zë. 'Kee me 'bhaa -nu -wo Sölö -zo -büö Zuifö -nu -bha 'slë 'wo- -kan -a -gɔ bhë -a 'ka.

²⁵=Dhe =ya kë 'pö, Sölö waa- ö -bha =guë' -nu -wo -da böü- 'kplong 'ö -nië pö- -zü bhë -a tuö gbang, 'wo Sölö -da -kpasen 'gü, 'wo- =yɔɔ -a -zlöö -zian' 'Ö Sölö -yö dho.

Sölö -yö -dho Zeluzalemë plöö

²⁶=Dhe Sölö =ya -lo Zeluzalemë, =ya këdhe -më kö 'yaan- 'dho Yesu -wun -dhe 'wun gia- -me -nu 'piö, 'kee 'suö -yö -kë Yesu -wun -dhe 'wun gia- -me -nu 'wo bhë -an 'gü, bhii 'ö tɔɔ Sölö -bha -kë Yesu -bha =guë' 'ka -sü bhë waa- -wun -dhe 'wun gia-. ²⁷'Ö Baanabasö -ya sü 'ö wo -nu 'wo dho Yesu -bha bɔme -nu 'piö, 'yö -kɔ 'ö Sölö -yö kwa Dëme yöë Damasö -kpinngga 'piö waa- -kɔ 'ö kwa Dëme -yö 'wun =blee -a 'ka -a -dhë bhë 'ö Baanabasö -ya 'plë =blee -an -dhë. 'Ö ko 'zü, -kɔ 'ö Sölö -yö 'wun =blee -a 'ka, -zo -gban -sü 'ka, Yesu 'tɔ 'ka Damasö -me -nu -dhë bhë 'ö -blee 'zü -an -dhë.

28 'Yö sü -a yi ö 'dhö bhë -a -bha, Sölö -yö -kë -an 'piö zlöö -kplawo, 'wun 'saadhö 'ple 'gü -Zlan -wo -blæ' -sü 'ka kwa Dëme 'tö 'gü -zogbandhe 'ka Zeluzalemë plöö. 29 Waa- Zuifö -nu mæ 'wo Glekö -wo ma, -wo zaodhe -kë wo 'ko 'ka 'siösiö, 'kæ wo -zë -wo -kë -a 'piö kö 'wo- zë.

30 -Dhe 'ö- dhegluzë -nu =waa- zë -wun ma, 'wo dho -a 'ka Sezale -pö 'gü 'wo- bə 'ö dho Taasö plöö.

31 -Zuöyagluu -yö -kë Yesu -wun -dhe 'wun gia- -mæ -nu -dho 'kuë- -sü 'wo Zude -dhe -nu, Galile -dhe -nu, Samali -dhe -nu 'gü -an -gɔ. -Faan' -yö -kë -an -gɔ, 'wo wo -bha -tosiadhe -kë kwa Dëme -bhlë -ya -sü 'ka, kö -Zlan -bha mæ -nu -wo kë -na =va, 'ö dhoë 'dhiö, -Zuu 'slööslö -bha -nu -an -dhë -sü 'ka.

Ene -dhe bo -sü

32 Pieë -yö -kë =nië' -dhia, 'sɛ bhë -a -dhe 'saadhö 'gü. Yi do 'ka -yö -dho Yesu -wun -dhe 'wun gia- -mæ -nu 'wo Lida plöö -an 'piö.

33 'Ö gɔɔn- do 'wo- -dhe Ene 'ö 'tinnɔ =yua' -ya -kë 'ö- -kwɛ =ya kë 'slɛaga bhë 'ö- yö kö -yö =waannu -sü 'ka =gba -ta. 34 'Ö Pieë -ya pö -a -dhë: «Ene, Yesu Klito =ya ü -dhe bo. -Bhö =luu', 'ü ü -bha =gba 'dho 'kuë- dhö!»

-Dhe do bhë -a 'gü 'ö Ene -yö =luu -a -bha. 35 'Ö mæ -nu 'saadhö 'wo -kë Lida -pö waa- Salɔn -sɛ 'gü, 'wo- yö 'wo wo =zuö' -dhië kwa Dëme 'piö 'wo Yesu -wun -dhe 'wun gia-.

Dɔɔkasö -bho ga 'gü -sü

36 Yesu -wun -dhe 'wun gia- -dhe do 'wo- -dhe Tabita 'ö Glekö -mæ -nu -wa -dhe wo -wo 'gü «Dɔɔkasö» -a -gen 'ö tɔɔ «-zloo» -yö -kë Zope -pö 'gü. -Yö 'wun -së -kë mæ -nu -dhë =va, 'go mü -yö -nu 'fɛɛmɛ -nu -dhë. 37 'Ö 'töng gia- bhë -a 'ka, 'ö dho -a 'ka sia- 'yua 'ka; 'ö ga.

-Dhe =wa yën -a =glöö 'zlu -sü -bha, 'wo- -da 'kɔdhi do 'ö 'kɔ -ta dhuö bhë -a 'gü. 38 Yesu -wun -dhe 'wun gia- -mæ -nu 'wo -kë Zope, -wa -ma =nɛ Pieë -yö Lida -dhe 'ö Zope -dhe 'sɔɔ mü bhë -a 'gü, 'wo mæ =plɛ bɔ 'ma -naɔ -dɔ -an -gɔ -sü 'ka kö -wa pö Pieë -dhë -nɛɛ: «Yi -bheä ü -dhë, kö 'ü nu yi -gɔ plöö 'nö 'zodhö; kö =kun 'ü =glɔɔ 'ma!»

39 Pieë -yö -to mü 'yö -ziö -an 'piö 'wo dho. =Dhe 'ö =wa 'dho =wa -lo, 'wo dho -a 'ka 'kɔdhi 'ö dɔ 'kɔ -ta dhuö bhë -a 'gü. =Geandhoo -nu -wo =yɔɔn Pieë -bha 'ö 'wo sɔ 'në -nu, sɔ -ta dhuö -sɔ -nu 'ö Dɔɔkasö -yö -an -wɔ 'ö -an nu -an -dhë kö -yö =tun 'bhee- =kun bhë -a -zɔn -a -dhë 'gbo bɔ -sü 'ka. 40 'Yö Pieë -yö mæ 'plɛ -yö plaan. 'Ö -lo 'ö kpɔn 'gü, 'ö =bheä -Zlan -dhë. 'Go mü 'ö =dhië =glöö =kpëü 'piö =zian' 'ö- pö: «Tabita, -bhö =luu'!»

'Yö 'ö 'yan -po. =Dhe 'ö =ya Pieë yö, 'ö -ya 'ö -gɛan. 41 'Ö Pieë -yö 'ö -kɔ -da -a 'gü 'ö- =luu. 'Ö =geandhoo -nu waa- Yesu -wun -dhe 'wun gia- -mæ -nu 'wo to bhë, 'ö -an =dhɔɔ -kë 'kɔ 'ö bhë -a 'gü, 'ö dhebɔ 'ö ga bhë 'ö- -zɔn -an -dhë kö =yö 'bhee-.

⁴²'Wun 'ö bhë -wa -ma Zope -pö 'plë 'gü, 'ö medhevadhe -wo kwa Dëme Yesu -wun -dhe 'wun gia-. ⁴³-Dhe -kë 'dhö, Pieë -yö -gɔɔ Zope plöö, wü kwi -yuökëme do 'wo- -dhe Simɔ bhë -a -gɔ kɔɔ.

Pieë waa- Kɔɔnɛ

10 ¹Gɔɔn- do -yö -kë Sezale -pö 'gü, 'wo- -dhe Kɔɔnɛ. -Yö -kë Wɔɔmë 'dhasi -këng' do -gɔmë 'ka, 'dhasi kpö -nu 'wo- -dhe Itali 'dhasi kpö bhë -a 'gü. ²Gɔɔn- 'ö bhë waa- ö -bha 'kɔɔmë -nu -wo -kë -Zlan gbame 'ö 'wo -Zlan -bhlë -ya -an 'ka; -yö -nu Zuifö -nu 'wo 'fëzë 'se 'ö bhë -a 'gü -an -dhë, 'ö -bheä -Zlan -dhë -dhekpaɔyi 'saadhö 'ka.

³Yi do 'ka bhë -dhe 'kwa dɔ 'wɔ 'ye -lan 'ka, 'ö 'yanpiöpë do yö. 'Ö 'yanpiöpë bhë -a 'gü, 'ö -kpën -Zlan -bha bɔmë do ö -da -a 'piö kɔɔ -a -bha. 'Ö -Zlan -bha bɔmë bhë 'ö yö -a 'tɔ -bha, 'ö- pö: «Kɔɔnɛ!»

⁴'Ö Kɔɔnɛ -ya -ga -piindhö, 'ö 'siö -yö -kan -a 'gluu, 'ö- pö: «Ü- -pö -dheɛ, n Dëme?»

'Ö -Zlan -bha bɔmë -ya pö -a -dhë: «-Zlan -ya ü -bha -bheä' -wo ma, -a -zuö' 'glu -ya -dhi ü -bha -nu 'fëemë -nu -dhë -sü -wun 'gü, 'ö ko 'zü, 'ö- -zuö' -ya nu ü 'piö. ⁵-Dhe -ya kë 'dhö 'sabra, -bhö mɛ -nu bɔ Zope -pö 'gü kö -waan pö gɔɔn- do 'wo- -dhe Simɔ 'wo- 'tɔ kpɔ Pieë 'ka bhë -a -dhë kö -yö nu. ⁶-Yö wü kwi -yuökëme 'wo- -dhe Simɔ 'ö- -bha 'kɔ -yö dɔ 'yoo 'sɔɔ bhë -a -gɔ kɔɔ.»

⁷-Dhe -Zlan -bha bɔmë 'ö 'wun -blëɛ -a -dhë bhë -ya ziö, 'ö Kɔɔnɛ -yö ö -bha yuökëme -nu 'wo- -gɔ kɔɔ bhë -an -plë waa- ö -bha 'dhasi -nu 'wo bhë -a mɛ do 'ö -Zlan -bhlë -ya -an -dhɔɔ -kë. ⁸'Ö 'wun -nu 'wo -kë 'töüdhö bhë 'ö- -blëɛ -an -dhë. -Dhe -ya kë 'pö, 'ö -an bɔ Zope.

⁹-A -dhe mɛ 'ö -po -a 'piö kö -wa -da zian -ta, -wo -yɔɔn -na Zope -dhe 'sɔɔ, lënnngüidhe -tei' 'ka, 'ö Pieë 'ö to plöö bhë, 'yö -da 'kɔ -ta dhuö kö -yaan -bheä', (bhii 'ö tɔɔ 'kɔ 'ö bhë -a -ta dhuö -dhe -yö -kë 'gbegbe -së 'ka).

¹⁰Din -ya -kun, -dhe do bhë -a 'gü. Mɛ -nu 'ö -kë -an -gɔ kɔɔ bhë -wo -kë -a -bha -bhöpë -yuö kë -sü 'gü, 'yö 'yanpiöpë do -yö. ¹¹'Ö dhang- yö kö -a 'dhi -ya 'po, kö pë do 'bhaa -yö 'go -na dhang- 'gü -yö -yɔɔ' -na. Pë bhë -yö -kë -nɛ sɔ -va -suu' -do 'bhaa 'ö- 'to 'dhiö -dhe -yiisië 'dhö mɛ kwɛɛ -a 'dhö, -yö -yɔɔ sia- 'sengdhö. ¹²'Ö pë bhë -a 'gü, wü -suu' -oo -suu' -ö 'wo -kë -soo -ta -wü -nu, -gblëë 'gu -ta -wü -nu, waa- -ma -nu -suu' -'kpekpe 'ka -wo -kë mü. ¹³'Ö -wo do -yö -we 'ö- pö -a -dhë: «Pieë, -bhö -luu', 'ü -an zë, 'ü -an -bhö!»

¹⁴'Yö Pieë -ya pö: «-Abi', n Dëme, pë 'ö yië- tɔng -ya pö kö -kun 'yi- -bhö bhë, n 'ka- -bhö do -kun.»

¹⁵'Ö -wo do bhë 'ö- pö -a -dhë 'zü: «Pë mɛ 'ö -Zlan -ya pö -yö -së kö -wa -bhö, kö -kun 'ü- pö 'yaa -së kö -wa -bhö!» ¹⁶-Yö -kë 'dhö -gwaa -yaaga, 'ö pë -nu 'wo bhë 'wo -luu, 'wo dho dhang- 'gü 'zü.

¹⁷Pieë -yö -kë ö -de -dheɛ' 'kpɔ -dhiadhö 'yanpiöpë 'ö- yö bhë -a -gen -wun 'gü. 'Kɛɛ -a 'tɔng gia- bhë -a 'ka kö Kɔɔnɛ -bha bɔmë -nu -wa -lo

plöö, -wo Simɔ -bha 'kɔ =dھے' 'kpɔ -na mɛ -nu -gɔ. 'Wo dho 'wo -lo Simɔ -gɔ 'kɔ 'dhiö. ¹⁸'Wo 'kodème -dhɔɔ -kè, 'ö 'wo =dھےkpɔdhe -kè -a -gɔ =nɛɛ: «Simɔ 'wo- 'tɔ kpɔ Pɪɛ 'ka bhè -yö zö -a?»

¹⁹Pɪɛ -yö -kè ö -zo 'ta =dhia -kplawo, 'yanpiöpè 'ö- yö bhè -a -wun 'gü, 'ö to mü 'ö -Zuu 'slööslo -ya pö -a -dhè: «Dɔ, gɔɔn- -nu -yaaga -wo ü =mɛɛ' -na. ²⁰-Bhö 'go 'kɔ -ta dhuö, 'ü yö sia-, 'ü ziö -an 'piö, kö =kun ü =zuö' -yö to zlöö, bhii 'ö tɔɔ ma =nɛ 'a -an bɔ!»

²¹=Dhe =ya kè 'dhö, 'ö Pɪɛ -yö =yɔɔ, 'ö dho mɛ -nu 'wo bhè -an 'piö. 'Ö- pö -an -dhè: «Me 'ka- =mɛɛ' -na bhè 'ö tɔɔ ma. -Mè 'ö -kè -ɛ?»

²²'Ö 'wo- pö -a -dhè: «-Glukɔɔnmɛ Kɔɔnɛɛ =nɛ 'ö yi bɔ. -Yö gɔɔn- 'kpèdhö 'ö -Zlan =bhlè -ya -a 'ka. 'Go mü 'ö Zuifö -nu 'plɛ 'wo- -bha -tɔmɔdhe -sè -kè. -Zlan -bha bɔmɛ do -ya -pö -a -dhè -ya pö ü -dhè 'ü nu -a -gɔ kɔɔ kö 'yaan- ö 'to 'to 'wun 'ü dho -a =blɛɛ' -a -bha!»

²³'Ö Pɪɛ -yö -an -da kɔɔ 'ö -an gbaa wɔdhe 'ka, 'wo -wɔ mü.

=Dhe 'ö -dhe =ya 'po 'ö waa- Pɪɛ -nu 'wo -da zian -ta. 'Ö dhegluzè 'bhaa -nu 'wo go Zope mü, 'wo dho dɔ -an -gɔ =dhia. ²⁴-A -ta -dhe mɛ 'ö =kpaɔ -a 'piö, 'wo -lo Sezale -pö 'gü. Kɔɔnɛɛ waa- ö dheglu -nu 'iin ö 'bhame -nu kpinngdhö 'yö -an =dhɔɔ -kè bhè wo 'plɛ -wo -kè -ya Pɪɛ -gɔ =dhia.

²⁵=Dhe 'ö Pɪɛ 'dhö -da -na kɔɔ, Kɔɔnɛɛ -yö -dho -a -gɔ zian, 'yö yö ö kpon 'gü -a 'dhiö -a =bhlè -ya -sü 'ka. ²⁶'Ö Pɪɛ -ya -luu -a -pö -a -dhè -sü 'ka =nɛɛ: «-Bhö =luu-', bhii mɛ 'bhee- -mü n 'ka 'pö =nɛ ü 'dhö!»

²⁷=Dhe =ya kè 'dhö, 'ö yö 'wun -blɛɛ Kɔɔnɛɛ -dhè -sü 'gü, 'wo dho 'wo =daa' kɔɔ, 'ö- 'yan -yö -da mɛ -nu =plèzè 'wo -kè wo 'ko =bhaa bhè -an -ta, ²⁸'ö- pö -an -dhè: «Ka gia- ka- =tei' -dɔ =nɛ Zuifö -nu -bha tɔng 'gü, waa- nia -nu 'waa kè wo 'kuè-, 'iin 'waa -da -an -gɔ kɔɔ. 'Kɛɛ -Zlan -ya -pö n -dhè =nɛɛ kö =kun 'a mɛ gbe sü mɛ yaa 'ka 'a -kan -a -bha. ²⁹'Ö tɔɔ 'wun 'ö -Zlan -ya -blɛɛ n -dhè -a -wun 'gü =nɛ, =dhe 'ö 'ka n =dhɔɔ -kè, n 'ka =dھے' gbe 'kpɔ, 'a nu. =Dhe -kè 'dhö =nɛ, =mè 'ö 'ka n -dhe -a 'ka ɛ?»

³⁰'Ö Kɔɔnɛɛ -ya pö: «-A -dhekpɔɔyi -yaaga 'ö =nɛ 'tɔng gia- =nɛ -a 'ka, a -kè n -gɔ kɔɔ 'wɔ 'yɛ -lan =bhea' -wo =dhia, 'ö to mü 'ö gɔɔn- do 'ö sɔ 'bhü -sü 'dhö -a -bha, 'yö -wo n 'dhiö mü, ³¹'ö- pö n -dhè: «Kɔɔnɛɛ, -Zlan =ya ü -bha =bheawo ma, 'ö ü -bha nu 'ü- wo -na 'fɛɛmɛ -nu -dhè bhè, =yaa- yö 'pö. ³²=Dhe =ya kè 'dhö, -bhö mɛ bɔ Zope kö mɛ 'wo- -dhe Simɔ 'wo- 'tɔ kpɔ Pɪɛ 'ka bhè kö -yö nu. -Yö Simɔ mɛ 'ö -kè wü kwi -yuökème 'ka, 'ö- -bha 'kɔ dɔ 'yoo 'dhiö bhè -a -gɔ kɔɔ!» ³³Pè -kè 'a mɛ bɔ vɛɛdhö ü 'piö, 'ö 'ü- -kè 'glusè 'gü 'ü nu bhè 'ö bhè. =Dhe =ya kè 'dhö, mɛ 'plɛ kwa -Zlan wö 'dhiö zö, yi 'to -yö ü -bha kö -wo 'ö kwa Dème =ya dɔ ü 'dhii kö 'ü- =blɛɛ' -yi -dhè.»

'Wun 'ö Pɪɛ -ya =blɛɛ Kɔɔnɛɛ -gɔ kɔɔ

³⁴'Ö Pɪɛ -yö 'wun =blɛɛ' -sü zü dɔ, 'ö- pö -an -dhè: «Ma- dɔ giagia 'ka zlöö =nɛ, -Zlan 'yaa mɛ gbe zè 'gü ö -bha 'wun -nu kè -sü 'gü. ³⁵Mɛ 'oo mɛ 'ö go 'se =suu' -'oo =suu' -ta 'ö =yaa- =bhlè -ya, 'go mü 'ö 'wun kpinngdhö

-nu kë -na bhë, -a -mε -yö -Zlan -dhë -së. ³⁶-Wo 'ö -Zlan -ya bɔ Izlaelö -següme -nu -dhë bhë 'ka- -dɔ. Yö =ne 'ö 'wuntaəsë 'ö -gban =zuöyagluu 'ö -Zlan -ya -kë yö -zë waa- mε 'bhee- -nu -an ziën, -bɔa Yesu Klito -ta -sü 'ka bhë 'ö- -blεε. Yesu Klito bhë -yö mε 'plε kwa Dëme 'ka. ³⁷Wun -gɔ -nu 'wo -kë -blεεzë 'ka Galile -se 'gü 'ö -kë 'zü Zude -se -dhe 'saadhö 'gü kö 'wun 'ö -gban -bɔyiödhe kë -sü 'ö Zan -ya =blεε -a -bha bhë ka- -dɔ. ³⁸Go mü 'zü -kɔ -Zlan -yö Yesu 'go Nazaletë süë 'ö- -kë kö -Zuu 'slööslö -yö -da -a 'gü 'ö 'piigbeedhe nu -a -dhë bhë, ka- -yö. 'Ö 'go mü 'zü, -kɔ 'ö Yesu -yö -nië -a 'ka kwaa- 'se -ta, 'wun -së kë -sü waa- mε -nu 'ö dü -bha -kɔ -mɔ 'wuën- sü 'dhö -an -ta, -an -dhe bo -sü 'ka bhë, 'ka- yö. 'Wun -nu 'wo bhë -a kë 'ö- wo 'dhö bhë 'ö tɔɔ -Zlan -yö -kë -a 'piö. ³⁹Pë -nu 'saadhö 'ö- -kë Zeluzalemë waa- Zuifö 'segɔ -nu mε 'wo to -an 'gü, yi- =goo- 'ka. Mε -nu -wo Yesu 'ö bhë -a -zë -a -dɔ -gaatalü -bha -sü 'ka. ⁴⁰Kεε -Zlan -ya -bho ga 'gü -a -dhekpacyi kë -yaaga -naa 'ka. 'Ö- -kë 'ö ö -de -zɔn =ne ö 'bhee- mε -nu -dhë. ⁴¹Mε -nu 'wo 'dhö bhë 'waa -mü 'següme -nu 'ka 'kεε mε -nu 'ö -Zlan -yö yi sü 'dhiö 'ö yi -ya kö 'yiën- kë -a -goo- 'ka -a yi 'ka bhë yö =ne 'ö ö -de -zɔn yi -dhë. 'Ö kö 'zü, -dhe 'ö -Zlan -ya bho ga 'gü, yi -bhöpë -nu -bhö, 'yi müpë -nu mü yi 'ko =bhaa. ⁴²'Ö Yesu -ya pö yi -dhë 'yi 'wuntaəsë =blεε' Zuifö -nu -dhë. 'Go mü 'yi- pö -an -dhë 'zü =nεε, yö =ne 'ö -Zlan -yö ö -ya kö 'yaan- mε 'bhee- -nu 'wo 'kpongtaa zö waa- -an mε -nu 'ö =wa ga -yaan -an -bha za 'kan. ⁴³Yesu 'ö bhë -Zlan -wodhiölome -nu 'plε -wo 'wun 'ö -gban -a -bha, 'wo- =blεε; 'wo- pö =nεε mε 'oo mε 'ö =yaa- -wun -dhe 'wun gia- -a 'tɔ -wun 'gü, -Zlan -yö -dho ziö -a -bha =sɔɔn yaa -nu -ta.»

Mε -nu 'ö 'waa Zuifö 'ka -an -bha -Zuu 'slööslö yö -kɔ

⁴⁴Piεε -yö -to 'wun =blεε' =dhia 'ö -Zuu 'slööslö -yö =yɔɔ mε 'saadhö 'wo -kë wo 'to -to -a -wo -bha =dhia bhë -an -ta. ⁴⁵Zuifö mε -nu 'wo Yesu -wun -dhe 'wun gia- -mε -nu 'ka 'ö waa- Piεε -nu 'wo nu bhë, -dhe 'wun 'ö bhë =waa- yö, 'yö 'tetundhe -yö -da -an 'gü -Zlan -bha ö -bha -Zuu 'slööslö nu 'ö- wo mε -nu 'ö 'waa Zuifö 'ka -an -dhë 'pö bhë -a -wun 'gü. ⁴⁶Bhii -wo -an -wo -ma kö -wo 'wun -nu =blεε' -na -wo 'waa gbe 'gü; 'go mü kö -wo -Zlan -bha -kë =va -sü 'tɔ -blü -na. =Dhe =ya -kë 'pö 'ö Piεε -ya pö: ⁴⁷«Mε -nu 'ö -Zuu 'slööslö =ya nu -an -ta =ne kwa 'dhö wo =ne, kwa 'ka 'dho we -an -bha -bɔ yiö -sü -wun -bha -a?»

⁴⁸=Dhe =ya kë 'pö, 'ö- pö -an -dhë -wo -an bɔ yiö Yesu Klito 'tɔ 'ka. 'Ö 'wo -an bɔ yiö. 'Ö mε -nu 'wo bhë 'wo- pö Piεε -dhë -yö -dhekpacyi 'bhe 'tee kë wo 'piö mü. 'Ö Piεε -yö -we -a -bha -an -gɔ.

Piεε -bha ö -bha 'ta 'sü -kɔ -wun -blεε Yesu -wun -dhe 'wun gia- -mε -nu 'wo Zeluzalemë -an -dhë -sü

11 ¹Yesu -bha bɔmε -nu waa- -wun -dhe 'wun gia- -mε -nu 'wo Zude -se 'gü, -wa -ma =ne mε -nu 'waa Zuifö 'ka -an mε 'bhaa -nu =wa

-Zlan -wo -dhe 'wun gia-. ²Dhe Pieε -ya 'ye ö 'zü -ya nu Zeluzalemë 'ö Zuifö -nu 'wo Klito -bha me -nu 'ka mü bhë, 'wo yö 'wun -bleε -a 'ka -sü 'gü, ³'wo- pö: «-Da 'ü- wo me -nu 'ö 'waa kwa -següme -nu 'ka -an -gö koo 'ö 'ka pë -bhö ka 'kuë- bhë, yaa yi -zo 'kun!»

⁴Yö 'wun -nu 'wo- -kë 'töüdhö bhë, Pieε -yö bō -a 'plε 'gü, 'yö- -bho 'kou -kë -an -dhë 'ö- pö: ⁵«A -kë Zope plöö, 'ö -dhe 'a -bhea' -na, 'a 'yanpiöpë yö; 'ö pë do 'bhaa 'ö -kë -ne sō -va 'ö- 'to 'dhiö -dhe -yiisië, -wo -kë me -nu kwεε 'ö go dhang- 'gü 'yö -yoo 'sengdhö 'ö nu n 'sō mü, 'a- yö. ⁶'Ö 'a -dhe -ga -a 'gü -së 'ka, 'ö n 'yan -yö -kpën -soo -ta -wü -nu, 'blü -wü -nu, -gblëë 'gu -ta -wü -nu, waa- -ma -nu -an -bha. ⁷Dhe -ya kë 'dhö, 'ö 'we -wo do -ya pö n -dhë: «-Bhö -luu', Pieε, 'ü -an zë, 'ü -an -bhö!» ⁸'Ö 'a- pö: «-Abi', n Dëme, bhii pë 'ö yië -tong -ya pö kö -kun 'yi- -bhö, n 'ka- -bhö do -kun.» ⁹'Ö 'we -wo do bhë 'yö bō dhang- 'gü 'zü, 'ö- pö n -dhë: «Pë me 'ö -Zlan -ya pö -yö -së kö -wa -bhö, kö -kun 'ü- pö 'yaa -së kö -wa -bhö!» ¹⁰-Yö -kë 'dhö -gwaa -yaagazë 'ö pë -nu 'wo bhë 'ö -an 'plε -wo -ye wo 'zü 'wo -da dhang- 'gü. ¹¹-A 'töng gia- bhë -a 'ka, 'ö me -yaaga 'wo -an bō n -dhë 'wo go Sezale bhë, 'wo nu 'kō 'a -kë -a 'gü bhë -a 'dhiö. ¹²'Ö -Zuu 'slööslö -ya pö n -dhë 'a ziö -an 'piö 'yi 'dho, kö -kun n -zuö' -yö to zlöö. Gōon- -nu 'slado 'ö yi -nu 'yi nu -ne, -wo -ziö n 'piö 'yi dho Sezale, 'ö me 'plε 'yi dho, 'yi -da Kōonεε -gō kō. ¹³'Ö -kō 'ö -Zlan -bha bōme yöë ö -gō kō bhë, 'ö- -bleε yi -dhë. -Zlan -bha bōme bhë -ya -pö -a -dhë: «-Bhö me bō Zope, Simō 'wo- 'to kō Pieε 'ka bhë -a -dhë, -yö nu; ¹⁴kō -wo -nu, 'ö bhi 'dhö, ü -bha 'kōme -nu 'dhö, 'ka dho bō -a -ta 'kaan- dha -ya -bleε' -ü -dhë!» ¹⁵-Dhe 'ö 'ma 'wun -bleε -sü zü dō, 'ö -Zuu 'slööslö -yö -yoo -an -ta -ne -kō 'ö -yoo -a 'ka kwa -ta 'dhiö bhë -a 'dhö. ¹⁶'Ö n -zo -yö -büö kwa Dëme -wo 'ö- pö -neε: «Zan -yö me -nu -bō yiö 'yi 'ka, 'kεε ka -zë, ka -dho pa -Zuu 'slööslö 'ka.» ¹⁷-Zlan -yö gbaō do 'ö bhë -a -kë -an -dhë -ne -kō do 'ö- -kaa' kwa -dhë kö 'kwa kwa Dëme Yesu -wun -dhe 'wun gia- bhë -a 'dhö 'pö. =Dhe -kë 'dhö, -më -mü n 'ka kö 'a dō -Zlan -bha pë -nu 'ö- 'piö kö 'ö- kë -an -gō -ε?»

¹⁸-Dhe 'ö- -wo -nu 'wo bhë -waa- ma, 'ö -dhe -yö ga -an -ta, 'wo yö -Zlan 'to 'blü -sü 'gü -neε: «-Zlan -ya 'we -a -bha, me -nu 'ö 'waa Zuifö 'ka -an -gō 'pö kö -wo wo -zuö' -dhië' ö 'piö kö -waan -kë -a 'gü -sü giagia yö.»

-Zlan -bha me -nu -dho 'kuë- -sü 'ö Antioṣö

¹⁹Klobhōdhe 'ö -kë 'töng 'wo Etienë zë -a 'ka bhë, -ya -kë 'ö Yesu -wun -dhe 'wun gia- -me -nu -wo -pen. 'Ö -an me 'bhaa -nu -wo -dho Fenisi -se 'gü, 'ö -an 'bhaa -nu -wo dho Siplë -se 'gü, 'ö -an 'bhaa -nu -wo -dho Antioṣö -pö 'gü, 'kεε Zuifö -nu -de 'sloo -ne 'wo Yesu -bha 'wuntaṣë -bleε -an -dhë. ²⁰-Dhe -ya kë 'dhö, Yesu -wun -dhe 'wun gia- -me do do -nu 'wo -kë Siplë -dhe waa- Silenë -dhe -an -bha, -wo -dho Antioṣö plöö, 'wo yö 'wuntaṣë 'ö -gban kwa Dëme Yesu -bha -a -bleε, me -nu 'ö 'waa Zuifö 'ka bhë -an -dhë -sü -bha 'pö. ²¹Kwa Dëme -bha 'piigbeedhe -yö -kë -an 'piö,

ö medhevadhe -wo Yesu -wun -dhe 'wun gia-, 'ö 'wo wo =zuö' =dhië kwa Dëme 'piö.

²²Dhe 'ö -Zlan -bha me -nu -dho 'kuë- -sü 'ö Zeluzalemë -ya 'wun -tao 'ö bhë -a ma, 'wo Baanabasö bɔ Antiosö.

²³Dhe =ya 'dho =ya -lo, -kɔ 'ö -Zlan -yö 'glusë =kaa' Yesu -wun -dhe 'wun gia- -më -nu 'wo mü -an 'ka bhë -ya -yö. 'Ö- =zuö' 'glu -yö -dhi; 'yö -an -faan' më kö -wo wo -zo kë wo -de 'piö kwa Dëme -bha zian -ta -a -wun -kun 'gbee- -sü 'ka wo =zuö' 'plë 'ka. ²⁴Baanabasö -yö -kë më këwunsëzë 'ö pa -sü 'ka -Zuu 'slööslö waa- -zo -yö -Zlan -bha -sü 'ka -a 'ka. 'Ö medhevadhe -wo wo =zuö' =dhië kwa Dëme 'piö.

²⁵Dhe =ya kë 'dhö, Baanabasö -yö -dho Taasö plöo kö -yaan Sölö =më'-
²⁶Dhe 'ö =yaa- yö 'ö nu -a 'ka Antiosö. 'Ö -dhe 'wo- -bha =plë waa- Yesu -wun -dhe 'wun gia- -më -nu 'wo Antiosö plöo, -wo -kwe do -kë wo 'ko =bhaa mü. 'Ö Baanabasö waa- Sölö 'wo medhevadhe =daan 'wun -nu 'wo -gban -zo -yö -Zlan -bha -sü -nu -bha -an 'ka. Antiosö -dhe bhë =ne 'ö 'wo Yesu -wun -dhe 'wun gia- -më -nu -dhe -a -bha «Kletien» (-a -gen 'ö tɔɔ «-to Klito 'piö -më -nu»). Kletien -tɔ 'ö bhë, -dhe 'ö Antiosö 'wo- kpɔ -a -bha -bleezë.

²⁷-A 'töng 'ö bhë -a 'ka, -Zlan -wodhiölome -nu -wo -go Zeluzalemë 'wo nu Antiosö. ²⁸Më do -yö -kë -an ziën 'wo- -dhe Agabusö; 'yö =luu 'ö 'wun =blëe -Zuu 'slööslö -bha 'piigbeedhe =kwaa' =ne yi do 'ka, din =va -yö -dho -da 'kpongtaadhe 'saadhö 'plë -bha. (Din 'ö 'dhö bhë -yö -da 'kpongtaa 'töng 'ö Klodö -yö =kaa' -gludë 'ka bhë -a 'ka). ²⁹'Ö Yesu -wun -dhe 'wun gia- -më -nu -wo -yö -kë -a 'gü do wo ziën, kö më 'ö -dhö, pë 'ö- -kɔ -yö -mɔa -bha -ya nu kö -waan nuë Yesu -wun -dhe 'wun gia- -më -nu 'wo Zude -se 'gü -an -dhia. ³⁰'Ö 'wo- -kë =ne -kɔ gia- bhë -a 'dhö, 'ö 'wo gbaɔ bhë 'wo- dɔ Baanabasö waa- Sölö -an -gɔ, 'wo dhoë më ziizii -nu 'wo Klito -bha më -nu 'wo Zude -se 'gü -an ziën bhë, -an -dhia.

Zakö zë -sü waa- Pieë -da -kanso 'gü -sü

12 ¹Töng 'dhö bhë -a 'ka, 'yö -gludë Elödö -yö Yesu -wun -dhe 'wun gia- -më -nu më 'bhaa -nu 'klo bho -sü zü dɔa. ²'Yö Zan dheglu Zakö -gɔ -kan. ³'Go mü -dhe 'ö =yaa- yö =ne Zakö zë -sü 'ö bhë -a -wun 'yi -yö -kan Zuifö -nu 'dhii, 'ö Pieë kun 'pö. (-Yö -kë Zuifö -nu -bha 'wlaan- 'ö 'wo- -dhe 'wlaan- 'wo =bluu'- 'ö- =bheepë 'yaa- 'piö 'wo- -bhö -na bhë -a 'töng 'ka.)

⁴=Dhe 'ö =wa Pieë 'kun, 'ö Elödö =yaa- -da -kanso 'gü, 'ö 'dhasi 'gɔɔ- do ö ga 'slado sü 'ö -an kpö dan -yiisië -yiisië 'ö 'wo wo 'ko -ta bho 'yan -to Pieë -bha -sü 'ka do do 'ka. Bhii Elödö -yö -mɔa 'gü kö =ya kë =ne Paakö 'wlaan- =ya zië kö -yaan 'dho -a 'ka 'següme -nu 'dhiö kö -wa zë -sü -za dɔ -a -bha. ⁵'Dhasi -nu -wo -kë wo 'yan -to Pieë -bha =dhia, -kanso 'kɔɔdhö, 'këe 'töng 'ö bhë -a 'ka, Yesu -wun -dhe 'wun gia- -më -nu kpö -wo -kë -bheä -Zlan -dhë -dhia =faan' 'ka Pieë -wun 'gü.

Piɛɛ -bha -go -kansa 'gü -ko

⁶Yi 'ö Elödö dho dhoë Piɛɛ 'ka 'següme -nu 'dhiö bhë -a gbang -yi bhë -a 'ka, Piɛɛ -yö -kë yi zë -dhia 'dhasi -nu -ple ziën. 'Dhasi -nu -ple 'wo bhë, me 'ö -dhö 'ö Piɛɛ -ko do -klu ö -bha -yɔɔga 'ka, 'ö- -bhüö' -klu ö -kwɛɛ' dho 'pö. 'Go mü 'dhasi 'bhaa -nu -wo -kë wo -do -dhe -bha -kansa 'kodhi me 'ö Piɛɛ -yö -kë -a 'gü bhë -a 'dhiö. ⁷Ö to mü, kwa Dëme -bha bɔme do -yö -gbëü, 'ö -dhepuudhe -yö bhü, -kansa 'kodhi bhë -a 'gü. 'Ö -Zlan -bha bɔme -yö pa Piɛɛ -bha -a gban -ta -ma -sü 'ka 'ö- pö -a -dhë: «-Bhö -luu' -siösiö!»

'Ö to mü, 'ö -yɔɔ' -nu -wo go -a -ko -bha. ⁸Ö -Zlan -bha bɔme -ya pö Piɛɛ -dhë 'zü: «-Bhö ü -bha -du kwi do ü -bha so -ta, 'go mü 'ü ü -bha -sakpa yö ü -gen -bha!»

'Ö Piɛɛ -ya -kë -ne -ko bhë -a 'dhö. 'Ö -Zlan -bha bɔme -ya pö -a -dhë 'zü: «-Bhö ü -bha gblang 'sü 'ü- -da ü -bha 'ü ziö n 'piö!»

⁹Yö Piɛɛ -yö -ziö -Zlan -bha bɔme bhë -a 'piö, 'wo goë -kansa 'kodhi bhë -a 'gü; -ya -pö -bezë -ne pë -nu 'wo kë -na 'töüdhö bhë 'yanpiöpë -mü. ¹⁰'Wo -ziö 'dhasi kpö -bleezë -ta, 'ö 'wo dho 'wo ziö -an me 'wo yö -an 'piö -an -ta, 'wo dho 'wo yö -piö kpong 'wo -kansa 'kodhi ta -na -a 'ka bhë -a -bha kö -waan yö plaan. 'Ö kpong 'ö bhë 'ö -po ö -deë' -an wö 'dhiö, 'ö 'wo yö plaan. =Dhe 'wo 'ta -na -kpinngga do 'piö, 'ö -Zlan -bha bɔme -yö to mü 'yö =dhong Piɛɛ -gɔ. 'Ö Piɛɛ -yö to ö -de 'sloo 'ka.

¹¹-Dhe =ya kë 'dhö, 'ö Piɛɛ -ya 'wun do =ne, pë 'ö -kë bhë 'yanpiöpë 'yaa -mü, 'kɛɛ 'wun giagia -mü, 'ö- pö: «Ma- dɔa 'sabla giagia 'ka -ne, n Dëme 'yö ö -bha bɔme bɔ kö -yaan n bho Elödö -bha -ko -mɔ 'wuën- waa- 'wun yaa 'ö Zuifö -nu 'wo- 'piö kö 'wo- kë n 'ka bhë -an kwɛɛ.»

¹²-Dhe 'ö =ya ö -de -kë -a 'gü -ko do 'ö dho Zan 'wo- 'tɔ kpɔ Maakö 'ka bhë -a dhe Mali -gɔ kɔɔ. Me -nu -wo -kë wo 'ko -bhaa mü =va 'ka -bheɛ -Zlan -dhë -dhia, -a -wun 'gü. ¹³-Dhe Piɛɛ =ya -lo, 'ö kpong -ta -ma; 'ö yuökédhe do 'wo- -dhe Lödö bhë, 'yö =yɔɔn kpong 'sɔɔ kö 'yaan- =dheɛ' 'kpɔ -ne dö 'ö kpong -ta -ma -ɛ? ¹⁴Ö Piɛɛ -wo do, 'ö- -bha -zuögludhi 'gü, kö -yö kpong 'po -zian' bhë 'ö -bla sü 'ö dho kɔɔ 'ö- pö me -nu 'wo -kë mü -an -dhë Piɛɛ -yö 'kodhi -bha. ¹⁵Ö 'wo- pö -a -dhë: «Blɔɔn- 'ö -da ü 'gü a? Piɛɛ -yö -kansa 'kɔɔdhö, yaa -mɔa -bha kö -yö nu 'kodhi zö!» 'Yö- pö -an -dhë -yɔɔn ö -wo -ta -sü 'ka -ne Piɛɛ -yö 'kɔ 'dhiö mü. =Dhe =ya kë 'dhö 'wo- pö: «-Zlan -bha bɔme 'ö bɔ Piɛɛ 'piö -kplawo bhë yö -mü.»

¹⁶-Dhe kë -na 'dhö kö Piɛɛ -yö kpong -ta -ma -na -kplawo. =Dhe 'ö =wa kpong 'po zlöö, 'ö -an 'yan -yö -da -a -ta, 'ö 'tetundhe =va -yö -da -an 'gü. ¹⁷Ö Piɛɛ -yö ö -ko -ta zë -an -dhë kö -waan wo 'dhi yö 'kuë-. 'Ö -ko 'ö kwa Dëme -ya bhoë -kansa 'kɔɔdhö bhë 'ö- =bleɛ -an -dhë 'zü kö 'wun bhë, -wa =bleɛ'- Zakö waa- Yesu -wun -dhe 'wun gia- -mɛ me -nu 'wo to -an -dhë. =Dhe =ya kë 'dhö, 'ö Piɛɛ -yö -ziö 'ö dho -dhe gbe 'gü.

¹⁸-Dhe 'ö- -dhe =ya 'po, 'suö =va -yö -da 'dhasi -nu 'wo -kë wo 'yan -to Piɛɛ -bha -dhia, -kansa 'kɔɔdhö bhë -an 'gü, 'wo yö wo -de =dheɛ' 'kpɔ -sü

'gü =ne Piεε -yö -bɔ 'më 'ö -duë =ε? ¹⁹Elɔdö -yö -ko 'zü 'ö Piεε =mεε, 'kεε yaa- yö. 'dhasi -nu 'wo wo 'yan to -a -bha bhë, 'ö -an -dhεε' kpɔ -a -wun 'ka. -Dhe 'ö -dhe 'ö Piεε 'dhö -a -bha waa- dɔ kpinngdhö, 'ö- pö 'dhasi gbε -nu -dhë -wo 'dhasi -nu 'wo bhë -an zë.

-Dhe =ya kē 'dhö, 'ö Elɔdö go Zude -se 'gü, 'ö dho Sezale plöö. -Dhe bhë -a 'gü 'ö 'töng 'dëdë -kë mü.

Elɔdö -bha ga -sü

²⁰-Naadhe -va -yö -kë Elɔdö 'gü, Tii -mε -nu waa- Sidɔn -mε -nu -an buëndhö. 'Ö me -nu 'wo bhë 'wo wo -wo kpɔ 'kuë- do kö 'waan- wo -de -zɔn Elɔdö 'dhiö, 'ö 'wo bɔ -gludë -bha 'yan -to -a -bha 'kɔ -bha -mε -nu -gɔmε 'wo- -dhe Blatusö -a -ta, 'wo dho -gludë Elɔdö 'piö, 'wo dhidhe -da wo -nu wo ziën. Bhii 'ö tɔɔ -an -bha 'següme -nu -bha -bhöpë -yö -go -gludë kwεε.

²¹-Dhe 'ö yi 'ö Elɔdö -ya kpɔ bhë =ya -lo, 'yö 'ö -bha -gludëdhe -sɔ -da 'ö -bha, 'ö dho 'ö -ya 'ö -bha 'gɔ -gbloo 'gü, 'ö yö 'wun =blεε' -sü -bha mε -nu 'plε wö 'dhiö mü. ²²'Ö 'següme -nu -wo -gbla 'gbee- 'ka =nεε: «Mε 'ö 'wun =blεε' -na bhë, mε 'bhee- 'yaa -mü, -zlan do 'bhaa -mü!»

²³'Kεε -dhe do bhë 'ö to -a -bha 'ö kwa Dëme -bha bɔmε do -ya -kë 'ö 'yua -yö Elɔdö kun, 'ö =bhüö' 'në -nu -wa -bhö 'ö ga. Bhii 'ö tɔɔ -yö 'tɔbhɔdhe -nu 'ö -de -dhë, 'yö 'ö -de sü -Zlan 'ka.

²⁴'Ö medhevadhe -wo -Zlan -wo ma, 'ö 'wo Yesu -wun -dhe 'wun gia-, 'wo dhoë 'dhiö.

²⁵-Dhe 'ö Baanabasö waa- Sɔlö =wa yën 'wun -nu 'ö 'wo -kë -a 'piö kö 'wo- kë bhë -a -yö 'ko 'dhiö kë -sü -bha Zeluzalemë, 'wo -yε wo 'zü 'wo dho Anticsö. 'Ö Zan 'wo- 'tɔ kpɔ Maakö 'ka bhë, 'wo- kpa wo -bha 'ö wo -nu 'wo dho.

Baanabasö waa- Sɔlö -an 'sü -sü

13 ¹-Zlan -wodhiölome -nu waa- Yesu -wun -dhe 'wun gia- -mε =daan' -mε -nu -wo -kë Yesu -wun -dhe 'wun gia- -mε -nu -dho 'kuë- -sü 'ö Anticsö plöö -a 'gü. Mε -nu 'wo bhë -an 'tɔ tɔɔ Baanabasö, Simɔ 'wo- 'tɔ kpɔ «mε tii» 'ka, Lusiusö 'ö go Silenë -se 'gü, Manæ 'ö -kë -gludë Elɔdö 'bhamε kpinngdhö 'wo =kpea wo 'kuë 'kɔ do 'gü -a 'ka, waa- Sɔlö 'dhö. ²Yi do 'ka, -wo -kë kwa Dëme -bha yuö kë -sü 'gü, kö -wo wo -ben 'to -na bhë, 'ö -Zuu 'slööslö -ya pö -an -dhë: «-Ka Baanabasö waa- Sɔlö -an -ya -de -ta kö yuö 'a -an -dhɔɔ =kaa' bhë -waan -a kë!»

³-Dhe =ya kē 'dhö, 'wo wo -ben to 'ö 'wo =bhεa, 'ö 'wo wo -kɔ -nu kpa -an -ta, 'dhuë- kpɔ -an -bha -sü 'ka, 'ö 'wo wo =kwaa -an -zü, 'wo dho.

Baanabasö waa- Sɔlö -wo -dho Siplë -se 'gü

⁴Baanabasö waa- Sɔlö 'ö -Zuu 'slööslö -yö -an bɔ bhë, -wo -dho Selösi plöö. -Dhe bhë =ne, 'wo -ya -a -bha 'yitagɔ 'gü, 'wo dho 'sεgɔ -dhe 'ö -ya -sü

'ka 'yi ziën 'wo- -dhe Siplë bhë -a 'gü. ⁵Dhe =wa 'dho =wa -lo Siplë, pö- do 'wo- -dhe Salaminö bhë -a 'gü, 'wo yö -Zlan -wo =blæ' -sü 'gü Zuifö -nu -bha -bhökuëkö -nu 'gü. Zan Maakö -yö -kë -an 'piö, -nu -an -dhë -sü 'ka.

⁶Segö 'ö -ya -sü 'ka 'yi ziën bhë 'wo bɔ -a 'gü, 'wo dho 'wo loë Pafɔsö plöö. -Dhe bhë -a 'gü 'wo -kpën Zuifö mi do 'wo- -dhe Baa Yesu 'ö -kë -debɔmɛ do 'ka -a -bha mü. Me 'ö bhë -yö ö -de -sü -Zlan -wodhiölome do 'ka. ⁷Go mü 'zü -yö -kë 'se =kɔɔnmɛ 'wo- -dhe Sɛziusö Pɔlusö bhë -a 'bhamɛ 'ka. 'Sɛ =kɔɔnmɛ bhë -yö -kë me 'kpaakpa 'ka; 'yö Baanabasö waa-Sölö 'ö -an =dhɔɔ -kë, bhii 'ö tɔɔ -ya 'piö kö 'ö -Zlan -wo ma. ⁸Kɛɛ -debɔmɛ ('wo- 'tɔ kpɔ Glékö -wo 'gü «Elimasö») bhë yaa 'we -a -bha -an -gɔ; 'ö-kédhe =mɛɛ kö 'yaan- 'se =kɔɔnmɛ =zuö' bho -zo -yö Yesu -bha -sü -zian -ta.

⁹=Dhe =ya kë 'dhö, 'ö Sölö 'wo- 'tɔ kpɔ 'pö Pölö 'ka bhë, 'ö -Zuu 'slöölö -ya pa, 'yö ö 'yan =dhië -a 'piö 'ö- -ga -piindhö, ¹⁰yö- pö -a -dhë: «'Yö Satan gbö, 'wun -sɛɛbɔ -nu yaagüme, 'ü pa -sü 'ka 'slë yaa =suu' -'kpekpɛ 'ka; këpëyaame -mü ü 'ka! Bhi kun 'ü- pö mɛ -nu -dhë =nɛ 'wun giagia 'ö -gban yi Dëme -bha -yö =sua 'ka a? ¹¹Dɔ, ü 'to 'to! -A 'töng =ya -lo kö yi Dëme -yö ü 'klo bhɔ; ü 'yënn- -dho trö, ü 'ka 'dho -dhe yö 'töng 'bhaa 'piö!»

-Dhe do bhë 'wo to -a -bha 'ö Elimasö 'yënn- -yö -trö; 'yö ö -de yö -dhetiidhe 'gü. 'Ö ö -kɔ -ta ö -zü 'to kö me 'ö dho zian bho ö 'ka 'yaan- -a yö.

¹²=Dhe pë -kë Elimasö 'ka bhë 'ö 'se =kɔɔnmɛ =yaa- yö, 'ö Yesu -wun -dhe 'wun gia-, 'ö kwa Dëme -bha mɛ =daan' -wo bhë 'ö- -wun -ya 'te tun.

Pölö waa- Baanabasö -an -bha -dho Anticsö -pö 'ö Pisidi -se 'gü bhë -a 'gü -sü

¹³Pölö waa- ö 'bhamɛ -nu -wo -da 'yitagɔ 'gü Paafɔsö plöö, 'wo dho Pɛɛzö -pö 'ö Panfili -se 'gü bhë -a 'gü; 'ö Zan Maakö -yö go -an 'piö 'ö -yɛ ö 'zü 'ö dho Zeluzalemë.

¹⁴'Ö 'wo dho wo -bha 'ta 'ka 'dhiö, 'wo go Pɛɛzö plöö, 'wo dho 'wo -lo Anticsö -pö 'ö Pisidi -se 'gü bhë -a 'gü. 'Ö Zuifö -nu -bha -glooyi 'ka, 'wo -da -an -bha -bhökuëkö 'gü 'wo =yaannu.

¹⁵=Dhe =wa yën -Zlan -bha tɔng -nu 'bhaa -nu waa- -Zlan -wodhiölome -nu -wo 'bhaa -nu pö -sü -bha -Zlan -bha 'sëédhe 'gü, 'ö -bhökuëkö =kɔɔnmɛ -nu -wa -dhe Pölö waa- Baanabasö -an -gɔ -a -pö -an -dhë -sü 'ka =nɛɛ: «Dhegluzë -nu, =ya kë =nɛ 'wun 'bhaa -yö ka -gɔ kö 'kaan- -a =blæ' -mɛ -nu 'wo dho wo 'kuë- =nɛ -an -dhë -an =faan' 'më -wo 'ka kö -potaasü -yö ka -gɔ 'sabl.»

¹⁶=Dhe 'ö -kë 'pö, 'ö Pölö -yö =luu 'ö ö -kɔ -ta zë -an -dhë, 'go mü 'ö- pö: «Izlaelö -mɛ -nu waa- mɛ -nu 'kaa Izlaelö -mɛ 'ka, 'ö 'ka -Zlan =bhlë -ya, -ka ka 'to 'to n -ma! ¹⁷Izlaelö -mɛ -nu, kwa -bha -Zlan -yö kwa 'bhema -nu -sü 'ö -an =bhɛɛ kö -wo =tun -nia 'ka Ezitö -se 'gü. 'Ö 'go mü 'zü 'yö -an bho Ezitö -se 'gü ö -bha 'piigbeedhe 'ka. ¹⁸'Yö -an bun 'töng 'ö -mɔ -kwe 'gɔɔ-

-yiisië -bha -an 'piö 'yënnng -taa. ¹⁹Yö Kanaa 'sego 'slaple 'gü -siö, -glu 'ö Izlaelö 'në -nu -wo nuë 'sego 'ö bhë -a -gɔ bhë -a 'ka. 'Ö -an -bha 'sego -nu 'wo bhë 'yö- nu kwa 'bhema -nu -dhë kö -waan kë mü. 'Ö 'wo -kwe -këng' -yiisië waa- -kwe 'gɔɔ- 'sɔɔdhu -kë -a 'gü mü.

²⁰Dhe =ya kë 'dhö, 'ö zakanme -nu -ya kwa 'bhema -nu -gɔ -ta, 'ö dho 'ö yöë -Zlan -wodhiölome Samielö -bha 'töng -bha. ²¹'Ö 'wo -gludë do -dhe Samielö -gɔ, 'ö -Zlan -yö Saulö 'ö -kë Kisö gbö 'ka 'ö go Benzame -gɔ 'gunng 'gü bhë -a nu -an -dhë. 'Ö Izlaelö -se =kɔɔn -kwe 'gɔɔ- -yiisië 'piö.

²²=Dhe 'ö -Zlan =ya ö =kwa' Saulö -wun -zü, 'ö ko 'zü 'yö Davidö nu -an -dhë -gludë 'ka. 'Ö -bha -tɔmɔdhe -kë 'ö- pö: *Zese gbö Davidö bhë, n =dhɔɔbhaa -me -mü. Yö =ne 'ö dho n =dhɔɔbhaa -wun 'plë kë.* ²³Davidö 'ö bhë -a =suu'- -ta 'në do =ne 'ö -Zlan -ya -ya Izlaelö -següme -nu Dhame 'ka =ne -kɔ 'ö- pöë bhë -a 'dhö. Medhame 'ö bhë 'ö tɔɔ Yesu. ²⁴Kö Yesu -yaan -tun nu -na, Zan -yö -Zlan -wo =bleë, 'ö Izlaelö -següme -nu =dhɔɔ -kë ö -wo 'ka =ne -wo wo =kwa' wo -bha =sɔɔn yaa -nu -zü kö -wo -an bɔ yiö. ²⁵=Dhe 'ö Zan -bha yi =ya yö =klöö' 'kpongtaa, 'yö- pö: «Ka -zo 'piö, dö -mü n 'ka ε? -Ka ka 'to 'to, 'maa me ö 'ka -ya -a -gɔ bhë -a 'ka; 'këë me 'ö bhë -yö nu -na n =zlöö. Me 'ö 'dhö bhë -a =bhlë =yö =va 'ö =zië' n -ta, 'ö n -kɔ yaa -mɔa -bha kö 'aan- -a -bha -sakpa yuun -bhüö -nu 'po 'aan- -a bho -a -gen -bha.»

²⁶'Ö Pieë -ya pö 'zü: «Dhegluzë -nu, ka 'ö 'ka -kë Ablaamö =suu'- -ta 'në -nu 'ka, waa- me -nu 'kaa Zuifö 'ka, 'ö 'ka -Zlan =bhlë -ya, kwa =ne 'ö 'wuntaɔsë 'ö -kë dha -sü 'ka bhë, 'ö yö kwa -bha. ²⁷Me -nu 'wo Zeluzalemë waa- -an =kɔɔnme -nu waa Yesu dɔ wo Dhame 'ka; 'ö 'go mü -Zlan -wodhiölome -nu -wo 'wo- pö -na =glooyi 'saadhö 'ka bhë, waa- -gen ma. 'Këë pë 'ö -Zlan -wodhiölome -nu -wa =bleë 'ö -kë -a zë -sü -wun 'ka bhë =ne 'wo- -kë. ²⁸-A zë -gen gbe yaa kë -dhö, 'këë -wa -dhe Pilatö -gɔ kö -ya zë. ²⁹Wun -nu 'wo =beën' -sü 'ka -Zlan -bha 'sëëdhe 'gü 'ö -gban Yesu -bha 'klobhɔdhe waa- -a -bha ga -sü -wun -bha, =dhe 'ö =wa -an 'plë 'dhiö -mɔ 'kuë, 'wo- bho -gaatalü -bha, 'ö 'wo- -da -guö =duudhö. ³⁰Këë -Zlan -ya -bho ga 'gü. ³¹'Ö -dhekpɔyɔ =plëëzë 'ka, 'yö ö -de -zɔn me -nu 'wo -kë -ziö -a 'piö -me -nu 'ka 'dhiö, 'wo goë Galile -se 'gü, 'wo dho 'wo yöë Zeluzalemë bhë -an -dhë. Me -nu 'wo 'dhö bhë, wo =ne 'ö zlöö =ne 'wo- =goo- 'ka kö -waan Yesu -wun =bleë'- Izlaelö -següme -nu -dhë. ³²'Ö yi gia-, 'yi nu 'wuntaɔsë 'ka ka 'piö. 'Wuntaɔsë bhë 'ö tɔɔ pë 'ö -Zlan -ya 'tɔ go kwa 'bhema -nu -dhë 'dhiö bhë. ³³-Yaa- kë kwa 'ö 'kwa -an -bha 'në -nu 'ka kwa -dhë, Yesu -bho ga 'gü -sü 'ka =ne -kɔ 'ö =beën' -sü 'ka 'tan =plë -naa 'ö 'Tan 'sëëdhe 'gü -a 'dhö =neë: (-Zlan -ya -pö Yesu -dhë:) *Û n Gbö 'ka. 'Ö n -ma -kë ü Dë 'ka -sü bhë -dëë 'a- =bleë me 'plë -dhë 'töüdhö -a -zɔn -an -dhë -sü 'ka =neë n Gbö -mü ü 'ka.* ³⁴'Ö -Zlan -ya pö =ne yö -dho -a bho ga 'gü; yö 'ka 'dho ga gbö. 'Yö- pö =neë: *A -dho 'dhuë- 'slööslo -nu 'ö 'a- 'tɔ go Davidö -dhë bhë -a kpɔ ka -bha. 'Dhuë- -nu 'wo bhë, a -dho -an kpɔ ka -bha 'wun gia- 'ka.* ³⁵Wun 'ö bhë -yö =beën' -sü 'ka -Zlan -bha 'sëëdhe -dhe 'bhaa 'gü 'pö, 'ö tɔɔ

me 'ö 'Tan 'sëedhe =been bhë -ya -pö -Zlan -dhë: *Û 'ka 'dho we -a -bha kö ü -bha yuökëme 'slööslö bun -yö 'bu.*

³⁶-Wo 'ö =ne yaa Davidö -bha 'wun =blee', 'këe Davidö -zë, yuö 'ö -Zlan -ya -ya -a -bha 'ka -ya -kë. 'Go mü 'yö ga, 'yö 'wo- -bin ö 'bhëma -nu 'piö, 'ö- bun -yö -bu. ³⁷'Këe me 'ö -Zlan -ya bho ga 'gü bhë -a bun yaa 'bu. ³⁸N dhegluzë -nu, ka 'ple -kaa dca =nëe pë 'ö Yesu -ya -kë bhë -a -wun 'gü, yi -mca -bha kö 'yi- pö me -nu -dhë =dëe =ne -Zlan -yö -dho ziö -an -bha =söön yaa -nu -ta. ³⁹Moizö -bha tóng yaa 'dho ka kë kpengdhö -Zlan wö 'dhiö; 'këe 'ka Yesu -wun -dhe 'wun gia-, 'ka dho kë kpengdhö -a wö 'dhiö. ⁴⁰-A -wun 'gü, -ka kë 'slë 'ka! -Yö kë 'dhö kö -kun 'ö pë 'ö -Zlan -wodhiölome -nu -wa =blee bhë 'ö- -de dho kë ka 'ka: ⁴¹-Zlan -wodhiölome -nu -wa -pö: (-Zlan -ya pö:) *Më -nu 'ö 'ka 'wun gia- -san zë =ne, -ka -dhe -ga: 'Tetundhe -yö -dho -da ka 'gü, 'ka ga. Bhii ka -bha 'töng 'ka, a -dho yuö do 'ö =waa- -wun =blee' -ka -dhë, 'ö ka 'ka 'dho -a -dhe 'wun gia- bhë -a kë. »*

⁴²⁻⁴³=Dhe 'ö =wa yën -bho 'kuë- kë -sü -bha 'ö me -nu -wa pö Pölö waa- Baanabasö -an -dhë -wo nu 'zü =glooyi me 'ö nu -na bhë -a 'ka kö 'wun -nu 'wo bhë -waan -an 'bhaa =blee' -wo -dhë 'zü.

=Dhe 'ö Pölö waa- Baanabasö 'wo 'dho -na bhë 'ö Zuifö =plëezë waa- me -nu 'wo wo -de -kë Zuifö 'ka -nu 'wo -ziö -an 'piö. Pölö waa- Baanabasö -wo 'wun -blee -an -dhë -an =faan' 'më -sü 'ka kö -wo wo -bha -tosiadhe kë -Zlan -bha 'glusë 'gü kö -wo 'dhoë- 'dhiö.

⁴⁴Zuifö -nu -bha =glooyi me 'ö yö -a 'piö, 'ö me -nu -wo bho 'kuë- =va 'ö- -wun to 'tee kö pö- bhë -a 'gü -më -nu me gbe yaa 'to koo; -wo -nu wo 'ko -bhaa 'dhö kö -waan kwa Dëme -wo ma. ⁴⁵=Dhe Zuifö -nu =wa me gbung bhë -an yö, 'ö =druëi -yö -da -an 'gü 'ö 'wo- pö: «'Wun 'ö Pölö 'dhoë- =blee' -na bhë =sua -wun -mü.» 'Go mü 'zü 'wo 'wun yaa =blee -a -gö me -nu -dhë. ⁴⁶'Këe Pölö waa- Baanabasö -wo 'wun -blee Zuifö -nu -dhë -zogbandhe 'ka 'zü =nëe: «Pë me 'ö këpë 'ka 'ö töö kö -Zlan -wo -yö -dho -blee' -ka -bleezë ka -dhë. 'Këe =dhe -kë =ne kaa 'we -a -wun -dhe 'wun gia- -sü -bha, 'ö 'ka- zön -na =nëe yaa ka -ma 'kun kö 'ka =toëpö -kë -a 'gü -sü yö bhë. =Dhe -kë 'dhö bhë, yi -dho ziö 'yi dho me -nu 'ö 'waa Zuifö 'ka -an 'piö. ⁴⁷Bhii pë 'ö kwa Dëme -ya pö yi -dhë 'ö töö: *A ü -ya 'següme -nu -bha -dhepuudhe 'ka. -Yö kë 'dhö kö 'ü 'dho dhasü 'ö bhë -a 'ka 'se -dhe -nu 'wo 'ma -gbiin -an 'gü. »*

⁴⁸=Dhe 'ö me -nu 'ö 'waa Zuifö 'ka, 'wo -an -wo bhë 'wo- ma, 'ö -an =zuö 'glu -yö dhi; 'ö 'wo- pö: «Kwa Dëme -wo 'ö bhë =yö -së!» 'Ö me -nu 'saadhö 'ö -Zlan -yö -an sü kö -waan =toëpö -kë -a 'gü -sü yö bhë, 'wo Yesu -wun -dhe 'wun gia-.

⁴⁹'Ö kwa Dëme -wo -yö -pen 'segö 'ö bhë -a -dhe 'saadhö 'gü. ⁵⁰'Këe me -nu 'wo Zuifö 'ka, -wo dhebo -nu =bhlëzë 'ö pö- bhë 'wo- 'gü 'ö -Zlan -dho -yö -an -kë, waa- pö- =koonme -wo -an 'zü -blü 'ö 'wo- -kë kö me -nu -wo Pölö waa- Baanabasö -an 'klo bho; 'ö 'wo -an -kë, 'wo go 'se -ta. ⁵¹'Ö me =ple 'wo bhë 'wo 'se 'ö go pö- 'ö bhë -a 'gü, 'wo- bho wo -gen -bha, -a -zön

pöme -nu 'wo bhë -an -dhë -sü 'ka -ne pë -nu 'wo- -kë bhë wo -ne 'ö -an -bha 'wun 'dhö -mü. 'Ö 'wo dho Ikönë -pö 'gü.

⁵²Yesu -wun -dhe 'wun gia- -me -nu 'wo Antiosö, -wo -kë pa -sü 'ka -zuögludhi waa- -Zuu 'slööslö 'ka.

Pölö waa- Baanabasö -wo Ikönë

14 ¹Dhe Pölö waa- Baanabasö -wa -lo Ikönë plöö, 'wo -da Zuifö -nu -bha -bhokuëkö 'gü 'zü, 'ö 'wo Yesu -bha 'wuntaösä -blëe me -nu 'wo -kë mü -an -dhë. 'Ö Zuifö -nu waa- me -nu 'ö 'waa Zuifö 'ka -an -dhe -va -dhe -wo -kë Yesu -wun -dhe 'wun gia- -me -nu 'ka. ²Këe Zuifö 'bhaa -nu waa 'we- -bha kö -wo Yesu -wun -dhe 'wun gia-, 'ö 'wo- pö me 'waa Zuifö 'ka -an -dhë -wo do Yesu -wun -dhe 'wun gia- -me -nu -go 'yënnng. ³Këe Pölö waa- Baanabasö -wo -glöw Ikönë plöö, 'wo 'wun 'ö -gban 'wuntaösä 'ö -gban Yesu -bha 'wo kë -a -blëe' -dhia -zogbandhe 'ka. Kwa Dëme -ya -zön -an -dhë me -nu wö 'dhiö -ne 'wun -nu 'ö -gban ö -bha 'glusë -wun -bha 'wo- -blëe' -na bhë 'wun gia- -mü, 'ö -kö -mö 'wun -bha -sü nu -an -dhë kö -waan -dhidhaapë -nu kë -a 'ka.

⁴'Ö 'gügludhe -yö -da pöme -nu ziën, 'ö me -kö 'pian do -yö -kë Zuifö -nu -bha 'ka, 'ö me -kö 'pian do 'bhaa -yö -kë Yesu -bha böme -nu -bha 'ka. ⁵Zuifö -nu waa- me 'waa Zuifö 'ka waa- wo -köönme -nu -an -wo -yö -mö -a 'gü kö 'waan- Pölö waa- Baanabasö -an zë -an -zuö -guö 'ka -sü 'ka. ⁶Dhe 'ö me -plë 'wo bhë -waa- -tei' do 'wo -duë, 'wo dho Lekaöni -se 'gü, pödhe 'wo- -dhe Litrë waa- Dëebö, 'iin -an -zütodhe -nu -an -bha. ⁷'Ö 'wo yö 'wuntaösä -blëe' -sü 'gü mü.

Pölö waa- Baanabasö -wo Litrë plöö

⁸-Dhe 'ö Litrë bhë göön- do -yö -kë -yaannu -süë' mü, bhii 'ö töw 'tinng -yua' -yö -kë -a -gen 'gü, 'ö bhöa, ⁹-yö -kë ö 'to 'to -dhia 'wun 'ö Pölö -kë -a -blëe' -dhia bhë -a -bha. -Dhe 'ö Pölö -ya döa -ne -zo -yö Yesu -bha -sü -ya -go kö 'yaan- -a -dhe bo, 'yö- -ga -piindhö ¹⁰'ö- pö -a -dhë -wo 'gbee- 'ka -neë: «-Bhö -luu- 'ü do ü -gen -ta zengdhö!» 'Yö -luu 'budhö, 'ö yö 'ta -sü -bha.

¹¹-Dhe pë 'ö Pölö -ya -kë bhë me gbung -nu -waa- yö, 'wo -gbä wo -bha 'se 'gü -wo 'ö -kë Likaöni -wo 'ka bhë -a 'gü 'wo- pö: «-Zlan -nu -wa mebbeedhe bun 'sü, -wa go dhang- 'gü, -wa nu kwa 'piö!» ¹²'Ö 'wo Baanabasö 'to kpö wo -bha -zlan -bhlëzë 'wo- -dhe Zösö bhë -a 'ka. 'Wo Pölö 'to kpö 'pö wo -bha -zlan do 'bhaa 'wo- -dhe Eemesö bhë -a 'ka. Bhii 'ö töw me -plë 'wo nu bhë, Pölö -ne 'ö -kë 'wunblëeme 'ka -ne wo -bha -zlan Eemesö bhë -a 'dhö Zösö -wo 'dhiö -lo -sü 'ka. ¹³-An -bha -zlan 'wo- -dhe Zösö bhë -a -gba -a 'gü -kö -yö -kë -daplöödhe gia- -bha. 'Ö- slabhome -yö nu, -du -nu 'wo 'lü 'bin -bhüö' -kë 'wo- -nië -a bhö -zü -a 'ka, böü- 'kplong 'ö -nië pö- -zü bhë -a 'dhi do -bha. 'Ö Zösö -bha slabhome waa- me gbung -nu

'wo -kë mü, -wa -ya wo =zuö' 'piö kö -wo sla- bhoë Baanabasö waa- Pölö -an -dhë.

¹⁴'Këe -dhe 'wun bhë 'ö Baanabasö waa- Pölö =waa- -tei' dö, 'wo wo -bha gblang -dhe 'bhaa -nu =pëe, -a -zön me -nu -dhë -sü 'ka =ne waa 'we- -bha kö -wa kë 'dhö. 'Ö 'wo -bla sü 'wo dhoë me gbung -nu 'gü -a pö -sü 'ka =në: ¹⁵«Me 'ka =ne, -më 'ö -kë ka -gɔ 'ka 'wun -kë 'dhö e? Me 'bhee- -nu kwa =suu'- -yö do, -zlan 'yaa -mü yi 'ka! 'Wuntaasë 'ö -gban Yesu Klito -bha =ne 'yi nuë ka =dhia, -a -blëe ka -dhë -sü 'ka kö 'ka ka -kwa' gbpä 'kpaan -wun 'wo bhë -an -zü kö 'ka =dhië'- -Zlan 'ö 'bhee- 'ö dhang- 'dhö, 'së 'dhö, 'yoo 'dhö waa- -an 'gü -pë -nu 'plë -kë bhë -a 'piö kö 'kaan- -a gba! ¹⁶'Töng -nu 'wo -ziö bhë -a 'gü, -yö ö -kwa' me -nu -zü 'wo wo -zo 'kun -wun -nu -kë. ¹⁷'Këe -ya -zön ka -dhë -kplawo =ne ö -Zlan 'glusë -zë 'ka, pë -së -nu -kë ka -dhë -sü 'ka -kplawo. Bhii 'ö tɔɔ -yö ka -gba dha 'yi 'ka. 'Go mü 'zü 'ö- -kë 'ö kaa- tapë -nu -wo -dhi wo 'töng 'ka, 'ö ka gbaa -bhöpë -nu 'ka, 'go mü 'yö ka pa =zuögludhi 'ka.» ¹⁸'Këe -a =blëe' -sü 'ka =ne -kɔ gia- 'ö bhë -a 'dhö, Baanabasö waa- Pölö -an =sëë'- -yö -bho kö -kun me gbung -nu 'wo bhë 'wo dho sla- bhë -a bho wo -dhë.

¹⁹=Dhe 'ö -kë 'pö, Zuifö -nu 'bhaa -nu -wo -go Antioösö -dhe, 'ö Pisidi -se 'gü waa- Ikönë plöö 'wo nu, 'wo me gbung -nu 'wo bhë 'wo -an =zuö' bɔ wo 'piö. 'Wo yö Pölö -zuö -guö 'ka -sü 'gü, 'go mü 'wo- =gblëë, 'wo dhoë pö- -taa -bha, 'wo- to mü 'ö tɔɔ -wo wo -zo -ta -be =ne -ya ga. ²⁰'Këe -dhe Yesu -wun -dhe 'wun gia- -më -nu -wo -lo -a 'piö mü, 'ö =wa =nië' -a -zü, 'ö =luu, 'ö wo -nu 'wo -da plöö. =Dhe 'ö -dhe =ya 'po, 'ö waa- Baanabasö 'wo dho Dëebö -pö 'gü.

Pölö waa- Baanabasö -wo -yë 'zü 'wo dho Antioösö 'ö Sili -së 'gü -a 'gü

²¹Pölö waa- Baanabasö -wo Yesu -bha 'wuntaasë -blëe Dëebö plöö, 'ö 'wo- -kë 'ö medhevadhe -wo -kë Yesu -wun -dhe 'wun gia- -me -nu 'ka mü. 'Go mü 'wo -yë wo 'zü 'wo dho Litрэ -dhe, Ikönë -dhe waa- Antioösö 'ö Pisidi -së 'gü -an 'gü. ²²'Wo Yesu -wun -dhe 'wun gia- -më -nu =faan' më kö -wo kë =faanzë -zo -yö Yesu -bha -sü 'gü. 'Ö 'wo- pö -an -dhë: «Yesu -wun -dhe 'wun gia- -më -nu 'plë 'klo -dho bhɔ =va -an -bha -tosiadhe 'gü 'kpongtaa zö kö -waan -da -Zlan -bha -gludëdhe 'gü 'töng 'ö 'dhiö, 'ö nu -na bhë -a 'ka.»

²³'Ö 'wo me ziizii -ya Yesu -wun -dhe 'wun gia- -më -nu -dho 'kuë- -sü 'saadhö 'gü. 'Ö -dhe Pölö waa- Baanabasö =wa yën wo -ben 'to -sü waa- -bhea -Zlan -dhë -sü -bha, 'wo me -nu 'wo mü bhë, 'wo -an -wun -lo kwa Dëme 'wo- -wun -dhe 'wun gia- bhë -a kwëe.

²⁴'Ö 'wo bɔ Pisidi -së 'gü, 'wo dho Panfili -së 'gü. ²⁵'Wo -Zlan -wo =blëe me -nu 'wo Pëezö plöö -an -dhë. 'Go mü 'wo dho Atali plöö.

²⁶=Dhe =wa 'go mü, 'wo 'yitagɔ sü, 'wo dho Antioösö plöö, -dhe 'wo woë- 'ta zü dö -a -bha bhë -a -bha. =Dhe 'wo 'dhoë- dho 'ta 'gü, -dhe 'ö bhë =ne 'ö Yesu -wun -dhe 'wun gia- -më -nu 'wo mü, 'wo -an -wun -lo -a -bha -Zlan

kwæ kö -yaan ö -zo kë -an 'piö, kö yuö -nu 'wo 'dho -na -an kë -dhia bhë kö -waan -an kë.

²⁷Dhe =wa -lo Antiosö, 'wo Yesu -wun -dhe 'wun gia- -më -nu -dhe wo 'ko -bhaa, 'ö pë -nu 'ö -Zlan -ya kë 'saadhö wo -kwaä, waa- -kò 'ö 'kwæ -poë' më -nu 'waa Zuifö 'ka -an -gò kö -waan Yesu -wun -dhe 'wun gia- bhë 'wo- 'plë =blæ -an -dhë. ²⁸'Ö 'wo 'töng 'bhaa -kë Yesu -wun -dhe 'wun gia- -më -nu 'piö mü.

Yesu -wun -dhe 'wun gia- -më -nu kpö 'ö Zeluzalemë

15 ¹Më 'bhaa -nu -wo -go Zude -së 'gü 'wo nu Antiosö plöo, 'ö Yesu -wun -dhe 'wun gia- -më -nu 'wo -kë mü, 'wo yö -an =daan' -sü 'gü, 'wo- pö: «-A 'ke kaa 'dho 'böng =në -kò 'ö Moizö -yö -Zlan -bha töng =daan -a 'ka bhë -a 'dhö, kaa 'dho dha.» ²'Këe 'wun bhë yaa Pölö waa- Baanabasö -an -zo 'kun; 'ö wo -nu 'wo yö 'wun =blæ' -sü waa- zaadhe kë -sü -bha. 'Ö 'gbædhö 'wo- yö -së 'ka kö 'wo më 'bhaa -nu 'wo go Antiosö 'wo -an yö Pölö waa- Baanabasö -an 'piö, -wo 'dho Zeluzalemë kö 'wun 'ö bhë Yesu -bha bömë -nu 'wo -kë mü waa- më ziizii -nu -waan -a -bhokou kë wo 'ko -dhë.

³Yesu -wun -dhe 'wun gia- -më -nu kpö bhë, -wo -an -dò zian, 'ö 'wo dho. 'Wo bö Fenisi -dhe waa- Samali -së -an 'gü, -kò 'ö më -nu 'waa Zuifö 'ka 'wo wo =zuö' -dhië -a 'ka -Zlan 'piö bhë -a =blæ' -Yesu -wun -dhe 'wun gia- -më -nu 'wo -kë mü -an -dhë -sü 'ka. 'Wun 'ö bhë -yö -kë -an -dhë =zuögludhi -wun -va 'ka.

⁴Dhe 'ö =wa -lo Zeluzalemë plöo, Yesu -wun -dhe 'wun gia- -më -nu -dho 'kuë- -sü 'dhö, Yesu -bha bömë -nu waa- më ziizii -nu 'wo -kë mü, -wo -an -nia -kun. 'Ö wo -de 'pö, 'ö pë 'ö -Zlan -ya -kë -an -kwaä' wo -bha 'ta bhë -a 'gü bhë, 'wo- =blæ' 'pö -an -dhë. ⁵'Yö Falizi -më 'bhaa -nu 'wo -kë Yesu -wun -dhe 'wun gia- -më -nu 'ka bhë 'wo -luu, 'wo- pö: «-Kwaä pö Yesu -wun -dhe 'wun gia- -më -nu 'ö 'waa Zuifö 'ka bhë -an -dhë -wo 'dho 'böng, 'go mü -wo töng 'ö Moizö -ya nu kwa -dhë bhë -wa 'kun.»

⁶'Ö Yesu -bha bömë -nu waa- më ziizii -nu 'wo dho wo 'ko -bhaa kö 'waan- -dhe -ga 'wun 'ö bhë -a 'gü.

⁷Dhe 'ö =waa- dan 'kuë 'piö -gbiinzë, 'ö Piëe -yö -luu 'ö- pö: «Dhegluzë -nu, ka gia- ka- =dca' =në -Zlan -yö n -sü ka ziën -a -wo nu -sü -blæzë 'ka kö 'wuntaö së 'ö -gban Yesu -bha bhë 'aan- =blæ' -më -nu 'waa Zuifö 'ka -an -dhë; -yö kë 'dhö kö -waan -a ma, kö -waan -a -wun -dhe 'wun gia- .⁸'Ö -Zlan 'ö më 'bhee- -nu =zuö' dö bhë 'yö- -zön =në -yö -we -an -bha Yesu -wun -dhe 'wun gia- -sü -bha, -Zuu 'slööslö -nu -an -dhë -sü 'ka =në kwa 'dhö 'pö. ⁹Yaa më bho 'kou kë më 'kwa Zuifö 'ka waa- më 'waa Zuifö 'ka kwa ziën. 'Ö -an -bha Yesu -wun -dhe 'wun gia- -sü bhë -a -wun 'gü 'ö -ziö -an -bha =söön yaa -nu -ta, 'ö -an sü më kpengdhö 'ka ö wö 'dhiö.

¹⁰Dhe 'ö 'dhö, -më -kë pë 'ö -Zlan -ya pö kö =kun 'kwa- -kë 'ö 'ka- -kë -ë? -Zlan 'gü dan kun 'ka- wo bhë =a? Töng 'ö kwa 'bhema -nu 'iin kwa gia-

kwaa- 'kun, -a -bha -kë 'gbee- -sü -dhë bhë 'ö 'ka- 'piö kö Yesu -wun -dhe 'wun gia- -me -nu 'ö 'waa Zuifö 'ka, -wa kun i? ¹¹Kwaa- -dhe 'wun gia- -ne kwa Dëme Yesu -bha 'glusë bhë -a -wun 'gü -ne 'ö 'kwa dhasü yö. -Kö do bhë -a 'ka 'wo dhasü yö -a 'ka 'pö.»

¹²-Dhe Pieε -ya yën 'wun bhë -a -blεε' -sü -bha, 'ö -dhe -yö ga me -nu 'wo -kë wo 'ko -bhaa bhë -an -ta. 'Wo wo 'to to Baanabasö waa- Pölö -an -bha, 'ö -kö 'ö -Zlan -yö bca -an -ta 'ö -dhidhaapë -nu -kaa' wo -bha 'ta bhë -a 'gü, me -nu 'ö 'waa Zuifö 'ka -an ziën bhë, 'wo- -blεε -an -dhë.

¹³-Dhe =wa yën 'wun -nu 'wo bhë -an -blεε' -sü -bha, 'ö Zakö -ya pö: «Dhegluzë -nu, -ka ka 'to 'to n -ma! ¹⁴-Kö 'ö -Zlan -yö ö -zo -kaa' me -nu 'waa Zuifö 'ka -an 'piö -a -wo -lo -yi 'ka kö 'yaan- me -nu 'sü -an ziën, -waan kë ö -bha 'següme -nu 'ka bhë, Simö -ya -blεε. ¹⁵'Go mü 'zü 'ö -Zlan -wodhiölome -nu -wo 'wun 'ö bhë -a -blεε' pö. Bhii pë 'ö -been' -sü 'ka -Zlan -bha 'sëédhe 'gü -ya -pö: ¹⁶Kwa Dëme -ya -pö: 'Wun -nu 'wo -ne =wa ziö, a -dho ye n 'zü 'a nu. 'Ö 'a Davidö -bha 'gunng 'ö wü bhë 'a- dö 'zü. -A -wüüi' -dhe -nu 'wo bhë a -dho -an 'plε -yuö kë kö -yö -gban 'zü -dëüwo. ¹⁷-Yö kë 'dhö kö me -nu 'wo to, ma 'a- Dëme 'ka bhë -wo n 'piö -mεε'; 'ö me -nu 'waa Zuifö 'ka 'ö 'a -an -dhöw -kë kö -waan kë n -ma 'ka, 'wo dho kë n -ma 'ka. ¹⁸Kwa Dëme 'yö ö -bha pë -nu 'wo bhë -an -zön me -nu -dhë 'ö- -dhe -ya -gloö bhë, pë 'ö- pö bhë 'ö bhë.»

¹⁹'Ö Zakö -yö ö -wo -zuö -a -ta dhe -kë 'ö- pö -nεε: «Pë -nu 'wo bhë -a -wun 'gü, a- -yö -së kö -kun 'kwa -sëëbhodhe nu me 'ö 'waa Zuifö 'ka 'ö =wa wo -zuö' -dhié' -Zlan 'piö bhë -an -dhë! ²⁰'Kεε -kwa 'sëédhe bō -an -dhë -a -pö -an -dhë -sü 'ka -nεε kö -kun 'wo -köpë -nu 'wo sla- bho -na -an 'ka gbpä -nu -dhë bhë 'wo -an -bhö! Kö -kun 'ö me gbe -yö -da ö 'bha -bha dhe 'piö; kö -kun dhebō gbe -yö -da ö 'bha dhe -bha gōōn- 'piö, kö -kun -dadhëü -nu -wo wō -kö yaa -kë wo 'ko 'piö! 'Go mü kö -kun 'wo wü 'ö- fei yaa -lo 'wo- -bhö, 'ö tōō -nëng 'ö- wo 'ö to mü 'ö ga. 'Go mü 'zü kö -kun 'wo fei -bhö! ²¹Bhii 'ö go kwa 'bhema -nu -bha 'tōng -bha, 'ö dho 'ö yöë -dεε -bha, me -nu -wo Moizö -bha tōng -wun -blεε me -nu -dhë pödhe 'plε 'gü; 'ö tōō tōng 'ö bhë Zuifö -nu -wa -pö wo -bha -bhöküékō -nu 'gü, -an -bha -glooyi 'saadhö 'ka.»

**'Sëédhe 'wo- bō Yesu -wun -dhe 'wun gia- -me
-nu 'ö 'waa Zuifö 'ka -an -dhë**

²²-Dhe =ya kë 'dhö, 'ö Yesu -bha bōme -nu 'wo -kë Zeluzalemë plöö, me ziizii -nu waa- Yesu -wun -dhe 'wun gia- -me -nu 'wo to, -an 'plε -wo -yö -kë -a 'gü do, 'ö 'wo me 'bhaa -nu sü wo ziën, 'wo -an yö Pölö waa- Baanabasö -an 'piö, 'wo -an bō Antioçsö. Me -nu 'wo -an sü bhë 'wo tōō Zudë 'wo- 'tō kpo Baazaba waa- Silasö. Me =plε 'wo bhë -wogbiindhe -yö -kë -an -gō wo dhegluzë -nu ziën. ²³'Sëédhe 'wo- dö -an -gō 'wo dhoë Antioçsö -me -nu -dhia bhë, pë 'wo- -yaa 'gü 'ö tōō: «Yesu -bha bōme -nu, me ziizii -nu waa-

ka dhegluzë -nu, 'yië 'we me -nu 'ö 'ka Yesu -wun -dhe 'wun gia- -me -nu 'ö 'kaa Zuifö 'ka, 'ka Antiosö -pö, Sili -se waa- Silisi -se -an 'gü, ka 'ka! 24 Yi-
-ma -ne me 'bhaa -nu 'wo go yi 'piö Zeluzalemë 'nö, -wa =zuökaankuëdhe
waa- -zotadhe -va -da ka 'gü wo =blæ'- -wun -nu 'ka; 'kæe yiëë yi -wo -nu
gbe dɔ -an -gɔ kö -wa kë 'dhö. 25=Dhe 'yië 'dho yi 'ko =bhaa, 'yië -dhe -ga
'wun 'ö bhë -a 'gü, 'ö yi -wo -yö -kë do, 'yi bɔme -nu sü, 'yi -an yö kwa -bha
me -nu -wun 'gbeezë Baanabasö waa- Pölö -an 'piö, 'ö 'yi -an bɔ ka -dhë.
26 Me -nu 'wo bhë kwa Dëme Yesu Klito -bha yuö 'wo- -kë bhë -a -wun 'gü,
me -nu -wo 'wun 'gbee- -wɔ -an -ta, 'ö 'wo- pö 'wo -an zë. 27=Dhe 'ö -kë 'dhö,
'yi Zudë waa- Silasö 'yi -an bɔ ka -dhë kö 'wun -nu 'yi -an =blæ' sëëdhe 'gü
bhë kö -waan -an =blæ'- ka -dhë wo dhiö 'pö. 28 Bhii -yö -kë -Zuu 'slöösLö
waa- yi gia- yi -dhë -së, 'ö 'yiëë- 'piö kö 'yi =kwæ- gbe nu ka -dhë -a 'ke yaa
kë tong 'ö -gban pë -nu 'ö 'ka dho ka =kwaa'- -zü -an 'ka. 29'Ö tɔɔ kö =kun 'ö
-köpë -nu 'wo sla- bho -na -an 'ka gbanpë -nu -dhë bhë 'ka -an -bhö, kö =kun
'ka fei -bhö! Kö =kun 'ö wü 'ö- fei yaa -lo 'ka- -bhö, 'ö tɔɔ =nëng 'ö- wo 'ö to
mü 'ö ga 'iin 'wo fei -bhö. 'Go mü kö =kun 'ö me gbe -yö -da 'ö 'bha -bha dhe
'piö, kö =kun dhebɔ gbe -yö -da 'ö 'bha dhe -bha gɔɔn- 'piö, kö =kun -dadhëü
-nu -wo wɔ -kɔ yaa -kë wo 'ko 'piö! -Kwa yi 'bhaa 'ka!»

30=Dhe =ya kë 'dhö, 'wo wo =kwaa Yesu -bha bɔme -nu 'wo bhë -an -zü, 'ö
'wo dho Antiosö.

=Dhe ö =wa -lo 'ma, 'wo Yesu -wun -dhe 'wun gia- -me -nu 'plë -dhe wo
'ko =bhaa, 'wo 'sëëdhe bhë 'wo- nu -an -dhë.

31=Dhe =wa yën 'sëëdhe bhë -a pö -sü -bha, 'ö -an =zuö' 'glu -yö -dhi -an
-faan' 'më -wo 'wo- bɔ -an -dhë bhë -a -wun 'gü.

32 Zudë waa- Silasö 'wo -kë -Zlan -wodhiölome -nu 'ka bhë -wo 'wun
-blæe piindhö wo dhegluzë -nu 'wo mü bhë -an -dhë, -an -faan' 'më -sü 'ka
-an -bha -zo -yö Yesu -bha -sü 'gü.

33=Dhe =wa 'töng 'bhaa kë mü, 'ö me -nu 'wo bhë 'ö -an me 'bhaa -nu
-wo wo -wo -da dhegluzë -nu 'wo 'ma -an -dhë kö -waan 'ye wo 'zü. 'Ö
dhegluzë -nu 'wo bhë, 'wo -an dɔ -zian -we -an 'ka -sü waa- 'dhuë- -kpɔ -an
-bha -sü 'ka. 'Kæe Pölö waa- Baanabasö -wo -to mü.

34 (('Ö Silasö -ya pö -to mü -sü -yö ö -dhë -së 'pö; 'ö to mü. 'Ö me 'wo
dho bhë 'wo nu me -nu 'wo -an bɔ bhë -an 'piö Zeluzalemë.))

35 Pölö 'dhö, Baanabasö 'dhö waa- me 'bhaa -nu 'wo -to Antiosö bhë, -wo
me =daan -Zlan -wo 'ka. 'Go mü 'wo 'wuntaasë 'ö kwa Dëme -wo 'ka 'wo-
=blæe me -nu -dhë.

Pölö waa- Baanabasö -an -bha -kan 'kuë- -sü

36=Dhe 'töng 'bhaa =ya ziö, 'ö Pölö -ya pö Baanabasö -dhë: «-Ko 'ye ko
'zü, 'ko bɔ pö- -nu 'gü, 'ko 'dho dhegluzë -nu, 'ko kwa Dëme -wo =blæe -an
-dhë bhë -an 'piö! Kö =ya kë -ne -wo 'dho -na 'dhiö -an -bha -zo -yö Yesu
-bha -sü 'gü, kö 'koën- -a =tei' dɔ!»

³⁷Baanabasö -yö -kë -a 'piö kö Zan 'wo- 'tɔ kpɔ Maakö 'ka bhë -yö ziö wo 'piö. ³⁸Ö Pölö yaa 'we- -bha kö -yö ziö -an 'piö, bhii 'ö tɔɔ -yö -go -an 'piö 'dhiö kö -wo Panfili -sɛ 'gü, 'ö yaa 'to -an 'piö yuö -nu 'wo- -kë bhë -an 'dhiötöyi 'ka. ³⁹Ö zaɔdhe =va -yö -da Pölö waa- Baanabasö -an ziën, 'ö 'wo -kan wo 'kuë-. 'Ö Baanabasö -yö Maakö sü ö 'piö, 'wo -da 'yitagɔ 'gü, 'wo dho 'sɛɔ 'ö -ya -sü 'ka 'yi ziën 'wo- -dhe Siplë -a 'gü.

⁴⁰Ö Pölö -yö Silasö sü ö 'piö 'pö. 'Ö Yesu -wun -dhe 'wun gia- -mɛ -nu 'wo Antɔsö, 'wo Pölö waa- Silasö 'wo -an -lo -Zlan kwɛɛ kö -yaan ö -zo kë -an 'piö, 'ö 'wo dho. ⁴¹Ö 'wo bɔ Sili -dhe waa- Silisi -dhe -an 'gü, Yesu -wun -dhe 'wun gia- -mɛ -nu 'wo 'ma -an -faan' 'më -sü 'ka, -an -bha -zo -yö Yesu -bha -sü -wun 'gü.

Timote -dho dɔ Pölö waa- Silasö -an -gɔ

16 ¹Pölö -yö -dho 'ö -lo Dɛɛbö plöö. 'Go mü 'yö dho Litрэ plöö. 'Ö -dhe bhë Yesu -wun -dhe 'wun gia- -mɛ do 'wo- -dhe Timote -yö -kë mü. -Yö Zuifö dhebɔ do 'ö -kë Yesu -wun -dhe 'wun gia- -mɛ 'ka -a gbö 'ka, 'kɛɛ -a dë -yö -kë Glekö mi 'ka. ²Yesu -wun -dhe 'wun gia- -mɛ -nu 'wo -kë Litрэ -dhe waa- Ikənë -wo -tɔmɔdhe -sɛ -kë Timote -bha. ³Ö -kë Pölö -dhë -sɛ kö -yö ziö ö 'piö. 'Ö- sü ö 'piö, 'ö- zë 'bɔng Zuifö -nu 'wo -kë 'sɛ bhë -a 'gü bhë -an -wun 'gü kö -kun 'ö -an -zuö' dho to zlöö. Bhii pë 'ö -kë 'ö yaa 'dho 'bɔng kö -yö -tun 'tee bhë 'ö tɔɔ -a dë -yö -kë Glekö mi 'ka, 'ö mɛ 'plɛ -wa 'wun dɔa 'dhö.

⁴Ö pödhe -nu 'wo bɔ -an 'gü bhë, 'wun -nu 'ö Yesu -bha bɔmɛ -nu waa- mɛ ziizii -nu 'wo Zeluzalemë 'ö -an -wo -yö -mɔa 'gü bhë, 'ö 'wo- pö Yesu -wun -dhe 'wun gia- -mɛ -nu -dhë kö -wo 'ta 'sü -nɛ -kɔ 'ö bhë -a 'dhö.

⁵Yesu -wun -dhe 'wun gia- -mɛ -nu -dho 'kuë- -sü -wo -kë 'gbee- -zo -yö Yesu -bha -sü 'gü. 'Ö -dhekpaɔyi 'saadhö 'ka, mɛ -nu -wo -da -an -ta.

Pölö -yö 'yanpiöpë -yö Trɔasö plöö

⁶-Zuu 'slööslö yaa 'we- -bha -an -gɔ kö -wo -Zlan -wo -bleɛ' -Azi -pö -nu 'gü. 'Yö 'wo bɔ Flizi -sɛ waa- Galatö -sɛ -an 'gü. ⁷-Dhe 'ö -wa -lo Misi -dhe 'sɔɔ, 'wo -slë -mɛɛ kö 'waan- 'dho Bitini -sɛ 'gü; 'kɛɛ -Zuu 'slööslö yaa 'we- -bha -an -gɔ 'zi kö -waan 'dho 'ma. ⁸-Dhe 'ö -kë 'dhö 'wo bɔ Misi -sɛ 'gü, 'wo dho Trɔasö plöö.

⁹-Dhe 'ö 'wo dɔ gbeng 'ö Pölö -yö 'yanpiöpë do yö. 'Yö gɔɔn- do 'ö go Maseduanë yö kö -yö dɔ -sü 'ka -a wö 'dhiö. 'Ö- pö Pölö -dhë: «-Bhö bɔ Maseduanë zö kö 'ü nu yi -dhë!»

¹⁰-Dhe 'ö Pölö -ya 'yanpiöpë yö 'dhö, 'ö 'yi- kédhe =mɛɛ, 'yi dho Maseduanë -sɛ 'gü. Bhii yi- =tɛi' -dɔ =nɛ -Zlan -yö yi -dhɔɔ -kë 'ma kö 'yiën- 'dho Yesu -bha 'wuntaɔsë 'ka mɛ -nu 'wo zian 'ö 'ma bhë -a -ta -an -dhia.

Lidi -yö Yesu -wun -dhe 'wun gia- Filipö plöö

¹¹Yi -da 'yitagɔ 'gü, 'yi go Trɔasö, 'yi dho vɛɛdhö 'sɛ 'ö 'yi ziën 'wo- -dhe Samotrasë bhë -a 'gü -zian'.

-Dhe -dhe -ya 'po, 'yi go mü, 'yi dho Neapoli -pö 'gü. ¹²'Ö 'yi go mü 'zü, 'yi 'ta sü 'yi dho Filipö -pö 'gü. Filipö -pödhe 'ö bhë -yö -kë pödhe -nu 'wo -kë Maseduanë -se -a 'gü bhë -a -bhlëzë 'ka, bhii -yö -kë dɔ -sü 'ka mɛ -nu 'wo go Wlɔmë -an kwɛɛ.

Yi -dhekpaɣi 'dede -kë mü. ¹³'Ö Zuifö -nu -bha -glooyi 'ka 'yi go plö, 'yi dho pö -taa -bha, 'yiga do 'kpong 'dhiö, bhii pë 'yi -ya yi -zuö' 'piö 'ö tɔ Zuifö -nu -bha -bheadhe do -yö -dho kë mü. 'Yi -lo mü 'ö 'yi -yaannu, 'yi 'wun -bleɛ dhoo -nu 'wo -kë wo 'ko -bhaa mü -an -dhë. ¹⁴Dhebo do 'wo- -dhe Lidi 'yö go Tiatii, -yö -kë dhoo -nu 'wo bhë -an ziën mü. -Yö -kë -yeega sɔ nuɛazë -sɔnnɔ' 'gbeezë 'dhɔɔɔdhe 'ka. 'Go mü -yö -Zlan -bhlë -ya. 'Ö kwa Dëmɛ -ya -zuö' 'dhi -po kö -yaan ö 'to 'to -së 'ka Pɔlö -wo -bha. ¹⁵'Ö yö 'dhö, ö -bha 'kɔɔmɛ -nu 'dhö, 'wo -an bɔ yiö Yesu 'tɔ 'ka. 'Go mü 'ö -pö yi -dhë: «Ya kë -nɛ 'ka- -dhe 'wun gia- -nɛ, 'ma Dëmɛ -wun -dhe 'wun gia-, kö -ka nu n -gɔ kɔɔ, 'ka 'to mü!» 'Yö -gban yi -bha kö 'yi 'we- -bha -a -gɔ.

Me -nu -wo Pɔlö waa- Silasö -da -kanso 'gü

¹⁶Yi do 'ka kö yi 'dho -na Zuifö -nu -bha -bhe'a' -dhe -bha, yi yuökédhe do -yö zian -ta. Dhebo bhë -zuu yaa -yö -kë -a 'gü 'ö -ya kë 'ö 'wun -nu 'wo dho kë mɛ -nu 'ka, 'ö -to 'dhiö 'ö- -bleɛ -a -mɛ -nu -dhë. 'Ö- -bha -de bɔ -sü bhë -a 'gü, 'ö nu 'wëü- -vava -nu 'ka ö -gɔmɛ -nu -dhia. ¹⁷Dhebo bhë 'ö yö -ziö yië- Pɔlö -nu yi 'piö -sü 'gü, 'gbia -sü 'ka mɛ -nu -dhë -nɛɛ: «Me -nu 'wo -nɛ -wo -Zlan 'ö -va 'ö -ziö -zlan -nu 'wo to -an 'plɛ -ta -a -bha yuökëmɛ -nu 'ka! -Kɔ 'ö -Zlan -yö mɛ dha -a 'ka bhë -nɛ 'wo- -bleɛ ka -dhë!»

¹⁸-Ya -kë 'dhö -dhekpaɣi -plëézë 'ka. 'Ö 'wun -yö -na Pɔlö -zuë, 'ö -pö -zuu yaa 'ö -kë dhebo bhë -a 'gü bhë -a -dhë: «A- -pö ü -dhë, Yesu Klito 'tɔ 'ka: -Bhö 'go dhebo 'ö -nɛ -a 'gü!» 'Ö -zuu yaa -yö go -a 'gü -dhe do bhë -a -bha.

¹⁹-Dhe -debɔdhe bhë -a -gɔmɛ -nu -waa- dɔa -nɛ wo 'ka 'dho 'wëüga gbe yö -a 'gbloo 'piö gbo, 'wo Pɔlö waa- Silasö -an kun, 'wo -an -gblëë 'dhëédhö, mɛ -nu 'ö -wogbiindhe 'dhö -an -gɔ -an wö 'dhiö mü. ²⁰'Wo dho -an 'ka 'zü, mɛ -kɔɔnmɛ -nu -vava 'wo Wlɔmë -mɛ -nu 'ka -an -dhia 'wo -pö: «Gɔɔn- -nu 'wo -nɛ -wa nu pö- 'ö -nɛ -a 'gü, mɛ -zuö' -kaan 'kuë -wun 'ka! Zuifö -nu -mü -an 'ka! ²¹Pë -nu kwaa- tɔng -ya pö mɛ 'kwa Wlɔmë -mɛ 'ka kö -kun 'kwa -we -a -bha bhë -wo mɛ -nu -daan' -na -an 'ka kö -wa kë.» ²²'Ö mɛ gbung -nu -de 'pö, 'wo yö Pɔlö waa- Silasö -an 'klo bhɔ -sü -bha. 'Ö mɛ -kɔɔnmɛ -nu -vava -wa pö wo -bha 'dhasi -nu -dhë -wo -an -bha sɔ -nu bho -an -bha kö -wo -an -ma -klaa 'ka.

²³-Dhe 'ö -wa -klaa -yaan -plëézë 'sü -an -bha, 'wo -an -zuö -kanso 'gü. 'Ö mɛ -kɔɔnmɛ -nu -vava -wa pö 'yan -to -kanso 'kɔdhi -bha -mɛ -dhë -yö ö 'yan 'to -an -bha -së 'ka.

²⁴-Dhe 'ö 'yan -to -kanso 'kɔdhi -bha -mɛ -ya -wo 'ö bhë -a ma, 'yö dho mɛ -plɛ 'wo bhë -an 'ka, -kanso 'kɔdhi mɛ 'wo- -maa -kë -duö bhë -a 'gü, 'wo -an -gen yö 'lü 'gü.

25=Dhe 'ö =wa dɔ gbeng ziën, Pɔlö waa- Silasö -wo yö =bhea' -sü 'gü kö -wo 'tan -nu bho -na -Zlan 'tɔ 'piö. -Kanso 'kɔɔmɛ 'wo -kê mü, -wo wo 'to -to -an -wo -bha. 26'Yö 'sɛ -yö yö =zluun -sü -bha 'gbee- 'ka, 'ö -kanso 'kɔ kpong 'plɛ -wo -po, 'ö mɛ -nu 'saadhö 'wo -kanso 'kɔɔdhö 'ö -an 'plɛ -bha =yɔɔ' -yö go -an -bha. 27'Ö 'yan -to -kanso 'kɔɔdhi -bha -mɛ -yö -büü.

=Dhe 'ö =yaa- yö =nɛ -kanso 'kɔɔdhi -ta kpong 'plɛ =wa 'po, 'yö ö -bha -dhaa sü kö -yaan ö -de zë. Bhii -yö ö -zo -ta =nɛ -kansogümɛ -nu 'plɛ =wa =duë. 28'Kɛɛ =dhe 'ö Pɔlö =yaa- 'wun dɔ, -yö -gbla ö =faan' 'plɛ 'ka 'ö- pö: «Kö -kun 'ü pë yaa -kê ü -de 'ka! Yi 'plɛ yi -kanso 'kɔɔdhö zö!»

29=Dhe =ya kè 'dhö, 'ö 'yan -to -kanso 'kɔɔdhi -bha -mɛ -ya pö -wo 'siö dɔ, 'ö -bla sü 'ö dhoë 'kɔɔdhi mɛ 'ö Pɔlö waa- Silasö 'wo -kê -a 'gü bhë -a 'gü =zluun -sü 'ka. 'Yö -lo ö kpon 'gü -an 'dhiö, 30'yö -an yö plaan. =Dhe =ya kè 'dhö, 'yö -an =dhe' kɔ 'ö- pö: «N dë -nu, -mè 'a dho -a kè kö 'aan- dhasü yö =ɛ?»

31'Ö 'wo- -daa -kê -a -gɔ 'wo- pö: «-Bhö yi Dëmɛ Yesu -wun -dhe 'wun gia-! =Ya kè 'dhö, bhi 'dhö, ü -bha 'kɔɔmɛ -nu 'dhö, ka -dho dha.»

32'Ö 'wo kwa Dëmɛ -wun =blɛɛ yö 'dhö, mɛ -nu 'saadhö 'wo -kê -a -gɔ kɔɔ -an -dhë. 33'Yö dho -an 'ka 'lɛlɛ do gia- bhë -a 'ka gbeng, 'yö -an -bha bhüö -nu -zlu. 'Ö -dhe do bhë -a 'gü, yö 'dhö, ö -bha 'kɔɔmɛ -nu 'dhö, 'wo -an bɔ yiö Yesu 'tɔ 'ka. 34'Ö dho Pɔlö waa- Silasö -an 'ka ö -gɔ kɔɔ, 'ö -bhöpë nu -an -dhë. Gɔɔn- 'ö bhë waa- ö -bha 'kɔɔmɛ -nu -an =zuö' 'glu -yö -dhi =va 'ka, bhii 'ö tɔɔ -wo -Zlan -wun -dhe 'wun gia-.

35=Dhe 'ö- -dhe =ya =kpaɔ, 'ö mɛ =kɔɔnmɛ =vava 'wo Wlɔmë -mɛ -nu 'ka bhë 'wo 'dhasi -nu bɔ 'yan -to -kanso 'kɔɔdhi -bha -mɛ -dhë, -a -pö -a -dhë -sü 'ka =nɛ -yö ö =kwa' mɛ -nu 'wo bhë -an -zü -wo 'dho.

36'Yan -to -kanso 'kɔɔdhi -bha -mɛ 'ö bhë -yö -nu, 'ö- pö Pɔlö -dhë =nɛɛ: «Mɛ =kɔɔnmɛ =vava -nu, -wo wo -wo -bɔ =nɛ 'a n =kwa' ka -zü. =Dhe 'ö 'pö, -ka kaa- 'dho wo =zuöyagluu 'ka!»

37'Kɛɛ Pɔlö -ya -pö 'dhasi -nu 'wo -an bɔ bhë -an -dhë =nɛɛ: «Yi 'yi Wlɔmë 'në -nu 'ka bhë, waa za dɔ yi -bha kö -yaan 'dho yi kun, 'ö 'wo yi -ma mɛ 'kpekpe wö 'dhiö, 'go mü 'wo yi -züö -kanso 'gü. 'Wo- 'piö zlöö kö 'wo yi bho -kanso 'gü -bin -blü -a? -Abi! Wo gia- -wo nu, -wo yi bho mü!»

38'Ö mɛ -nu 'wo bhë 'wo dho Pɔlö -wo 'ö bhë -a 'ka mɛ =kɔɔnmɛ -nu =vava =dhia. =Dhe mɛ -nu 'wo bhë =waa- ma =nɛ Pɔlö waa- Silasö Wlɔmë 'në -nu -mü -an 'ka, 'ö 'siö -yö -kan -an 'gluu. 39'Ö 'wo nu 'wo -wo -së pö -an -dhë. 'Go mü 'wo -an bho -kanso 'kɔɔdhö, 'ö 'wo =bhea -an -dhë kö -wo 'go pö- 'ö bhë -a 'gü.

40=Dhe Pɔlö waa- Silasö =wa 'go -kanso 'gü, -wo -dho Lidi -gɔ kɔɔ. =Dhe =wa Yesu -wun -dhe 'wun gia- -mɛ -nu 'wo mü -an yö, 'wo -an =faan' mɛ. =Dhe -kê 'pö, 'wo go pödhe 'ö bhë -a 'gü 'wo dho.

Pɔlö waa- Silasö -wo Tesalɔnikö plöö

17 1-Wo -bɔ Anfipoli -pö waa- Apoloni -pö -an 'gü, 'wo dho 'wo -lo Tesalɔnikö -pö 'ö Zuifö -mɛ -nu -bha -bhɔküëkɔ do 'dhö -a -bha bhë

-a 'gü. ²Polö -yö -dho Zuifö -nu -bha -bhoküëkɔ 'gü =ne -kɔ =ya kɛ 'ö- -kaa' -kplawo bhè -a 'dhö. 'Ö -Zlan -wo 'ö =bɛɛn' -sü 'ka, 'ö- =blɛɛ -an -dhè, 'ö waa-mɛ -nu 'wo bhè 'wo- -ta =dhɛɛ' kpo, kö -ya -daa kɛ -na; 'wo- -kaa' 'dhö Zuifö -nu -bha =glooyi -yaaga 'ka. ³Yö- -gen -nu pö -an -dhè =ne -kɔ 'ö =bɛɛn' -sü 'ka -a 'ka -Zlan -bha 'sëédhɛ 'gü bhè -a 'dhö -a -zɔn -an -dhè -sü 'ka =ne -kɔ 'ö -Zlan -bha -Yamɛ -yö 'yena -kaa', 'ö ga, 'ö goè ga 'gü bhè -a 'dhö. 'Yö- pö -an -dhè 'zü =nɛɛ: «-Zlan -bha -Yamɛ 'a- -wun =blɛɛ' -na ka -dhè bhè 'ö tɔɔ Yesu.»

⁴=Dhɛ =ya kɛ 'dhö, mɛ do do -nu -wo go -an zièn 'ö 'wo -Zlan -wo 'ö Polö -ya =blɛɛ bhè 'wo- -dhɛ 'wun gia-; 'ö 'wo nu Polö waa- Silasö -an 'piö. -Kɔ do bhè 'ö mɛ kpö =va 'wo -kè Glekò -nu 'ka, 'wo -kè -Zlan gbamɛ -nu 'ka waa- dhebo -nu =bhlézè -plëézè 'wo -kè pödhe bhè -a 'gü 'wo- -kaa' 'pö.

⁵'Ö =druei -yö Zuifö -nu -kè, 'ö tɔɔ yaa -kè -an -dhè -sè kö mɛ -nu -wo 'dho Polö waa- Silasö -an 'piö =va 'ka =ne -kɔ bhè -a 'dhö. 'Ö 'wo kèpèyaame -nu =kpaa kpa 'kuè- -kpinngga -nu 'piö, 'wo yö mɛ -gbaa -nu =blüü 'blü -sü 'gü, 'wo pöme -nu =zuö' -kan 'kuè. 'Ö 'wo nu gɔɔn- 'wo- -dhɛ Zazɔn bhè -a -gɔ 'kɔ 'dhiö, 'ö 'wo- -bha 'kɔ kpong -nu wü, Polö waa- Silasö -an =mɛɛ' -sü 'ka, 'ö tɔɔ -wo -kè -a 'piö kö 'waan- 'dho -an 'ka 'següme -nu 'dhiö.

⁶=Dhɛ 'ö -kè =ne waa -an yö, 'wo Zazɔn waa- Yesu -wun -dhɛ 'wun gia- -mɛ -nu 'bhaa -nu =gaan 'gan, 'wo dho -an 'ka pö- =kɔɔnmɛ -nu 'dhiö. 'Wo yö =gblaa 'gbla -sü 'gü =nɛɛ: «Gɔɔn- -nu 'wo mɛ -nu dɔ -gbɔudhö, -dhɛ 'saadhö 'gü bhè =wa nu =wa -lo plöö zö! ⁷Zazɔn =ne 'ö -an -nia kun ö -gɔ kɔɔ! 'ö- -nia -nu 'wo bhè, -dhɛ 'wo- -bha 'töüdhö 'ö 'wo tɔng -nu 'ö kwa -bha 'se -kɔɔnmɛ =va -ya -zɔn bhè 'wo -an 'plɛ =siö, bhii -wa -pö -gludè gbɛ 'wo- -dhɛ Yesu -yö -dhö!»

⁸-Wo -nu 'wo bhè -wo mɛ gbung waa- pö- =kɔɔnmɛ -nu =zuö' -luu. ⁹'Ö Zazɔn waa- mɛ -nu 'wo dho -an 'ka pö- =kɔɔnmɛ -nu 'dhiö bhè, 'wo tɔng -kè pö- =kɔɔnmɛ -nu 'wo bhè -an -dhè, 'kɛɛ kö waa pè yaa gbɛ kè. =Dhɛ 'ö =wa yèn tɔng kè -sü -bha 'ö 'wo wo -kwaa -an -zü, 'wo dho.

Polö waa- Silasö -wo -dho Bele plöö

¹⁰=Dhɛ 'wo dɔ gbeng 'ö Yesu -wun -dhɛ 'wun gia- -mɛ -nu -wo wo -kwaa Polö waa- Silasö -an -zü, 'wo dho Bele. =Dhɛ 'ö =wa -lo mü, 'wo dho Zuifö -nu -bha -bhoküëkɔ 'gü. ¹¹Mɛ -nu 'wo mü bhè 'to -to Polö waa- Silasö -bha -sü -yö -dhi -an -dhè, 'ö =ziö' -a 'ka Zuifö -mɛ -nu 'wo Tesalɔnikö plöö -an -ta. 'Ö 'wo -Zlan -wo kun wo =zuöga 'plɛ 'ka. 'Ö yi 'saadhö 'ka, 'wo -Zlan -wo 'ö =bɛɛn' -sü 'ka bhè 'wo- -wo pö wo 'ko =bhaa kö =ya kɛ =ne pè 'ö Polö -ya pö bhè 'wun gia- -mü, kö 'waan- -a dɔ. ¹²'Ö Zuifö -nu =plëézè -wo go -an zièn 'wo Yesu -wun -dhɛ 'wun gia-. 'Go mü 'zü Glekò dhoo -nu =bhlézè waa- Glekò gɔɔn- -nu =plëézè -wo Yesu -wun -dhɛ 'wun gia- 'pö.

¹³'Kɛɛ =dhɛ 'ö Zuifö -nu 'wo Tesalɔnikö =waa- ma =ne Polö -yö -Zlan -wo =blɛɛ' -sü 'gü Bele, 'wo nu 'wo mɛ gbung bhè 'wo 'wun 'vlanvlan -da -an 'töüdhö. 'Go mü 'wo- -kè 'ö mɛ -nu 'wo bhè 'wo Polö 'klo bhɔ.

14=Dhe =ya kë 'dhö, 'ö Yesu -wun -dhe 'wun gia- =me -nu 'wo Bele bhë, 'wo Pölö waa- Yesu -wun -dhe 'wun gia- =me 'bhaa -nu bɔ 'yoo 'piö -zian' -bla 'ka, 'ö 'wo wo =kwaaw' -an -zü 'wo dho. 'Këe Silasö waa- Timote -wo -to Bele. 15Më -nu 'wo dho Pölö -dɔ zian- =dhia, -wo -dho 'wo -lo -a 'ka Atenë plöö. =Dhe =ya kë 'dhö, 'wo -yɛ wo 'zü Silasö waa- Timote -an -bha -naɔ 'ö Pölö -ya dɔ -an -gɔ =nɛɛ, -wo nu 'zodhö, -wo yö ö -bha bhë -a 'ka.

Kë 'ö Pölö -ya wo Atenë plöö

16'Töng 'ö Pölö -yö =kaa' dɔ -sü 'ka Silasö waa- Timote -an -gɔ Atenë bhë, -a 'yan -yö -da gbpä -nu -ta Atenë mü =va; 'ö 'wun -yö naa- =züë. 17-A 'töng bhë -a 'ka, =ya kë Zuifö -nu -bha -bhɔkuëkɔ 'gü, me -nu 'wo Zuifö 'ka waa- më -nu 'waa Zuifö 'ka 'ö 'wo -kë -Zlan =bhlëyame -nu 'ka waa- Pölö -nu, -wo 'dɔɔ -nu -dɔ wo 'ko =bhaa -Zlan -wo 'ö =bɛɛn' -sü 'ka -a -ta. 'Ö me -nu 'ö Pölö =ya -kpën -an -bha 'dhëédhe =va 'gü, 'ö wo -nu 'wo 'wun dan 'kuë. 18'Ö -zo -ta 'wun 'gü -më 'bhaa -nu më 'wo -we 'wun 'ö Epikulö me =daan -a 'ka bhë waa- më 'bhaa -nu 'wo -we Zenɔ -bha më =daan' -wo -bha 'ö 'wo -an -dhe Sitoisien, 'wo yö 'wun -bleɛ Pölö -dhë -sü 'gü. 'ö- më 'bhaa -nu -wa pö: «Më -wun 'ö -zuödɔmë 'ö =nɛ 'ö- =bleɛ' -na =nɛ =ɛ?» 'ö- më 'bhaa -nu -wa pö 'zü: «Yö -kë -Zlan -nia -nu 'ö -an -wun =bleɛ' -na bhë.» Pë 'ö -kë 'wo- pö 'dhö bhë 'ö tɔɔ Pölö -yö -kë Yesu -wun waa- më -nu -bha -go ga 'gü -sü -wun =bleɛ' -dhia.

19'Ö 'wo Pölö kpa wo -bha, 'wo dho -a 'ka më ziizii -nu -bha -yakuédhe 'ö 'wo- -dhe Aleopazö -yakuédhe bhë -a -ta. 'Ö 'wo- pö -a -dhë: «Yi- 'piö kö më =daan' -wo -dëü 'ü- -zɔn -na bhë 'yi- dɔ. 20Bhii 'wun -nu 'wo bhë yiëë -an ma do. Pë 'ö -kë 'ö 'yi- 'piö kö yi- -gen ma 'ö bhë.» 21Bhii 'ö tɔɔ më -nu 'saadhö 'wo Atenë -më -nu 'ka waa- -nia -nu 'wo -kë pö- bhë -a 'gü mü, -wo 'töng 'plɛ -sü wo 'to -to 'wun -taɔ -dëü -nu waa- -an =bleɛ' -sü -nu -bha.

22'Ö Pölö -yö =luu më ziizii -nu 'wo Aleopazö -bha -yakuédhe -ta bhë -an wö 'dhiö, 'ö- pö: «Atenë -më -nu, a- -dɔ =nɛ, ka -zlan -nu =plëézë -gba. 23Bhii n -ma =nië' -sü 'ka, ka -gɔ pödhe 'ö =nɛ -a 'gü, 'ma -dhe -ga ka -bha -Zlan -nu gbadhe =plëézë -bha; a slabhodhe do 'bhaa -yö. Pë 'ö =bɛɛn' -sü 'ka mü 'ö tɔɔ: «Zlan 'ö 'yiëë- dɔ, -a -bha sla- -bho -a -ta -pë 'ö =nɛ.» =Dhe 'ö 'dhö, a -nu kö -Zlan 'ö 'ka- gba -na 'ö 'kaa- dɔ bhë 'aan- -a -wun =bleɛ' -ka -dhë. 24-Zlan 'ö bhë 'ö 'kpongtaadhe waa- 'ö 'gü -pë -nu 'töüdhö 'wo -kë =blëë' 'dhe -nu, wü -nu, -ma -nu waa- 'yuö- -nu 'ka bhë 'ö -an -kë. Yö 'ö -kë dhang- waa- 'se -an =kɔɔnɛ 'ka bhë yaa 'dho 'go mü 'zü -yaan kë -a -gba -a 'gü -kɔ -nu 'ö më -nu -wa dɔ wo -kɔ 'ka -a 'gü. 25'Go mü 'zü, -Zlan -bha -kë -a 'gü -sü 'yaa -gban pë 'ö më 'bhee- -nu dho -a nu -a -dhë, -a -bha yuö kë -sü 'ka -a -bha. Bhii yö =nɛ 'ö -kë -a 'gü -sü, 'të -sü waa- pë -nu 'saadhö 'ö më -bha -wun -yö yö -a -bha -a nu -an -dhë. 26-Zlan -yö gɔɔn- do -da 'dhiö. Gɔɔn- 'ö bhë 'ö 'kpongtaame -nu 'plɛ -wo go -a 'gü, 'ö- -kë kö më -nu 'wo bhë -wo =bheɛ 'kpongtaadhe 'plɛ -bha. Kö -Zlan -yaan =tun më -nu -da

-na, 'töng 'wo dho -a kè 'kpongtaa waa- -an -bha -yadhë -nu 'wo dho kè -a -bha, -yö -an 'plë -kè 'dhiö. ²⁷Pë -nu 'wo bhë 'töüdhö -Zlan -yö -an -kè kö mē -nu -waan wo =faan' 'sü ö =mæ' -sü 'ka, -dhë =plëzë -bha kö -waan ö yö. -Yö 'dhö, 'kë kè 'kwa- wo 'dhö do do 'ka bhë -Zlan 'yaa mē gbë 'ka -gbiin. ²⁸Bhii kwa -bha -kè -a 'gü -sü 'dhö, kwa -bha -go piën- -sü waa- pë 'kwa- 'ka, -an 'plë -wo -go -a 'gü. Ka -bha 'dhikanmë 'bhaa -nu -wo -wo do -pö, 'ö bhö -wo 'a- =blë ka -dhë zö bhë -a -bha 'wo- pö: <-Zlan =në 'ö kwa -da, 'ö- -wun 'gü 'kwa- -bha 'në -nu 'ka.> ²⁹Dhe -kè =në, kwa -Zlan -bha 'në -nu 'ka bhë kö kwa 'ka 'dho kwa -zo ta =në -Zlan -yö -kè =në pë 'bin 'wo- kè 'sëng 'dhö, zëng waa- -guö 'dhö 'ö mē 'ö- kédhë dō -së 'ka 'ö- kè -na 'ka bhë -a 'dhö. Bhii 'ö tō pë -nu 'wo bhë pë 'bin 'kpaan 'ö -këdhösü 'yaa -an -gō yö -mü -an 'ka. ³⁰Töng 'ö waa 'wun dōa -Zlan -bha bhë, -Zlan -zo -de 'yaa- -wun 'piö kö -waan 'dhoë- pö -yö -kè -a 'piö kö 'ö mē -nu -bha za 'kan. 'Kë zlöö =në -yö mē 'plë =dhö kè -na, -dhë 'saadhö 'gü kö -wo wo =kwaal- wo -bha -tosiadhe yaa -nu -zü, kö -wo ziö ö 'piö. ³¹-Yö yi do 'ö dho za kan -a 'ka 'kpongtaamë 'saadhö -an -bha ö -bha -kè kpengdhö -sü 'gü -a -kpö, 'ö bōa mē do 'ö- -ya bhë -a -ta. 'Wun 'ö 'dhö bhë -ya -zōn mē 'plë -dhë =në ö -dho -a kè 'dhö, mē 'ö- -ya bhë -a -bho ga 'gü -sü 'ka.»

³²'Wun 'ö -kè mē 'bhee- -nu -bha -go ga 'gü -sü -wun 'ka bhë, =dhë 'ö =waa- ma, 'ö mē -nu -wo duö 'luu sü -a 'ka, kö mē 'bhaa -nu -wa pö -na: «-Yö 'to 'dhö; =dë -bha =ya -mō!»

³³=Dhe =ya kè 'dhö, 'ö Pölö -yö go mü 'ö -ziö. ³⁴'Kë -an mē 'bhaa -nu -wo -ziö Pölö 'piö, 'wo -Zlan -wo -dhë 'wun gia-. Mē -nu 'wo 'dhö bhë, Dönisö 'ö -kè zakanmë 'ö Aleopazö -mē do 'ka, dhebō do 'wo- -dhë Damalisö waa- mē 'bhaa -nu 'wo to, -wo -kè mü 'wo -kè -zuö' -dhië -Zlan 'piö -mē -nu 'ka.

Pölö -yö Kolentö plöö

18 ¹=Dhe 'ö =ya kè 'dhö Pölö -yö -go Atenë, 'yö -ziö 'ö dho Kolentö plöö. ²'Yö -kpen Zuifö mi do 'wo- -dhë Akilasö, 'ö bhö Pōng -se 'gü waa- ö bō Plisilö -an -bha kö =wa 'go Itali -se 'gü, =wa nu Kolentö -pö 'gü -a -dhë yaa =glō =kun, bhii 'ö tō Itali -se =kōnme =va Klodö -ya -pö Zuifö -nu -wo 'go Wlōmë -pö 'gü. 'Ö Pölö -yö -wo -an 'piö. ³=Dhe 'ö -kè =në waa- Pölö -nu -an këyuö -yö do bhë (-wo -kè sōkōdōmë 'ka), 'yö to -an -gō kō, 'ö wo -nu 'wo yuö -kè wo 'kuë-. ⁴'Ö Zuifö -nu -bha =glooyi 'saadhö 'ka, Pölö waa- mē -nu 'wo Zuifö 'ka waa- Glëkö -nu 'wo -Zlan -wo dan 'kuë Zuifö -nu -bha -bhōkuëkö 'gü. 'Ö Pölö -yö -an =kō' =yë ö =faan' 'plë 'ka kö -waan Yesu -wun -dhë 'wun gia-.

⁵=Dhe Silasö waa- Timote =wa 'go Maseduanë =wa nu, Pölö -yö 'töng 'plë -sü, 'yö -Zlan -wo =blë -a -zōn Zuifö -nu -dhë kpinngdhö -sü 'ka =në Yesu =në tō -Zlan -bha -Yamë. ⁶Zuifö -nu waa 'we -a -bha kö 'wo 'we Pölö -wo -bha. 'Ö 'wo 'si -nu bho -a -gō, 'ö Pölö -ya -daa -kè -an -gō 'gbee- 'ka ö -bha sō -nu -kpenng -sü 'ka (-a -gen 'ö tō wo -nu wo -wo 'yaa- 'gü do) 'ö- pö:

«Ya kë =ne kaa dha, kö ka gia- kaa- 'wun =zaa' -sü -nu kë -sü -mü, kö -a -wun 'yaa n tuö. =Dhe 'ö 'pö, 'go =dæ -bha a -dho go ka 'piö kö 'aan- 'dho me -nu 'ö 'waa Zuifö 'ka -an 'piö kö 'aan- -Zlan -wo =blæ'- -an -dhë.»

⁷Dhe =ya kë 'pö, 'ö go -an 'piö, 'ö dho gɔɔn- do 'wo- -dhe Titusö Zutusö 'ö -Zlan =bhlë -ya, 'ö- -bha 'kɔ 'dhö Zuifö -nu -bha -bhɔkuëkɔ 'sɔɔ bhë -a -gɔ kɔɔ. ⁸Klipusö 'ö -kë Zuifö -nu -bha -bhɔkuëkɔ =kɔɔnme 'ka bhë waa- ö -bha 'kɔɔme -nu -wo Dëme -wo -dhe 'wun gia-. 'Ö Kolentö -me -nu -dhe =va -dhe 'wo Pölö -wo ma, -wo Yesu -wun -dhe 'wun gia-, 'wo -an -bɔ yiö Yesu 'tɔ 'ka.

⁹Gbeng -yi do 'ka, Pölö -yö 'yanpiöpë do -yö. 'Ö Dëme -ya pö -a -dhë: «Kö -kun 'ö 'suö -yö ü -kë! -Bhö 'dho ü 'dhiö 'wun -blæ me -nu 'wo zö -an -dhë -sü 'ka, kö -kun 'ü ü 'dhi yö 'kuë! ¹⁰Bhii a ü 'piö; me gbe 'ka 'dho -ma -a -bha kö -yö ü 'kun kö -yö pë yaa kë ü 'ka. 'Ö tɔɔ medhevadhe -wo -dho go pö- 'ö =ne -a 'gü kö -waan 'we n -wun -bha.»

¹¹Pölö -yö -kwe do waa- ö 'gbu -kë Kolentö -me -nu -gɔ pö- bhë -a 'gü. 'Ö me -nu =daan -Zlan -wo 'ka.

¹²'Töng 'ö Galion -yö =kaa' -gludë 'ka, Wlɔmë -me -nu -gɔ 'se 'ö- 'tɔ -yö -kë Akai 'ka bhë -a 'ka, Zuifö -nu -wo -dho wo 'ko =bhaa Pölö -gɔ, 'wo- kun 'wo dho -a 'ka mekɔɔnme 'dhiö kö -yö za -lo -a tuö. ¹³'Wo- pö mekɔɔnme Galion -dhë: «Gɔɔn- 'ö =ne -ya 'piö kö -Zlan gba -kɔ gbe 'ö 'yaa kwa -bha tong 'piö 'ö me -nu =daan -a 'ka.»

¹⁴-Dhe Pölö -ya -kë kö 'yaan- 'wun =blæ'-, 'ö Galion -ya pö Zuifö -nu -dhë: «Me 'ka =ne, -më 'ö- -kë -ε? =Ya kë =ne 'wun 'yaa 'kpëdhö 'ö- -kë, 'iin 'wun yaa 'bhaa =ne 'ö- -kë -bezë, kö a -dho 'töng sü 'a n 'to toë -së 'ka. ¹⁵'Këe =dhe 'ö -kë =ne -yö -gban 'wun =blæ' -sü 'kpaan 'dhö, me 'tɔ -wun waa- ka -bha tong -wun -nu -bha yö -mü bhë, kö a -kɔ 'wun me 'ö 'dhö bhë -a 'kan -sü 'ka. Ka gia-, -ka ka -bha pë 'kan!»

¹⁶'Yö ö -bha 'dhasi -nu bɔ 'wo -an -kë, 'wo go zadɔkɔ 'gü mü.

¹⁷-Dhe =ya kë 'dhö, Sɔtenë 'ö -kë Zuifö -nu -bha -bhɔkuëkɔ =kɔɔnme 'ka, 'wo- kun, 'wo- -ma za dɔ -a 'gü -kɔ 'dhiö mü. 'Këe yaa kë Galion 'gü pë gbe 'ka.

Pölö -bha -ye ö 'zü -sü 'yö dhoë Anticsö

¹⁸Pölö -yö =glɔɔ Kolentö, Yesu -wun -dhe 'wun gia- -me -nu 'wo mü -an 'piö. =Dhe =ya kë 'dhö, 'yö go mü 'yö ö -bha =kweε- dhu kö yö 'dhö, Plisilö 'dhö, Akilasö 'dhö, -waan 'dho Sili -se 'gü. -Wo -kë Sënkle plöö 'ö Pölö -yö ö -gɔ bho kö waa =tun -da -na 'yitagɔ 'gü, bhii 'ö tɔɔ -yö pë do 'tɔ -go -Zlan -dhë.

¹⁹'Wo dho 'wo -lo Efëzö. -Dhe bhë -a 'gü Pölö -yö -kan Akilasö waa- Plisilö -an -bha, 'ö dho Zuifö -nu -bha -bhɔkuëkɔ 'gü, 'ö waa- Zuifö -nu 'wo 'wun -nu =blæ wo 'ko =bhaa mü. ²⁰'Wo- pö -a -dhë -yö =glɔɔ wo 'piö mü. 'Këe yaa 'we- -bha -an -gɔ. ²¹'Yö ö -wo -da -an -dhë -a pö -sü 'ka =neε: «=Ya

kë =ne -Zlan =ya 'we- -bha, a -dho nu ka 'piö yi do 'ka.» =Dhe =ya kë 'dhö, 'ö -da 'yitagö 'gü, 'ö go Efezö 'ö dho.

²²=Dhe 'ö =ya -lo Sezale, 'yö ö =kwæ- =yɔɔ mü, 'ö -ta sia-, 'ö dhoë Zeluzalëmë. =Dhe 'ö =ya -lo 'ma, 'ö -büö -da Yesu -wun -dhe 'wun gia- -me -nu -dho 'kuë- -sü 'wo 'ma -an -dhë. 'Go mü 'yö dho Antioös.

²³=Dhe =ya 'töng 'dède kë mü, 'ö dho. 'Yö bɔ Galatö -se waa- Flizi -se -an 'gü, Yesu -wun -dhe 'wun gia- -me -nu =faan' 'më -sü 'ka -an -bha -zo -yö -Zlan -bha -sü 'gü.

Apolösö -bha -bɔ Efezö -dhe waa- Kolentö -dhe -an 'gü -sü

²⁴Zuifö mi do 'wo- -dhe Apolösö 'ö bho Alezandri -pö 'gü, -yö -nu Efezö plöo. -Yö -kë 'dhikanme 'ka, 'ö -Zlan -wo 'ö =bæen' -sü 'ka 'ö- dɔ -së 'ka.

²⁵'Go mü 'wun 'ö -gban Dëmë -wun -dhe 'wun gia- -sü -bha, -ya -daan =va. 'Ö ko 'zü, 'ö pa -sü 'ka 'yënnngsiödhe 'ka, 'ö -Zlan -wo =blæ me -nu -dhë, 'go mü 'ö -an =daan 'wun giagia 'ö -gban Yesu -bha -a 'ka. 'Këe 'wun 'ö -gban -bɔ yiö -sü -bha bhë, Zan -bha -de 'sloo =ne 'ö- dɔ. ²⁶'Ö yö 'wun =blæ' -sü 'gü, Zuifö -nu -bha -bhöküëkɔ 'gü -zo -gban -sü 'ka. 'Këe -dhe 'ö Plisilö waa- Akilasö -waa -wo ma, 'wo- -dhe wo -gɔ kɔɔ, 'wo- =daan -Zlan -bha zian kpinngdhö 'ka. ²⁷=Dhe -kë 'pö, 'ö Apolösö -ya pö ö -'piö kö 'ö bɔ Akai -se 'gü. 'Ö Yesu -wun -dhe 'wun gia- -me -nu 'wo Efezö bhë, 'wo 'sëedhe -kë, 'wo- dɔ -a -gɔ kö -yö dhoë Yesu -wun -dhe 'wun gia- -me -nu 'wo 'ma -an =dhia kö -waan -a -nia 'kun.

=Dhe =ya 'dho =ya -lo, me -nu 'ö -Zlan -bha 'glusë 'gü =wa kë Yesu -wun -dhe 'wun gia- -me 'ka -an 'piö, 'ö -an =faan' më =va 'ka. ²⁸'Këe -yö -to Zuifö -nu -ta ö -wo 'ka -a -zɔn me 'plë -dhë -sü 'ka =ne Zuifö -nu -wo wo -de -piüö -sü 'gü. 'Ö 'yö- -zɔn -an -dhë -a pö -sü 'ka =nëe Yesu 'ö tɔɔ -Zlan -bha -Yame =ne -kɔ 'ö =bæen' -sü 'ka -a 'ka -Zlan -bha 'sëedhe 'gü bhë -a 'dhö.

Pölö -bha -bɔ Efezö plöo -sü

19 ¹Apolösö -yö -kë Kolentö; Pölö -de 'pö -yö -bɔ Azi -se 'gü, 'ö dho 'ö -lo Efezö -pö 'gü. 'Yö -kpën Yesu -wun -dhe 'wun gia- -me -nu 'bhaa -nu -bha mü. ²'Ö -dhe' kɔɔ -an -gɔ 'ö- pö: «=Dhe 'ka Yesu -wun -dhe 'wun gia- =ne, 'ka -Zuu 'slööslö yö =a?»

'Wo- -daa -kë -a -gɔ 'wo- pö: «Yië- ma do -kun =ne -Zuu 'slööslö -yö -dhö kö 'yiën- 'dho -a yö.»

³'Ö Pölö -yö -an =dhe' kɔɔ =nëe: «-Bɔ yiö -sü =suu' -mlë 'ka- wo =e?»

'Ö 'wo- -daa -kë 'wo- pö: «-Bɔ yiö -sü 'ö Zan -ya -wun =blæ bhë 'ö 'yi- wo.»

⁴'Ö Pölö -ya pö -an -dhë =nëe: «Me -nu 'ö 'wo -we -a -bha 'wo go wo -bha =sɔɔn yaa 'gü bhë =ne 'ö Zan -yö -an -bɔ yiö. 'Go mü 'ö- pö Izlaelö -següme -nu -dhë, -wo me 'ö 'dhoë- nu ö =zlöö bhë -a -wun -dhe 'wun gia-; me bhë 'ö tɔɔ Yesu.»

⁵Dhë 'ö 'wun 'ö bhë -waa- ma, 'ö 'wo -we -a -bha 'wo -an -bɔ yiö Dëme Yesu 'tɔ 'ka. ⁶'Ö Pölö -yö ö -kɔ kpa -an -ta -bhea' -sü 'ka, 'ö 'wo -Zuu 'slöölö yö. 'Ö 'wo yö 'wun -nu -blee' -sü -bha -wo 'waa gbë 'gü. 'Go mü 'wo yö -Zlan 'dhi -wo -blee' -sü -bha mē -nu -dhë. ⁷Mē -nu 'wo 'dhö bhë -an -dho 'kuë- -sü -yö -kë mē 'gɔɔ- do ö ga =plē 'ka.

⁸Pölö -yö -dho Zuifö -nu -bha -bhɔkuëkɔ 'gü, 'ö 'wun -blee -zo -gban -sü 'ka. 'Ö 'su -yaaga 'piö 'ö 'wun 'ö -gban -Zlan -bha -gludëdhe -wun -bha 'ö- -blee; 'yö- këdhe =mē mē -nu 'wo wo 'to to -a -wo -bha bhë -an -kɔɔ' =yεε' -sü 'ka kö 'wun 'ö- =blee' -na bhë kö -waan -a -dhe 'wun gia-. ⁹'Kεε mē 'bhaa -nu -wo =gɔɔ' 'gbee- -kë, 'ö waa 'we -a -bha kö -wo Yesu -wun -dhe 'wun gia-. 'Go mü 'zü 'wo 'dhi yaa 'gü -wun =blee kwa Dëme -bha zian 'ö -dho =toëpö 'ka bhë -a -bha, mē gbung 'wo -kë mü -an wö 'dhiö. 'Ö Pölö -yö Yesu -wun -dhe 'wun gia- -mē -nu 'wo bhë -an kpa ö -bha 'ö 'wo go mē gbung 'gü mü. 'Ö yö -an =daan' -sü -bha -dhekpaɔyi 'saadhö 'ka, 'kɔdhi =va 'ö gɔɔn- do 'wo- -dhe Tilanusö 'ö 'wun -blee 'sëgüme -nu -dhë -a 'gü bhë -a 'gü. ¹⁰'Wo- =kaa' 'dhö -kwe =ple -bha. Pë 'ö -kë 'ö mē -nu 'wo bɔ Azi -së 'gü =zian' 'töüdhö 'wo Zuifö 'ka, 'iin 'waa Zuifö 'ka, 'ö -an 'ple -wo 'wun 'ö -gban Dëme -bha -wa ma bhë 'ö bhë.

Seva -bha 'në -nu

¹¹-Zlan -yö -kë -dhidhaapë 'gblüünzë -nu -kë Pölö =kwa' =dhia. ¹²-A 'bhaa -nu =ya kë, sɔ pë -nu 'iin -ta wöödhö sɔ -nu mē 'ö pa Pölö bun 'ka, 'wo =nuë' 'yuame -nu =dhia, 'wo- pa -an 'ka, 'ö -an -bha 'yua -nu -wo bo, 'ö -zuu yaa -nu -wo go -an 'gü.

¹³Zuifö 'bhaa -nu 'wo -kë =nië =dhia, -zuu yaa -nu -bho mē -nu 'gü -sü 'ka, -wa këdhe -mē kö -waan kë Dëme Yesu 'tɔ 'ka 'pö. 'Ö 'wo- pö -zuu yaa -nu -dhë =nεε: «Yi- =blee ka -dhë Yesu 'ö Pölö 'dhö -a -wun =blee' -na bhë -a 'tɔ 'ka, -ka 'go mē 'ö =nε -a 'gü!» ¹⁴(Mē -nu 'wo -kë 'wun 'dhö -a kë -dhia bhë, -wo -kë Zuifö -nu -bha slabhome =va do 'wo- -dhe Seva bhë -a -bha 'në gɔɔn- -nu 'slaple 'ka.) ¹⁵'Yö -zuu yaa 'ö -kë gɔɔn- bhë -a 'gü -ya -pö -an -dhë: «A Yesu -dɔ, 'ö mē 'wo- -dhe Pölö bhë 'a- dɔ 'pö; 'kεε ka -zë, ka -go 'më ε?»

¹⁶'Ö gɔɔn- 'ö -zuu yaa -yö -kë -a 'gü bhë, 'ö -piü -an -ta, 'ö yö -an -ma -sü 'gü, 'ö 'wo =duë, 'wo go -a -gɔ kɔɔ wo bun 'kpaan waa- bhüö -nu 'ö to -an -bha bhë -a 'ka. ¹⁷Mē 'saadhö 'wo -kë Efezö mü, -a Zuifö oo, -a mē 'waa gbë -nu oo, 'wo 'wun 'ö bhë 'wo- ma, 'suö -yö -da -an 'gü, 'ö 'wo yö Dëme Yesu 'tɔ =bhlë -ya -sü 'gü =va 'ka, 'ö =zië' -a 'tɔ =bhlë mē 'wo- -ya 'dhiö bhë -a -ta. ¹⁸Mëdhevadhë 'ö 'wo kë Yesu -wun -dhe 'wun gia- -mē -nu 'ka, 'töng 'ö bhë -a 'ka, -wo -nu 'ö 'wo wo këpë -nu zii -nu -wun =blee mē -nu wö 'dhiö mü. ¹⁹'Ö mē -nu 'wo -kë =dëbɔmē -nu 'ka -bezë bhë, -an =plëëzë -wo nu wo -bha 'sëëdhe -be -nu 'wo -dë bɔ -kɔ -ya 'gü -an 'ka, 'wo -an -güö mē -nu wö 'dhiö -an =suu' -bho sia- -sü 'ka. 'Ö 'sëëdhe -be -nu 'wo 'dhö 'ö

-an -sɔnnŋ' 'dhö 'gbee- bhë 'wo -an -sɔnnŋ' -ya 'ko 'dhiö -kë, 'ö- 'wëü- -yö -kë zën 'tama -vuu 'gɔɔ- 'sɔɔdhu 'ka.

²⁰Kwa Dëme -wo -pen -kɔ 'ö -kë -pen -dhia -a 'ka -a -bha 'piigbeedhe -zɔn -sü 'ka bhë 'ö- 'bhaa 'dhö bhë.

-Zuökaankuëdhe -da -kɔ 'ö- -daa' Efezö plöö

²¹-Dhe 'wun -nu 'wo bhë =wa ziö, 'ö Pɔlö -yö =luu 'ö 'dho Zeluzalemë. -A -bha 'dho -sü 'ka, 'yö -bɔ Maseduanë -dhe waa- Akai -dhe -an 'gü. -Yö -kë -a pö -dhia ö -de 'gü =nɛɛ: «'Ma 'dho Zeluzalemë -sia, a -dho yɛ n 'zü 'a dho Wɔmë, 'ö tɔɔ a- 'piö kö 'a n 'yan dɔ -a -bha.»

²²-Dhe =ya kë 'dhö, 'yö -nu -a -dhë -mɛ =plɛ Timote waa- Elatö 'yö -an bɔ Maseduanë -sɛ 'gü; 'ö yö -zë 'ö 'töng 'dɛɛ 'bhaa -kë Azi 'zü.

²³-A 'töng gia- bhë -a 'ka, 'ö =zuökaankuëdhe =va -yö -da Efezö plöö Dëme -wo -wun 'gü. ²⁴Mɛ do 'wo- -dhe Demetriusö 'ö -kë zëndɔmɛ 'ka 'ö -zlan dhebɔ do 'wo- -dhe Atemi -a -gba -a 'gü -kɔ 'bin -kë zën -nu 'ka. 'Ö =ya kë 'ö 'wëüga =va yö yuö 'dhö bhë -a 'gü, 'ö ö -bha yuökëme -nu -saan' bhoë. ²⁵Demetriusö 'ö bhë 'yö ö -bha yuökëme -nu waa- mɛ -nu 'ö wo -nu wo -bha yuö -yö -kë do bhë -an =dhɔɔ -kë wo 'ko =bhaa; 'ö- pö -an -dhë: «Gɔɔn- -nu, ka gia-, ka- =dɔɔ' =nɛ kwa -bha =naɔ -nu -wo -go yuö 'ö 'kwa- kë -na =nɛ -a 'gü. ²⁶'Kɛɛ gɔɔn- 'wo- -dhe Pɔlö bhë, pë 'ö- kë -na =nɛ, 'kaa- yö -a? Bhii -ya -blɛɛ 'ö- pö -zlan -nu 'ö mɛ 'bhee- -lü 'dhö -an kë -na bhë 'waa -zlan giagia 'ka. Medhevadhe -wa -dhe -na 'wun gia-, 'ö 'yaa -dhe 'ö Efezö zö =nɛ -a -dhe -de 'sloo 'ka, =ya 'to 'tee kö -yaan medhevadhe =zuö' -sië', -yaan -an bho kwa -bha -zlan 'piö Azi -sɛ -dhe 'saadhö 'gü. ²⁷'Wun 'ö 'dhö bhë 'yaa kwa -bha yuö 'tɔ -gɔ zë -sü 'sloo 'ka, 'kɛɛ kö pë 'ö mü 'zü, 'ö tɔɔ kwaa- -zlan dhebɔ =va 'wo- -dhe Atemi -a -gba -a 'gü -kɔ =bhlë 'yaa mɛ gbe 'gü gbɔ. =Ya kë 'dhö 'pö, kö -a -bha 'tɔbhɔdhe 'ö mɛ -nu 'saadhö 'wo Azi -sɛ 'gü waa- 'kpongtaame 'saadhö 'wo- ma bhë =ya 'to 'kpaan.»

²⁸-Dhe 'ö 'to -to -a -wo -bha -mɛ -nu =waa- -wo bhë -a ma, 'ö 'wun -yö -siö -an -dhë, 'wo yö =gblaa 'gbla -sü 'gü -a -pö -sü 'ka =nɛɛ: «=Vadhe -yö kë Efezö -mɛ -nu yi -bha Atemi -bha 'ka!»

²⁹-Zuö 'ö bhë -yö -pen plöö -dhe 'saadhö 'gü. 'Ö mɛ -nu -wo Gayusö waa- Alitaakö -an -gaan gan wo 'piö (mɛ =plɛ 'wo bhë -wo go Maseduanë, 'wo -kë -ziö Pɔlö 'piö -mɛ -nu 'ka); 'wo dho -bla 'ka -an 'ka 'dhëëdhö. ³⁰'Ö Pɔlö -ya -kë kö 'yaan- nu mɛ -gbaa -nu 'wo -kë wo 'ko -bhaa bhë -an 'dhiö. 'Kɛɛ Yesu -wun -dhe 'wun gia- -mɛ -nu 'wo -kë mü waa 'we -a -bha -a -gɔ. ³¹'Ö mɛ =bhlëzë 'bhaa -nu 'wo -kë -a 'bhamɛ -nu 'ka 'wo go Azi -sɛ 'gü, 'wo -kë mü 'wo mɛ bɔ -a -dhë, -bhɛa -a -dhë -sü 'ka =nɛ kö =kun 'ö dho 'dhëëdhö.

³²-Zuökaankuëdhe =va -yö -kë mɛ -nu 'wo dho wo 'ko =bhaa bhë -an ziën, 'wo -kë -zuö =va dɔ =dhia. Mɛ 'bhaa -nu -wo -kë =gblaa 'gbla -sü 'gü -kɔ 'bhaa 'gü, 'ö mɛ 'bhaa -nu -bha 'we -kɔ -yö -kë -kɔ gbe -ta. 'Ö -an medhevadhe 'wo -kë -an ziën waa wo -dho 'kuë- -gen dɔ. ³³Mɛ 'bhaa -nu 'wo -kë mɛ gbung

'gü mü, -wo wo -zo -ta -ne Alezandrë 'ö nu -zuö dɔ -su bhë -a 'ka 'ö tɔɔ -wo Zuifö -nu -yö kö -wo Alezandrë yö -na 'dhiö. -Dhe -ya kë 'dhö, 'ö Alezandrë -yö 'ö -kɔ -ta zë kö -yaan ö -ta -wun -bleɛ'- me gbung -nu 'wo bhë -an -dhë. ³⁴'Këe -dhe 'ö =waa- dɔa -ne Zuifö -mü -a 'ka, 'ö -an 'ple -wo dho wo 'kuë-, 'wo yö -gblaa 'gbla -sü 'gü wo 'ko -yöë', pë 'ö -mɔ 'lele -ple -bha -a 'piö -woë' -nɛɛ: «=Vadhe -yö kë Efezö -me -nu yi -bha Atemi -bha 'ka!»

³⁵=Dhe =waa- kë 'dhö, 'ö 'wunyanbhɔme do 'ö pö- bhë -a 'gü, -yö me gbung -nu bhë -an -ta ga, 'yö- pö: «Efezö -me -nu, me 'ple kwa- =dɔa' =ne me 'ö 'kwa Efezö zö -nɛ, 'ö 'kwa kwaa- -zlan dhebɔ =va Atemi -gba -a 'gü -kɔ waa- -a 'bin 'ö go dhang- 'gü 'ö -püö sia- bhë 'ö 'kwa -an -maa -kë -me 'ka. ³⁶'Ö me gbë 'yaa -dhö kö -yö -kploo 'wun -nu 'wo bhë -an 'ka. -Dhe 'ö 'pö kö -ka dɔ diindhö, 'ka ka =kwaa' -zuö dɔ -sü -zü! ³⁷Bhii gɔɔn- -nu 'wo -nɛ ka -an -kun 'ka nu -an 'ka zö, 'këe kö waa gbapë gbë 'sü kwa -bha -zlan -gba -a 'gü -kɔ 'gü, 'iin waa 'wun gbë =bleɛ'- kwa -bha -zlan dhebɔ 'ka. ³⁸'Ö =ya kë =ne Demetriusö waa- ö -bha yuökëme -nu 'wun -yö -an -gɔ me -nu buëndhö kö zakanyi -yö -dhö; 'go mü me -nu 'ö -wogbiindhe 'dhö -an -gɔ 'wo -dhö. -Dhe bhë =ne 'ö -an =dua' 'dhö -mü kö -waan 'dho wo -bha 'wun 'ka -a -bha! ³⁹'Ö =ya kë =ne 'wun 'bhaa -yö ka -gɔ kö 'kaan- -a =bleɛ'-, kö -ka dhoë me -nu 'wo pödëme -nu 'ka -an 'dhiö, wo 'wo tɔng -nu dɔ bhë =ne 'wo dho -a -bho 'kou kë. ⁴⁰Kö =kun 'ka -zuö dɔ =ne pë 'ö bhë -a 'dhö gbɔ! 'Ö tɔɔ pë 'ka- -kë =dɛɛ bhë 'yaa -së. 'Go mü 'zü, 'wun bhë Wlɔmë -me -nu =waa- ma, -wo -dho za dɔ kwa -bha -a pö -sü 'ka =ne yi 'següme -nu =zuö' =luu' -na 'se =kɔɔnme =va -gɔ. Bhii -dho 'kuë- -kɔ me 'ö =ne -a -gen kpinngdhö 'ö dho za -së nu kwa -dhë 'yaa 'dhö. =Ya 'go mü 'zü, kwa -kɔ 'ka 'dho -mɔa -bha kö -a -gen 'ö dho me 'to kun 'kwa- =bleɛ'-.»

⁴¹=Dhe 'ö Efezö 'wunyanbhɔme bhë =ya yën 'wun -nu 'wo =ne -an =bleɛ' -sü -bha, 'ö- pö me gbung -nu 'wo bhë -an -dhë -wo 'dho.

Pɔlö -bha 'ta 'ö dhoë Maseduanë -dhe waa- Glëkö -dhe -an -bha

20 ¹=Dhe 'ö -zuö -nu 'wo bhë =wa 'kan, 'ö Pɔlö -yö Yesu -wun -dhe 'wun gia- -me -nu =dhɔɔ -kë 'ko =bhaa, 'yö 'wun =bleɛ -an -dhë, -an =faan' 'më -sü 'ka. =Dhe =ya kë 'dhö, 'ö ö -wo -da -an -dhë 'ö dho Maseduanë -se 'gü. ²'Yö bɔ 'se 'ö bhë -a 'gü, Yesu -wun -dhe 'wun gia- -me -nu 'wo mü -an =faan' 'më -sü 'ka, -Zlan -wo =bleɛ -an -dhë -sü 'ka =plëzë 'ka. =Dhe =ya kë 'dhö, 'yö dho Glëkö -se 'gü. ³=Dhe bhë =ne 'ö 'su -yaaga -kë -a -bha. 'Yö ö =kwɛɛ- -nu dhu kö 'yaan- 'dho Sili -se 'gü. 'Këe -dhe 'ö =yaa- ma =ne Zuifö -nu =wa 'dho wo 'ko =zlöö ö -gɔ kö -waan ö zë, 'ö -ye ö 'zü, 'ö dho Maseduanë -se 'gü. ⁴⁻⁵Me 'bhaa -nu yi -dɔ Pɔlö -gɔ, 'yi =loë' Azi -se 'gü; 'ö Pilusö gbö Sopatɛɛ 'yö go Bele 'dhö, Alitaakö waa- Sekundusö 'wo go Tesalɔnikö 'dhö, Gayusö 'yö go Dɛɛbö 'dhö, Timote 'dhö, Tisikö waa- Trofimë 'ö -kë Azi 'në gia- 'ka, 'wo go yi ziën, 'wo dho yi 'dhiö Trɔasö -pö 'gü. -Dhe bhë 'wo dɔ -a -bha yi -gɔ mü.

⁶=Dhe 'ö 'wlaan- 'ö 'wo- -dhe 'wlaan- 'wo =bluu'- 'ö- -bhæpë 'yaa- 'piö 'wo- -bhö -na bhë =ya ziö, 'ö 'yi yi -bha =kwæ- dhu, 'yi -da 'yitagö 'gü Filipö -pö 'gü. 'Ö 'yi -dhekpaçyi 'söodhu -kë zian-, 'ö 'yi yö -an -bha Träsö plöö; 'ö 'yi -nu 'yi 'dhöçgö do -kë mü.

Pölö -bha 'ta -kaanta 'ö dhoë Träsö -pö 'gü

⁷Zuifö -bha =glooyi 'yinia 'piö, yi -kë yi 'ko =bhaa kö 'yiën- -bhöpë 'slööslö 'sü. 'Ö Pölö -yö 'wun =blæ me -nu 'wo -kë wo 'ko =bhaa bhë -an -dhë. =Dhe 'ö -kë =ne -dhe =ya 'po, -yö -dho dho bhë, 'yö 'wun =blæ 'ö dhoë 'ö gbeng ziën -dhe -loë'. ⁸Ködhi 'yi -kë -a 'gü yi 'ko =bhaa, 'kç -dç 'ko -ta dhuö -dhe 'gü bhë =labang -nu -wo -kë mü =va. ⁹Dadhëü 'nëççönzë 'wo- -dhe ötisö -yö -kë -ya -sü 'ka 'kç föödhe -bha kö Pölö -yö -Zlan -wo =blæ' -na 'piö =gbiinzë 'ka; 'ö 'yi -yö -ziö -a 'ka. 'Ö go 'kç -dç 'kç -ta dhuö -dhe -yaaga -naa 'yi -kë -a 'gü bhë -a 'gü, 'ö -püö sia-. -A =luu'- 'wo- wo =ne kö =ya ga. ¹⁰'Ö Pölö -yö =yçç, 'ö =kloo, 'ö- kpa ö -tong -ta. =Dhe =ya kë 'dhö 'ö- pö: «Kö =kun 'ö 'suö -yö ka -kë; -yö 'bhee-!» 'Ö- to me -nu 'wo to -an kwëe kö -yö 'bhee-.

¹¹'Go mü 'ö Pölö -da dhuö 'ö =bluu'- -kaan 'ö waa- Yesu -wun -dhe 'wun gia- -me -nu 'wo- -bhö. =Dhe 'ö =ya 'wun =blæ'- 'zü 'piö =gbiinzë wo, 'ö -dhe =ya poë 'ö ö -wo -da 'ö dho. ¹²'Nëççönzë 'ö =sia -a 'bheezë =ne 'ö me -nu -wo dho -a 'ka -a -gç kçç 'ö -kë -an 'plæ -bha 'yënng =dhuë' -wun -va 'ka.

'Ta 'ö Pölö dhoë Träsö 'ö bça mü 'ö dhoë Mile

¹³Yi -dho 'dhiö, 'yi -da 'yitagö 'ö dho yi 'ka pödhe 'wo- -dhe Asösö bhë -a 'gü. -Dhe bhë =ne 'ö Pölö dho -da -a -bha 'yitagö 'gü yi 'piö; bhii 'ö tçç -ya -pö yi -dhë ö -dho ta sia- 'ö nuë. ¹⁴=Dhe 'ö =ya nu, =ya yö yi -bha mü, 'ö 'yi- sü yi -bha 'yitagö 'yi nuë bhë -a 'gü, 'yi dho Mitilenë plöö. ¹⁵Yi go -dhe bhë -a 'gü, 'ö -dhekpaçyi me 'ö yö -a 'piö, yi =loë' Sio -dhe 'sçç. -A -dhe me 'ö -po -a 'piö 'zü, 'yi dho Samösö plöö; 'ö -dhekpaçyi me 'ö yö -a me bhë -a 'piö 'zü, 'yi dho Mile -pö 'gü. ¹⁶Pölö -ya -pö 'yi bç Efezö -pö 'sçç; 'këe kö -kun 'yi =gbaannu mü, -yö kë 'dhö kö -kun 'ö 'töng dho -ziö yi -ta Azi -se 'gü. 'Siö -yö -kë -kpa -a -ta -dhia, bhii -yö kë -a 'piö kö 'yiën- -lo Zeluzalemë, Pantëktö 'wlaan- -yi gia- 'ka.

Pölö -yö 'wun -blæ me ziizii 'wo Yesu -wun -dhe 'wun gia- -me -nu 'wo Efezö plöö -an -dhë

¹⁷=Dhe 'yië -lo Mile plöö, 'ö Pölö -yö me bç me ziizii -nu 'wo Yesu -wun -dhe 'wun gia- -me -nu -dho 'kuë- -sü 'gü Efezö plöö -an -dhë kö -wo nu. ¹⁸=Dhe 'ö =wa nu =wa -lo -a 'piö, 'ö- pö -an -dhë: «Ka gia-, ka n kë -kç 'a n -de -kaa' 'töng 'a =kaa' ka 'piö 'ö sü yi -blæzë 'a nuë Azi -se 'gü -a -bha 'ö dho 'ö yöë =dæe -bha bhë -a -yö; ¹⁹A yuö -kë Dëme -dhë, -de -dho sia- -sü, 'gbo bç -sü waa- -bç 'wun 'gbee- 'gü -sü 'ka, Zuifö -nu -bha =sua -wun 'wo

dhoë wo 'ko -zlöö n -gɔ bhë -a 'gü. ²⁰Ka- =dɔa' =nɛ pë -nu 'ö dho 'wun -zɔn ka -dhë ka -bha dha -sü 'gü, n 'ka- gbe -bin ka -gɔ, 'kɛɛ a ka -daan -an 'ka mɛ 'plɛ wö 'dhiö 'iin 'zü ka -gɔ kɔɔdhe -nu -bha. ²¹A mɛ -nu 'wo Zuifö 'ka, waa- mɛ -nu 'waa Zuifö 'ka -an -dhɔɔ -kë =woë' =nɛ -wo 'go wo -bha -sɔɔn yaa -nu 'gü, -wo =dhië' -kwa -bha -Zlan 'piö -zian', 'go mü -wo Dème Yesu Klito -wun -dhe 'wun gia-. ²²Dhe -kë 'dhö, a 'dho -na Zeluzalemë =nɛ -kɔ 'ö -Zuu 'slööslö -ya pö 'a- kaa bhë -a 'dhö, 'kɛɛ kö pë 'ö dho kɛ n 'ka 'dhiö 'ma, 'maa- dɔ. ²³Pë do 'a- dɔ 'ö tɔɔ -dhe 'saadhö 'a bɔ -na -a -bha, -Zuu 'slööslö -ya -pö n -dhë =nɛɛ -dho -kanso 'kɔɔdhö -sü 'iin 'yënnghɔdhe -wo -ya -sü 'ka n -ma 'ka. ²⁴Pë 'a- dɔ 'ö tɔɔ n -ma -kë -a 'gü -sü =bhlë 'yaa -dhö, ma gia- n -ma 'ka. 'Kɛɛ pë dho kɛ 'ö tɔɔ a -mɔ Dème Yesu -bha yuö 'yö- dɔ n kwɛ bhë -a 'dhiö 'to -sü -bha. Yuö bhë 'ö tɔɔ 'wuntasë 'ö -gban -Zlan -bha 'glusë 'ö- -kë mɛ 'bhee- -nu 'ka, -a -wun -bha bhë 'a- =blɛɛ' -mɛ -nu -dhë.

²⁵A -kë ka ziën 'dhiö 'wun 'ö -gban -Zlan -bha -gludëdhe -bha bhë -a =blɛɛ ka -dhë -sü 'ka. 'Kɛɛ a- =dɔa' zlöö =nɛ mɛ gbe 'yaa -dhö ka ziën gbɔ kö -yö 'ö 'yan dɔ n -ma, 'ö tɔɔ a 'dhoë- 'go ka 'piö. ²⁶Pë 'ö -kë 'ö =dɛɛ =nɛ 'a- pö -na ka -dhë -kɔ =yɔɔn -a -ta -sü 'ka =nɛɛ: Mɛ 'ö 'dhoë- 'ö -de =dhɔng zian kpengdhö =nɛ -a -ta ka ziën kö n -kɔ 'yaa- 'gü bhë 'ö bhë. ²⁷Bhii pë -nu 'wo -gban -Zlan -bha ka dha -sü 'ö- yö 'ko 'dhiö 'ö -de =zuö' 'piö bhë -a -bha, a- 'plɛ -blɛɛ ka -dhë, n 'ka- gbe -bin ka -gɔ. ²⁸-Ka ka -zo kɛ ka -de 'piö, 'ka ka -zo kɛ -tuë -pë 'ö -Zuu 'slööslö -yö ka -ya -an -maakëmɛ -nu 'ka -an 'piö! 'Go mü 'zü, -ka ka -zo kɛ -Zlan -bha mɛ -nu -dho 'kuë- -sü, 'ö yö gia- 'ö- dhɔ 'ö -de Gbö fei 'ö- -lo -an -wun 'gü bhë -an 'piö 'pö! ²⁹Bhii a- =dɔa' =nɛ =ya kɛ =nɛ 'ma 'dho, mɛ -nu 'wo dho bhɔ -tɔn -bha gben- 'dhiözë -nu -bha, 'ö 'wo dho 'wun yaa -nu kɛ 'bhla -tuë -nu 'ka, -wo -dho nu ka ziën. ³⁰'Ö ka ziëndhe gia- 'gü mɛ 'bhaa -nu dho -luu' -waan -sua -wun -nu =blɛɛ', -waan Yesu -wun -dhe 'wun gia- -mɛ bho zian kpengdhö -ta kö -waan ziö wo 'piö. ³¹-A -wun 'gü -ka ka -zo kɛ ka -de 'piö! 'Go mü 'zü, -yö kɛ ka 'yaan =nɛ a -kë ka 'piö -kwe -yaaga 'piö. 'Töng 'saadhö 'ka, 'a -dhio dɔ ka -dhë, bhii a -kë -ya -sü 'ka ka =wuën' kö a 'gbo -nu bɔ -na.

³²Zlöö =nɛ bhë, 'ma ka 'kluën bho -Zlan -bha kö -yaan 'ö -zo kɛ ka 'piö. 'Go mü 'zü 'wuntasë 'ö -gban -a -bha 'glusë -bha, -yö -dho 'ö -zo kɛ ka 'piö 'pö. -Kɔ -mɔ 'wun -bha -sü -yö -Zlan -gɔ kö -yaan ka =faan' 'më, 'go mü kö -yaan pë -sɛɛbɔ -nu 'ö -an 'tɔ go, 'ö -an -ya mɛ -nu 'saadhö 'wo- -bha 'ka -an -gɔ bhë -yaan nu ka -dhë. ³³N -zo yaa kɛ mɛ gbe -bha 'wëü- -nu, 'sënnng -nu, sɔ -nu -an gbe 'piö. ³⁴Ka gia-, ka- =dɔa' =nɛ ma gia- n =kwa' -yuö =nɛ 'a- -kë 'ö ma 'dhö, n 'piö -mɛ -nu 'dhö, pë 'ö yi -bha -wun -yö yö -a -bha 'a- yö. ³⁵-A -kë 'dhö -sü 'ka, a- -zɔn ka -dhë =nɛ, 'ka yuö kɛ kö 'kaan- nu 'yename -nu -dhë, kö kwa -zo -yö -büö kwa Dème Yesu -wo 'ö -kë =nɛɛ: <Ü -bha pë -nu mɛ -dhë -sü -yö ü -bha 'wun -së =va 'ka 'ö =zië' mɛ -bha pë -nu ü -dhë -sü -ta.> »

³⁶-Dhe 'ö Pölö =ya yën 'wun =blæ' -sü -bha, 'ö waa- me -nu 'wo bhë 'wo -lo wo kpon 'gü, 'wo =bhea -Zlan -dhë. ³⁷-Dhe ö =wa yën =bhea' -sü -bha, 'wo wo -wo -da Pölö -dhë 'gbo 'ka, 'ö tɔɔ Pölö -dho -yö -an -kë =duö. ³⁸-An 'ple wöodhe -yö -kë -siö -sü 'ka =duö, -a pö 'ö Pölö -ya wo =ne wo 'ka 'dho wo 'yan dɔ ö -bha gbo bhë -a -wun 'gü. 'Ö 'wo- dɔ zian, 'wo dho 'wo =loë' 'yitagɔ =taa.

Pölö -bha -dho Zeluzalemë -sü

21 ¹-Dhe 'yië -kan yi 'kuë-, 'yi -da 'yitagɔ 'gü, 'yi dho vëedhö Kɔsö -se 'gü. =Dhe 'ö- -ta -dhe =ya =kpaɔ, 'yi dho Lɔdö, 'ö 'go mü 'zü, 'yi dho Patala plöö. ²'Ö 'yitagɔ do 'ö -kë dho =dhia Fenisi -se 'gü, 'yi- yö. 'Ö 'yi -yaa 'gü 'yi dho. ³'Yi dho 'yi -lo 'segɔ 'ö 'yi ziën 'wo- -dhe Siplë -a 'sɔɔ; 'segɔ bhë yi -to 'yitagɔ 'gü, 'yi- yö yi 'dhiö. 'Ö 'yi- to yi =kwaa- 'gü =zian, 'yi dho Sili -se 'gü =zian'. 'Yi dho 'yi -lo Tii, -dhe 'ö 'yitagɔ dho =kwæɛ- =yɔɔ'- -a -bha bhë -a -bha, 'yi =yɔɔ mü.

⁴Yesu -wun -dhe 'wun gia- -me 'wo -kë mü bhë, =dhe 'yi -an yö, 'yi 'dhɔɔɔ do -kë -an 'piö mü. 'Ö -Zuu 'slööslö -yö bɔ Yesu -wun -dhe 'wun gia- -me -nu 'wo 'ma bhë -an -ta, 'wo- pö Pölö -dhë kö =kun 'ö dho Zeluzalemë. ⁵-Dhe 'yi 'dhɔɔɔ do 'dhiö pa -an 'piö mü, 'ö 'yi 'dhoë- dho yië- 'ta 'ka 'dhiö, 'ö wo -nu, wo -bha dhoo -nu, wo -bha 'në -nu, 'wo yi dɔ zian- 'yi goë plöö, 'yi =loë' 'yoo 'dhiö. -Dhe bhë -a 'gü, 'yi -lo yi kpon 'gü 'yi =bhea. ⁶-Dhe 'yië yën -wo -da yi 'ko -nu -dhë -sü -bha, 'ö 'yi -da -na 'yitagɔ 'gü, kö wo -de 'pö -wo 'dho -na wo -gɔ plöö.

⁷'Ö 'yi dho yi -bha 'ta 'ka 'dhiö, 'yi =loë' Tolemaisö plöö. 'Ö 'yi -büö -da dhegluzë -nu 'wo -kë mü -an -dhë, 'ö -dhekpaɔyi me bhë 'yi- -kë -an 'piö mü.

⁸-Dhe -dhe =ya 'po, 'ö 'yi dho yi -bha 'ta 'ka 'dhiö, 'yi dho 'yi -lo Sezale plöö. -Dhe bhë -a 'gü 'yi -da -Zlan -wo =blæ' -me Filipö -gɔ kɔɔ, 'ö 'yi wɔ mü. Filipö bhë -yö -kë me -lü 'slaple 'wo -an -ya Zeluzalemë bhë -a me do 'ka. ⁹'Ö- 'dhu -dɔ 'püë- -nu -yiisië -wo -kë -Zlan 'dhi -wo =blæ' -me -nu 'ka. ¹⁰Yi -dhekpaɔyi =plëézë -kë mü. 'Ö -Zlan -wodhiölome do 'wo- -dhe Agabusö 'ö go Zude -se 'gü, 'ö nu yi 'piö. ¹¹'Ö Pölö -bha -dɔ sɔ -ta -du kwi sü, 'yö ö -gen -nu, ö -kɔ -nu -lö -a 'ka, 'ö- pö: «'Wun 'ö -Zuu 'slööslö -ya =blæ 'ö =nɛɛ: <Gɔɔn- 'ö- -bha -du kwi 'dhö =nɛ, Zuifö -nu -wo -dho -a -lö Zeluzalemë =nɛ -kɔ =nɛ -a 'dhö. 'Go mü 'wo dho -a dɔ me -nu 'waa Zuifö 'ka -an kwæɛ.»

¹²-Dhe -wo -nu 'wo bhë 'yië- ma, yi gia- -nu, me -nu gia- 'wo -kë Sezale, 'yi- pö Pölö -dhë kö =kun 'ö dho Zeluzalemë. ¹³'Yö- -daa -kë 'ö- pö: «-Më 'ö -kë 'ka 'gbo -nu bɔ kö n =zuö' 'klo -yaan bhɔ =ɛ? Pë 'ö n -zo 'piö bhë -a 'ple 'yaa -mü tɔɔ n -lö -wun, 'kɛɛ -yö n -dhë -së 'pö kö 'a ga Zeluzalemë Dëme Yesu -wun 'gü.» ¹⁴'Kɛɛ =dhe 'ö -kë =nɛ Pölö 'yaa 'we -na yi -wo -bha, 'ö 'yi yi bo -a -pö -a -dhë -sü 'ka kö =kun 'ö dho, 'ö 'yi- pö: «Pë 'ö kwa Dëme -zo 'kun -wun 'ka, -yö kë!»

15=Dhe 'yië -dhekpaɔyi 'bhaa kë mü, 'yi yi -bha -kwæ- dhu 'yi dho Zeluzalemë. 16=Yesu -wun -dhe 'wun gia- -mɛ 'bhaa -nu 'wo go Sezale, -wo -ɔ yi -gɔ yië- 'ta 'sü -sü -nu 'gü. 'Wo dho yi 'ka gɔɔn- 'wo- -dhe Nasɔn 'ò go 'sego 'ò 'yi ziën 'wo- -dhe Siplë -a 'gü, 'ò -kë Yesu -wun -dhe 'wun gia- -mɛ zii 'ka bhë -a -gɔ kɔɔ, 'ò 'yi -wɔ mü.

Pɔlö -bha -bhɔɔhia -kë Zakö -gɔ -sü

17=Dhe 'yië 'dho 'yië -lo Zeluzalemë, yi dhegluzë -nu 'wo mü -wo yi -nia -kun =zuögludhi 'ka. 18=Dhe -dhe =ya 'po, yië- Pɔlö -nu 'yi dho Zakö -gɔ kɔɔ, -dhe 'ò Yesu -wun -dhe 'wun gia- -mɛ -nu 'wo 'ma -an -bha mɛ ziizii -nu -wo nu -a -bha wo 'ko =bhaa mü bhë -a 'gü. 19'Ò Pɔlö -yö -büö -da -an -dhë, 'go mü 'ò pë -nu 'ò -Zlan -yö bɔ -a 'ka Pɔlö -ta 'ò- -kë mɛ -nu 'waa Zuifö 'ka -an ziën bhë, 'ò- =blɛɛ -an -dhë do do 'ka.

20=Dhe 'ò- -wo -nu 'wo bhë =waa- ma, 'wo yö -Zlan 'tɔ -blü -sü 'gü. =Dhe =ya kë 'dhö, 'wo- pö Pɔlö -dhë: «Yi dheglu, -bhö ü 'to 'to yi -wo -bha! Pë -nu 'wo kë -na Zeluzalemë plöo zö 'wo =nɛ: Zuifö -vuu =plëzë =wa kë Yesu -wun -dhe 'wun gia- -mɛ 'ka. -An 'plɛ, -Zlan -bha tɔng -nu 'ò Moizö -ya nu kwa -dhë bhë, -wa -kun -së 'ka. 21 'Kɛɛ -wa -ma =nɛ ü Zuifö -nu 'wo -pɛn -sü 'ka 'se gbe -nu 'gü, ü -an -daan =nɛ -wo wo =kwaal- Moizö -bha tɔng -nu -zü, 'go mü kö -kun 'wo wo -bha 'në -nu zë 'bɔng, 'iin kö -kun 'wo 'ta sü Zuifö -nu -bha wɔ -kɔ 'ka. 22=Dhe 'ò 'dhö kö kwa -dho -a -kɔklë =ɛ? Yi- ɔ =nɛ mɛ -nu -wo -dho dho wo 'kuë- dhö =va 'ka. Bhii -wo -dho -a ma =nɛ 'bha nu zö. 23=Dhe -kë 'dhö pë 'yi 'dhoë- -a pö ü -dhë =nɛ, -bhöë kë! Gɔɔn- -nu -yiisië 'ò 'wo pë do 'tɔ go -Zlan -dhë -wo yi -gɔ zö. 24'Dho -an 'piö kö kaa- mɛ -nu 'wo bhë 'kaan- -bhɔkuédhe 'ò dho ka kë 'slööslö -Zlan wö 'dhiö -a kë ka 'ko -bhaa! 'Go mü 'zü 'üën- -an -bha -kë 'slööslö -sü slabhoëpë 'wëüga nu! -Ya kë 'dhö, mɛ 'plesen dho -a 'wun ɔ =nɛ pë -nu 'wo- =blɛɛ ü -gɔ bhë, 'wun gia- 'yaa -mü, 'kɛɛ ü ü -bha -tosiadhe -kë Moizö -bha tɔng 'kun -sü 'ka. 25-A mɛ 'ò -gban mɛ -nu 'ò 'waa Zuifö 'ka, 'ò =wa kë Yesu -wun -dhe 'wun gia- -mɛ -nu 'ka bhë, pë 'ò 'yi- yö -së -an -bha 'ka 'yi- =blɛɛ -an -dhë 'sëédhe 'gü, 'yi- bɔ -an -dhë 'ò tɔɔ: Kö -kun 'wo -köpë -nu 'wo sla- bho -na -an 'ka gɔpë -nu -dhë bhë 'wo- -bhö; kö -kun 'wo fei -bhö! 'Go mü kö -kun 'wo wü 'ò- fei yaa -lo 'wo- -bhö, 'ò tɔɔ -yö -ga -nëngdhe 'gü. 'Go mü 'zü kö -kun 'ò mɛ gbe -yö -da 'ò 'bha -bha dhe 'piö; kö -kun dhe bɔ gbe -yö -da 'ò 'bha dhe -bha gɔɔn- 'piö, kö -kun -dadhëü -nu -wo wɔ -kɔ yaa -kë wo 'ko 'piö!»

26=Dhe =ya kë 'dhö, 'ò Pɔlö waa- gɔɔn- -nu -yiisië 'wo bhë 'wo dho. =Dhe 'ò -dhe =ya =kpaɔ, 'ò wo 'plɛ 'wo -kë 'slööslö -sü -bhɔkuédhe bhë -a -kë wo 'kuë-. 'Yö Pɔlö dho -Zlan -gba -a 'gü -kɔ 'gü, 'ò 'töng 'ò -kë 'slööslö -sü bhë 'ò dho yën -a 'ka bhë 'ò- pö mɛ -nu -dhë. 'Ò tɔɔ yi 'ò 'dhö bhë, 'ò dho mɛ -nu -yiisië 'wo bhë -an -bha slabhopë =sɔnng' nuë.

Pɔlö -kun -Zlan -gba -a 'gü -kɔ 'gü -kɔ

27=Dhe 'ò -dhekpaɔyi 'slaple 'ò Pɔlö -ya -wun =blɛɛ bhë -yö 'dhoë- -lo, 'ò Zuifö -mɛ 'bhaa -nu 'wo go Azi =zian, 'wo Pɔlö yö -Zlan -gba -a 'gü -kɔ 'gü.

'Ö 'wo me -gbaa =zuö' =luu Pölö -gɔ kö -waan -a kun. ²⁸'Wo yö =gblaa 'gbla -sü 'gü =woë' =nɛɛ: «Izraelö -mɛ -nu, -ka nu yi -dhë! -Ka -dhe -ga, gɔɔn- 'ö -nɛ -yö -bɔ -dhe 'saadhö 'plɛ 'gü, 'ö me 'plɛ -daan -a pö -sü 'ka =nɛɛ me 'yi Izraelö -mɛ -nu 'ka, Moizö -bha tɔng -nu waa- -Zlan -gba -a 'gü -kɔ 'ö =nɛ yi =bhlë 'yaa -dhö! 'Go mü 'zü, =ya -da me 'yaa Zuifö 'ka -a 'ka kwa -bha -Zlan -gba -a 'gü -kɔ 'gü; -dhe 'ö 'slöösLö bhë =yaa- kaa -dhuuzë!» ²⁹(Pë -kë 'wo- pö 'dhö bhë 'ö tɔɔ Trofimë 'ö go Efezö bhë, -wa -yö Pölö 'piö, pö- bhë -a 'gü, 'ö 'wo wo -zo -ta =nɛ Pölö -yö =daa' -Zlan -gba -a 'gü -kɔ 'gü.) Kë 'ö- wo 'dhö bhë -a -gen tɔɔ me -nu 'waa Zuifö 'ka -an =dua' 'yaa -mü kö -wo -da Zuifö -nu -bha -Zlan -gba -a 'gü -kɔ 'gü. ³⁰Ko =blüüblüdhe -yö -mɔ pö- bhë -a 'gü. 'Ö pö- bhë -a 'gü -mɛ -nu -wo -bla sü, 'wo goë -dhe 'saadhö -bha, 'wo nu 'wo Pölö kun 'ö 'wo- =gbɔɔ gbɔ, 'wo- bho -Zlan -gba -a 'gü -kɔ 'gü. 'Wo to mü, 'wo 'kwɛɛ -nu -ta. ³¹-Wo -kë -a këdhe =mɛɛ' =dhia -be kö -waan Pölö zë. 'Ö to mü, 'ö 'wun bhë 'ö- -taɔ -yö -lo Wlɔmë -mɛ -nu -bha 'dhasi =lame =va 'ö -kë Zeluzalemë plöö mü -a -ta =nɛɛ, 'ko =blüüblüdhe =ya -da plöömɛ -nu ziën -de. ³²-Dhe do bhë 'ö to -a -bha 'ö 'dhasi -gɔmɛ waa- 'dhasi -nu -an sü ö 'piö, 'wo dho me -gbaa 'gü 'ma. =Dhe 'ö -an 'yan =ya -kpën 'dhasi =lame =va waa- 'dhasi -nu gia- 'wo bhë -an -bha, 'wo wo bo Pölö -ma -sü 'ka.

³³=Dhe =ya kë 'dhö, 'ö 'dhasi =lame =va -yö =yɔɔn Pölö -bha 'ö- pö ö -bha 'dhasi -nu -dhë -wo Pölö 'kun, -wa -lö =yɔɔga =plɛ 'ka. 'Go mü 'yö me -nu 'wo -kë Pölö -zü 'to bhë 'ö -an =dheɛ' kpɔ pë 'ö- 'ka 'iin pë 'ö- -kë -an -wun 'ka. ³⁴Kɛɛ me -gbaa -nu 'wo bhë -an ziën me 'bhaa -nu -wo -kë =gblaa 'gbla -sü 'gü 'wun gbɛ 'ka, kö- me 'bhaa -nu -bha -yö kë -na 'wun gbɛ 'ka. =Dhe 'ö -wo do kpengdhö 'ö 'dhasi =lame =va dhoë- ma yaa kë -dhö -an ziën, 'yö- pö ö -bha 'dhasi -nu -dhë -wo 'dho Pölö 'ka -an -bha -yadhe -bha. ³⁵=Dhe 'ö =wa -lo 'kɔ 'kpan 'dhiö 'ö 'dhasi -nu -de gia- -wo Pölö -bun wo -kɔ -ta dhuö, me gbung -nu -gɔ dɔ 'wo- wo 'yënnɔ -a -gɔ bhë -a -wun 'gü. ³⁶Bhii 'ö tɔɔ me -nu 'saadhö 'wo -kë -ziö -an 'piö =dhia, -wo -kë -a pö =dhia -wa zë.

Pölö -bha ö -de -ta -za dɔ -sü

³⁷'Dhasi -nu -wo -kë 'dho =dhia Pölö 'ka wo -gɔ -yadhe -bha, 'ö Pölö -ya pö -an -bha =lame =va bhë -a -dhë Glékö -wo 'gü =nɛɛ: «A -mɔa -bha kö 'a 'wun 'bhaa =blɛɛ ü -dhë -a?»

'Ö 'dhasi =lame =va bhë -ya =dheɛ' kpɔ 'ö- pö: «Ü Glékö -wo -ma -a? ³⁸=Dhe 'ö 'dhö bhë kö 'bhaa Ezitö mi 'ö nu me -nu =zuö' =luu' -sü 'ka 'sɛ =kɔɔnmɛ -gɔ bhë, 'ö dho mezëmɛ -nu -vuu -yiisië 'ka 'yënnɔ =taa zö =nɛ -a 'ka a?»

³⁹'Ö Pölö -ya -daa -kë 'ö- pö: «Zuifö -mü n 'ka, 'ö 'a Taasö -pö 'ö Silisi -se 'gü 'ö- 'tɔ 'dhö bhɔ -sü 'ka bhë 'a- 'gü 'në 'ka. -Bhö 'we -a -bha n -gɔ kö 'a 'wun =blɛɛ' -mɛ gbung -nu 'wo =nɛ -an -dhë!»

⁴⁰'Ö 'dhasi =lame =va 'ö bhë 'yö -we -a -bha -a -gɔ. 'Ö Pölö -yö dɔ 'kɔ 'kpan -ta, 'ö ö -kɔ -ta zë me -nu 'wo bhë -an -dhë.

=Dhe 'ö -dhe -ta =ya ga diindhö, 'ö Pölö -yö 'wun =blee -an -dhë -an -de -gɔ Eblö -wo 'gü 'ö- pö:

22 ¹«N dhegluzë -nu, n dë -nu, -ka ka 'to 'to n -de -bho ka kwεε -wun 'a 'dhoë- =blee ka -dhë -ne -a -bha!»

²Dhe 'ö =waa- -bha 'wun -blee wo -wo 'gü -sü ma, 'ö -dhe -yö ga diindhö 'zü -duö -an -ta. 'Ö Pölö -yö 'wun =blee -an -dhë 'ö dho -a 'ka 'dhiö 'ö- pö: ³«Zuifö -mü n 'ka, a -bho Taasö -pö 'ö Silisi -se 'gü bhë -a 'gü, 'kεε 'a -kpεa Zeluzalemë zö. 'Ö n -daanme -yö -kë Gamalielö 'ka, 'yö n -daan -së 'ka kwa 'bhema -nu -bha tɔng 'kun -ko 'ka. A -pa -kë 'siözë -sü 'ka -Zlan -bha yuö kë -sü 'gü -ne -ko ka gia- 'ka- 'ka -dεε -ne -a 'dhö 'pö. ⁴A me -nu 'wo kwa Dëme -bha 'wun -dhe 'wun gia- -zian -dëü gbe 'ö bhë -a sü, a -an 'klo -bho, 'a -an zë -a 'ka. A gɔɔn- -nu, dhoo -nu -an -kun, 'a -an -zuö -kanso 'gü. ⁵Slabhome =va waa- me ziizii -nu 'wo Zeluzalemë zö, -wo -dho -yɔɔn n -wo -ta =ne 'wun gia- 'a- =blee. Me gia- 'wo bhë -wo 'sëédhe -nu n -dhë kö 'a dhoë 'aan- -zɔn kwa dhegluzë -nu 'wo Zuifö 'ka 'wo Damasö plöo -an -dhë. 'A dho kö 'aan- Yesu -wun -dhe 'wun gia- -me -nu 'wo 'ma -an 'kun, 'aan- nu -an 'ka Zeluzalemë kö -an 'klo -yaan bho.

(Këyuö -nu 9.1-19; 26.12-18)

⁶Dhe 'ma -da zian -ta, 'a =yɔɔn -na Damasö -dhe 'sɔɔ, 'ö to mü kö lënnɔ 'gü -dhe =ya dɔ bhë, 'ö -dhepuudhe =va -yö go dhang- 'gü, 'ö bhüi n -zü 'to, '7'a -püö sia-, 'ö 'a -wo do ma. 'Ö 'we -wo bhë 'ö- pö: «Sölö, Sölö, -më 'yö -kë 'ü n 'klo bho =e?» ⁸'A- =dheε' kpɔ 'a- pö: «Dö -mü ü 'ka ε, n Dëme?» 'Ö- pö n -dhë: «Ma Yesu 'go Nazaletë 'ü n 'klo bho -na bhë.» ⁹Me -nu 'wo -kë n 'piö, -wo -dhepuudhe bhë -a -yö, 'kεε 'we -wo 'ö 'wun =blee n -dhë bhë waa- ma. ¹⁰'A- =dheε' kpɔ 'zü 'a- pö: «-Më 'a dho -a kë =ε, n Dëme?» 'Yö- pö: «-Bhö -luu' -ü 'dho Damasö! -Dhe bhë -a 'gü -ne pë 'ö -Zlan 'dhö -a 'piö kö 'ü -kë bhë, 'wo dho -a =blee' -a -bha ü -dhë.» ¹¹Dhe -kë -ne n 'yënnɔ -yö -trö -sü 'ka, -dhepuudhe 'bhü 'ö yö n 'yënnɔ bhë -a -wun 'gü, n -ma me -nu -wo -ya n -kwεε' -bha, 'wo -da n 'ka Damasö plöo.

¹²Gɔɔn- do 'wo- -dhe Ananiasö 'ö -Zlan -bhlëyame giagia 'ka, 'ö -kë me 'ö kwa -bha tɔng -nu kun -a 'ka, 'ö Zuifö -nu 'wo Damasö plöo 'wo- -wun -sεεbɔ -nu -blee bhë -yö -kë mü. ¹³-Yö -nu 'yö n yö, 'ö- pö n -dhë: «Sölö, n dheglu, ü 'yan -yö -dhe yö 'zü -dëüwo!» 'Ö to mü, 'a -dhe yö 'zü 'ö 'a- ga. ¹⁴'Ö- pö n -dhë: «Kwa 'bhema -nu -bha -Zlan -yö ü -sü 'dhiö kö 'üen- pë 'ö- -zo 'kun -pë 'ka -a dɔ kö me 'ö me do 'kpaan 'ö kpengdhö 'ö- Gbö 'ka bhë 'üen- yö, 'go mü kö 'üen- -a 'dhiö -wo -nu ma. ¹⁵Bhii ü -dho kë -a -bha -tɔmɔ 'ka, kö pë 'ü- yö -waa pë 'ü- ma, -a =blee' -me -nu 'saadhö wö 'dhiö. ¹⁶Dhe 'ö 'dhö, -më 'ü -ya -a -gɔ -ε? -Bhö -luu', 'ü- kë kö -wo ü -bɔ yiö, 'ü- kë 'zü kö -Zlan -yö ziö ü -bha 'wun yaa -nu -ta Dëme -dhe -sü 'ka kö -yaan nu ü -dhë.»

**'Dho -ko 'ö Pölö -yö dhoë me -nu 'waa Zuifö
'ka -an 'piö bhë, -ya -wun -blee**

¹⁷Pölö -yö 'wun -blee 'ö dho -a 'ka 'dhiö 'ö- pö: «=Dhe =ya kë 'dhö, a -ye n 'zü 'a nu Zeluzalemë. Yi do 'ka, =dhe 'a -kë -bhea' -sü 'gü -Zlan -gba -a 'gü -ko

'gü bhë, 'ö 'a 'yanpiöpë do -yö. ¹⁸'Yanpiöpë 'ö bhë -a 'gü, a kwa Dëme -yö, 'ö-pö n -dhë: «-A kë 'siösiö 'ü 'go Zeluzalemë -dhe 'ö -ne -a -bha! Bhii -a 'gü -me -nu waa 'dho we n -wun 'ü- =blee' -na -an -dhë bhë -a -bha.» ¹⁹'A- -daa -kë -a -gɔ 'a- pö: «N Dëme, wo gia- -wa =dɔa' -ne, me -nu 'wo ü -wo -dhe 'wun gia-, a -an -zuö -kanso 'gü. 'Go mü 'zü 'a- -kë 'wo -an -ma -klaa 'ka Zuifö -nu -bha -bhɔküëkɔ -nu 'gü. ²⁰'Ö go mü, yi 'wo Etienë 'ö ü -bha 'wun -nu =blee me -nu -dhë bhë 'wo- zaa bhë, a -kë mü, 'ö ma -de 'pö 'ö- 'yi -yö -kan n -dhë 'ö 'a -an -bha gblang -nu =waannu.» ²¹'Këe kwa Dëme -ya -pö n -dhë: «-Bhö 'dho, bhii a ü -bɔ 'ma =gbiin me -nu 'waa Zuifö 'ka -an 'piö!» »

Pölö waa- Wlömë -me -nu -bha 'dhasi -lame -va

²²Me gbung -nu 'wo bhë -wo wo 'to -to -a -wo -bha 'ö dhoë 'ö 'wun -nu bhë 'ö- 'ple =blee -a 'ka. 'Këe =dhe 'ö- -wo -kaanta 'ö -kë -a -bha 'dho -sü me 'waa Zuifö 'ka -an 'piö bhë 'wo- ma, 'ö -an 'ple -wo yö =gblaa 'gbla -sü 'gü -nëe: «Gɔɔn- bhë, -kaa zë, 'ka- bho me -nu 'yan 'dhiö! -Tosiadhe kë -sü yaa- ma 'kun!»

²³'Wo yö =gblaa 'gbla -sü 'gü kö -wo wo -bha sɔ -nu =pɛɛ' -na wo -de -bha, 'go mü kö -wo -büöbi -nu -pɛn -na 'dhuu, 'ö tɔɔ kö Pölö =ya 'wun yaa =blee' -Zlan -gɔ wo 'gü.

²⁴'Ö 'dhasi -lame =va -ya pö 'ö -bha 'dhasi -nu -dhë -wo 'dho Pölö 'ka wo -yadhe -bha, 'go mü kö -wa -ma -klaa 'ka kö pë 'ö -kë 'ö me gbung -nu 'dhö =gblaa 'gbla -na -a 'piö bhë -yaan -a =blee'-. 'Ö 'wo dho -a 'ka 'dhasi -nu -gɔ -yadhe -bha. ²⁵'Yö =dhe 'ö =waa- -lö kö -waan -a -ma -klaa 'ka, 'ö Pölö -ya pö 'dhasi -nu -gɔme 'ö -kë mü bhë -a -dhë: «Wlömë 'në -mü n 'ka; ka -dua' -mü kö Wlömë 'në 'ö za 'yaa- 'kun, 'ka- -ma -klaa 'ka a?»

²⁶=Dhe 'ö- -wo bhë -yaa- ma, 'ö dho 'ö- =blee 'dhasi -lame =va -dhë 'ö- pö: «E, -më 'ü 'dhoë- -a kë bhë =e? Me bhë Wlömë 'në -mü -a 'ka!» ²⁷'Ö 'dhasi -lame =va gia- -yö nu Pölö 'piö, 'ö- =dhe' kɔɔ -nëe: «-Ya kë -ne Wlömë 'në -mü ü 'ka, -bhö -a =blee' -n -dhë!»

'Ö Pölö -ya pö -a -dhë: «=Ii-, Wlömë 'në -mü n 'ka.»

²⁸'Ö 'dhasi -lame =va -ya pö -a -dhë: «Ma 'pö 'wëüga =va 'a- go 'aan- =tun kë -na Wlömë 'në 'ka.» 'Ö Pölö -ya pö -a -dhë: «Ma 'pö, n 'ka 'wëüga nu 'aan- =tun kë -na -a 'gü 'në 'ka, 'këe 'a -bhɔ -a 'ka.»

²⁹=Dhe do bhë 'wo to -a -bha 'ö me 'wo- -kë 'waan- -a -ma kö -yaan 'wun =blee' -bhë, 'wo bhɔ -a -dhë =taa'. 'Ö 'dhasi -lame =va -de 'pö, =dhe 'ö -yaa- 'wun dɔ =ne Pölö 'ö Wlömë 'në 'ka bhë, 'ya- -lö =yɔɔ' 'ka, 'suö -yö -da -a 'gü, 'ö tɔɔ Wlömë -me -nu -bha 'se =kɔɔnme =va -yö -dho za dɔ -a -bha pë 'ö- -kë bhë -a -wun 'gü.

Pölö -yö -dho zakanme =va 'dhiö

³⁰'Këe 'dhasi -lame =va -yö -kë -a 'piö kö pë 'bhle 'ö -kë 'ö Zuifö -nu -wo 'wun dɔ Pölö -bha bhë 'ö- -gen ma. -A -wun 'gü, =dhe -dhe =ya =kɔɔɔ, 'ö

-yɔɔ' bho Pɔlö -bha, 'yö ö -wo pö slabhome -gɔme -nu waa- Zuifö -nu -bha -yakuëkëme -nu -an -dhè 'wo nu wo 'ko =bhaa. =Dhe =ya kë 'dhö, 'ö 'wo Pɔlö sü 'wo nuè 'wo- dɔ -an ziën.

23 ¹Ö Pɔlö -yö -yakuëkëme -nu 'plɛ -ga, 'go mü 'ö- pö -an -dhè: «Dhegluzè -nu, n -ma -tosiadhe 'a- -kè 'ö dho 'ö yöè =dɛɛ -bha -Zlan wö 'dhiö bhè, a- -kè =zuö' puu 'ka.»

²Ö slabhome =va Ananiasö -ya pö me -nu 'wo -kè Pɔlö 'sɔɔ bhè -wa 'dhi -ma. ³Ö Pɔlö -ya pö: «-Zlan =nɛ 'ö dho ü -ma, bhi 'ü -kè =nɛ 'kɔ bun 'ö 'wo 'yɔɔ 'puu -da -a -bha bhè -a 'dhö 'ü =nɛ! Ü -ya -dhe bhè -a 'gü kö 'üen- za 'ö tɔng -ya -zɔn -a dɔ n -ma, 'ö- me yaa bhɔ tɔng -bha, 'ü- -kè ü -wo -pö -an -dhè -sü 'ka =nɛ, -wo n -ma -a!»

⁴Ö mɛ -nu 'wo -kè Pɔlö 'sɔɔ 'wo- pö -a -dhè: «'Bha 'si bho -Zlan -bha slabhome =va -gɔ!»

⁵Ö Pɔlö -ya -daa -kè 'ö- pö: «Dhegluzè -nu, n 'ka- =tɛi' dɔ =nɛ slabhome =va -mü, 'ö tɔɔ pè 'ö -ya -sü 'ka -Zlan -bha 'sèédhe 'gü -ya -pö: *Kö =kun 'ü 'wun yaa =blɛɛ ü -bha 'se =kɔɔnme 'ka!* »

⁶Pɔlö -ya =daa' =nɛ -ya za 'gü -mɛ -nu 'wo bhè -an mɛ -kɔ 'pian do -wo -kè Saduse -mɛ -nu 'ka, 'ö -an mɛ -kɔ 'pian do 'dhö Falizi -mɛ -nu 'ka 'pö. -A -wun 'gü 'yö -we 'gbee- 'ka -an 'dhiö mü 'ö- pö: «Dhegluzè -nu, Falizi -mɛ -mü n 'ka, 'ö n dè -yö -kè Falizi -mɛ 'ka 'pö. A -ya -sü 'ka n -zo -yö -Zlan -bha -sü 'ka =nɛ -yö -dho -a kë kö game -nu -wo 'go ga 'gü. Pè 'yö -kè 'wo za -ya -na n -ma bhè 'yö bhè.»

⁷=Dhe 'ö =ya yèn 'wun bhè -a =blɛɛ' -sü -bha, 'ö Falizi -mɛ -nu waa- Saduse -mɛ -nu -wo yö zaɔdhe -kè wo 'kuè -sü 'gü. 'Ö 'gügludhe -yö -da -yakuëkëme -nu 'wo bhè -an ziën. ⁸Bhii 'ö tɔɔ Saduse -mɛ -nu -wa -pö game -nu wo 'ka 'dho go ga 'gü, 'iin -Zlan -bha bɔme -nu, -zuu -nu -an gbe 'waa 'dhö, 'kɛɛ Falizi -mɛ -nu -wo 'wun -nu 'wo bhè -an 'plɛ -wun -dhe 'wun gia-. ⁹Ö -an 'plɛ -bha 'we -wo -yö dho 'dhiö 'gbee- 'ka. 'Ö tɔnggɔme -nu 'bhaa -nu 'wo -kè Falizi -mɛ -nu 'ka bhè, 'wo =luu bhii -an -wo yaa -mɔ 'kuè 'gbönggböng 'wo- pö: «'Wun yaa 'ö gɔɔn- =nɛ 'ö dho -a kë 'yaa -dhö. -Yö -dho kë -zuu 'bhaa 'iin -Zlan -bha bɔme =nɛ 'ö 'wun =blɛɛ -a -dhè.»

¹⁰=Dhe 'ö 'toè- zlöö kö -an -bha zaɔdhekéwo =ya kë 'gbee-, 'ö 'suö -yö -da 'dhasi =lame =va 'gü kö -kun 'wo dho Pɔlö =gaan gan -yaan 'to -an kwɛɛ -yaan ga. -A -wun 'gü 'yö- pö ö -bha 'dhasi -nu -dhè =nɛ -wo =yɔɔ'- mɛ -nu gbung 'gü 'ma, -wo Pɔlö bho -an ziën, -wo dhoè -an -gɔ -yadhe -bha.

¹¹-A gbeng -yi mɛ 'ö yö -a 'piö, 'ö kwa Dème -yö ö -de -zɔn Pɔlö -dhè 'ö- pö -a -dhè: «-Bhö ü 'gü dɔ 'gbee-! 'Ö tɔɔ 'bha n -ma -tɔmɔdhe kë Zeluzalemè zö. -Yö ü -bha 'pö kö 'ü 'dho 'ü n -ma -tɔmɔdhe kë 'pö Wlɔmè plöö.»

Zuifö -nu -bha -dho 'ko =zlöö -sü kö -waan 'wun yaa kë Pɔlö 'ka

¹²⁻¹³=Dhe 'ö -dhe =ya =kpaɔ, -a -dhiadhio bhè, Zuifö -nu -wo -dho wo 'ko =zlöö, 'ö -an -dho 'kuè- sü -yö -ziö mɛ -lü 'gɔɔ- -yiisiè -ta; 'yö 'wo wo -wo

-bhö -ne wo 'ka 'dho müpë gbe mü, 'iin wo 'ka 'dho -bhöpë gbe -bhö, -a 'ke 'wa Pölö zë kö yö. ¹⁴'Wo dho 'wo bɔ slabhome -gɔme -nu waa- me ziizii -nu -an 'piö, 'wo- pö -an -dhë: «'Yië 'dho yi 'kuë- 'yië yi -wo -bhö yi -de 'piö -ne, yi 'ka 'dho pë gbe -bhö 'ö dho 'ö yöë -a 'ka Pölö zë -yi -bha. ¹⁵Dhe 'ö 'pö, ka gia- kaa- zakanme -va, -kaa -dhe 'dhasi -lame -va -gɔ kö -yö nu Pölö 'ka ka =dhia, -a -blee -a -dhë -sü 'ka -ne, kaa- 'piö kö 'wun 'ö bhë 'ka ka -bha giagia ma. Yi -zë, yi -mɔa 'gü -sü -mü kö 'yiën- -a 'to zian -ta, 'yiën- zë.»

¹⁶'Kee Pölö dheglu 'nëdhezë do gbö -yö Zuifö -nu -bha -dho 'ko =zlöö -sü bhë -a -ma. 'Ö dho 'dhasi -nu -bha -yadhe -bha 'ma, 'ö -da kɔɔ 'ö- -gen -bho Pölö -dhë. ¹⁷'Ö Pölö -yö 'dhasi -gɔme -nu 'wo bhë -a me do =dhɔɔ -kë 'ö- pö -a -dhë: «-Bhö 'dho -dadhëü 'në gɔɔn- 'ö =ne -a 'ka 'dhasi -lame -va 'piö! 'Wun -ya -gɔ kö -yaan -a =blee'- -a -dhë.»

¹⁸'Ö 'dhasi -gɔme bhë, 'ö yö -a -dhë 'dhiö, 'ö dhoë 'dhasi -lame -va 'piö, 'ö- pö -a -dhë: «Pölö 'yö -kansa 'kɔɔdhö bhë -ya -dhe n -gɔ kö 'a nu -dadhëü 'në gɔɔn- 'ö =ne -a 'ka ü 'piö, 'ö tɔɔ 'wun -ya -gɔ kö -yaan -a =blee'- ü -dhë.»

¹⁹'Ö 'dhasi -lame -va -yö -ya -dadhëü 'në gɔɔn- bhë -a -kɔ -bha, 'ö- pö -a -dhë -wo 'dho wo 'sloo 'ka, 'yö- =dheë' kpɔ 'ö- pö: «-Më ü- 'piö kö 'ü- =blee'- n -dhë -e?»

²⁰'Ö- -daa -kë 'ö- pö: «-Dhia' Zuifö -nu -dho nu ü 'piö; 'ö tɔɔ =wa 'dho wo 'ko =bhaa kö -waan Pölö -dhe ü -gɔ, -yaan nu -an -bha -yakuëkëme nu 'dhiö wo -wo 'ka =ne, -yakuëkëme -nu -wa 'piö kö 'wun 'ö bhë 'wo wo -bha kpinngdhö ma -a 'gü. ²¹'Kee kö -kun 'ü- -dhe 'wun gia-! Bhii me 'wo -ziö me -lü 'gɔɔ- -yiisië -ta bhë, =wa -bin kö -waan -püö -a -ta zian -ta, -waan -a zë 'ö tɔɔ =wa wo -wo 'kpɔ 'kuë- do, -wo -bhö -sü 'ka =ne wo 'ka 'dho pë -bhö, 'iin müpë mü, -a 'ke 'ö waa- zë -a 'ka. =Wa -mɔa 'gü 'saadhö, pë 'wo -yaa -gɔ zlöö 'ö tɔɔ ü -bha -we -a -bha -sü kö 'üën- -a bɔ.»

²²Dhe 'ö -kë 'pö 'ö 'dhasi -lame -va -ya pö -dadhëü 'nëgɔɔnzë bhë -a -dhë: «'Wun 'ü- =blee n -dhë -ne kö -kun 'ü- =blee me gbe -dhë!» 'Yö ö -kwa- -zü 'ö dho.

Pölö -bɔ 'sedë Felisö -dhë -sü

²³Dhe =ya kë 'dhö, 'ö 'dhasi -lame -va -yö ö -bha 'dhasi -nu -gɔme =ple -dhɔɔ -kë, 'ö- pö -an -dhë: «-Ka 'dhasi -këng' =ple -dhe 'ko =bhaa! 'Go mü 'zü 'ka -ya =soo =taa -me -nu 'gɔɔ- 'slaple 'sü; 'ka me -këng' =ple 'ö 'dü 'dhö -an -gɔ -an 'sü! 'Ta -mü, 'ka dho -a sü 'kaan- dhoë Sezale 'lele 'seisië -naa 'ka gbeng; -ka ka -de -pë kë! ²⁴-Ka Pölö -nu -bha =soo -nu =plëezë -nu 'sü ka 'piö kö 'kaan- 'ta -së sü 'kaan- 'dho 'kaan- =loë' 'sedë Felisö 'piö.»

²⁵'Ö 'sëedhe -kë ö -wo 'ka =ne; ²⁶«Ma Klodö Lisia, 'a 'sëedhe =ne -a bɔ. N -gɔtaame =bhlëzë, 'sedë Felisö, 'bha =büee! ²⁷Zuifö -nu =wa gɔɔn- 'a- bɔ ü -dhë 'ma bhë -a 'kun kö 'waan- -a zë. 'Kee =dhe 'ma- ma =ne Wlómë 'në gia- -mü -a 'ka, 'ö 'a ma 'dhasi -nu bɔ 'wo -sɔ -an ziën 'ö 'wo- bho mü. ²⁸Dhe

-kë =ne a -kë -a 'piö kö pë 'ö -kë 'ö Zuifö -nu -wo 'wun dɔ -a -bha bhë 'aan-
-a ma, 'a dho -a 'ka -an -bha -yakuëkëme -nu 'dhiö. ²⁹Pë 'a- ma mü 'ö tɔɔ
-wo za -dɔ -a -bha, 'wun 'ö -gban -an -de -bha tɔng -nu -wun -bha -a -wun
'gü. 'Këe 'wun 'bhaa 'wo dho -a dɔ -a -bha kö -yaan kë -a -zuö -kanso 'gü
-gen 'iin -a zë -gen 'ka yaa kë -dhö. ³⁰'Ö 'go mü 'zü, -dhe =waa- pö n -dhë
Zuifö 'bhaa -nu =wa 'dho wo 'kuë- -a -gɔ, 'ö 'a to mü 'a- bɔ ü -dhë, 'a- pö me
-nu 'wo za dɔ -a -bha bhë -an -dhë -wo nu wo -bha za bhë -a 'ka ü 'dhiö
'ma.»

³¹'Ö -wo 'ö =lame =va -ya pö -an -dhë bhë, 'wo- -kë. 'Wo Pɔlö sü gbang
-yi gia- bhë -a 'gü, 'wo dho -a 'ka Antipatrisö -pö 'gü. ³²=Dhe 'ö -dhe
=ya 'po, 'dhasi -nu me 'wo 'ta sü wo -gen -ta bhë, -wo -ye wo 'zü 'wo nu
Zeluzalemë plöö, 'ö -an me 'wo =soo =taa bhë waa- Pɔlö -nu 'wo dho 'ta 'ka
'dhiö.

³³=Dhe 'ö =wa 'dho =wa -lo Sezale plöö, 'ö 'dhasi -nu -wo 'sëedhe bhë -a
nu 'sedë -dhë, 'ö 'wo Pɔlö -lo -a kwëe. ³⁴'Ö 'sedë -yö 'sëedhe bhë -a pö. 'Go
mü 'ö Pɔlö -dhe' kɔ 'se 'pian me 'ö go -a -ta bhë -a -wun 'ka. =Dhe 'ö =yaa-
ma =ne -yö -go Silisi -se 'gü, ³⁵'yö- pö Pɔlö -dhë: «=Ya kë =ne me -nu 'wo
'wun dɔ ü -bha bhë =wa nu =sia, a -dho n 'to to ka -bha.»

'Go mü 'yö- pö ö -bha 'dhasi -nu -dhë -wo 'dho Pɔlö 'ka, 'kɔ 'ö Elɔdö -ya
dɔ bhë -a 'gü, -wo wo -zo kë -a 'piö.

Zuifö -nu -wo 'wun -dɔ Pɔlö -bha

24 ¹=Dhe 'ö -dhekpɔyi 'sɔɔdhu =ya ziö, slabhome =va Ananiasö
waa- me ziizii 'bhaa -nu 'dhö waa- -an -gɔ 'dhiö -me 'wo- -dhe
Tɛtulusö, -wo -dho Sezale, 'wo dho 'sedë Felisö 'dhiö kö 'waan- Pɔlö -ta
-zɔn -a -dhë. ²'Ö 'wo Pɔlö -dhɔɔ -kë, 'yö nu. 'Ö Tɛtulusö -yö yö 'wun -dɔ
Pɔlö -bha -sü 'gü 'ö- pö: ³«=Yi -gɔtaame -wungbeezë, Felisö, ü -kë -gɔme
'kpaakpa giagia 'ka; yi -potaasü 'ka 'se 'ö =ne -a 'gü 'tɔng =va 'piö. 'Go mü
'zü, 'ü yi -bha -tosiadhe -kë -së -duö 'se 'ö =ne -a 'gü. Pë 'ö 'yi- dɔ =ne bhë,
'ö 'go mü me -nu =waa- dɔa. ⁴'Këe 'maa- 'piö kö 'a ü 'kun sia- -glɔɔsü. =Dhe
-kë 'dhö ü -bha 'glusë -wun 'gü, -bhö ü 'to kë yi -bha 'bhe 'tee 'ka! ⁵Gɔɔn- 'ö
=ne yi- =yöë' =ne -yö me =zuö' -kaan 'kuë -me 'ka. 'Go mü 'zü 'ö -kë me -lü
-suu- yaazë 'ka. Yö =ne 'ö 'gügludhe -da Zuifö -nu ziën, 'se -dhe 'saadhö
'gü. -Yö Nazaletë -me -nu kpö -kɔɔnme 'ka. ⁶-Ya 'piö kö 'ö kwa -bha -Zlan
-gba -a 'gü -kɔ 'slööslo -siö'. Pë 'ö -kë 'yi- kun bhë 'ö bhë. (('Ö 'yi- 'piö kö 'yi
za dɔ -a -bha =ne -kɔ 'ö yi -de -bha tɔng -ya pö -a 'ka -a 'dhö. ⁷'Këe yië- 'se
-kɔɔnme Lisiasö -yö -yö 'wun 'ö bhë -a 'gü, 'ö- bho yi kwëe 'gbee- 'ka. ⁸'Go
mü 'zü 'ö Lisiasö -ya pö yi 'yi 'wun dɔ -na -a -bha bhë yi -dhë, 'yi nu ü
'dhiö.)) =Ya kë =ne gɔɔn- bhë 'bha- -dhe' kɔ =sia, pë 'ö -kë 'yi 'wun dɔ -na
-a -bha bhë, bhi gia- ü -dho ü -bha 'wun gia- yö ü -de kwëe.» ⁹'Ö Zuifö
'bhaa -nu 'wo to 'wo wo -wo -zuöatadhe -kë, wo -bha 'wun -dɔ -a -bha -wo
bhë -a -ta =ne 'wun 'ö Tɛtulusö -ya =bleë bhë -yö gia- 'ka.

PöLö -bha ö -de dha -wun -blee Felisö 'dhiö -sü

10'Ö 'sedë -ya pö PöLö -dhë -yö 'wun -blee', 'ö PöLö -ya pö: «A- -dca' -ne, bhi 'ü tɔɔ zakanme 'segɔ 'ö -ne -a -ta, 'ö 'bha -kwe -plëézë kè -a 'gü. -A -wun 'gü n -zo -yö -gban -sü 'ka kö 'a n -de dha -wun -blee' -ü 'dhiö. 11Bhi gia- -de 'pö, -bhö -dhe -ga 'wun 'a 'dhoë- -blee' -ü -dhë bhë -a 'gü -së 'ka! 'Ö tɔɔ -a -dhekpaayi yaa ziö 'gɔɔ- do ö ga =ple 'gü -kun, 'a nu Zeluzalemë zö yi -bha -Zlan gba -dhia. 12Waa n yö kö yië- me gbe yi 'dhinaa kè -na, 'iin waa n yö kö a me -nu -ya -na 'kuë- Zuifö -nu -bha -bhöküekɔ -nu 'gü, 'iin plöo -dhe -nu -bha. 13'A- -dca' =ne me -nu 'wo =ne 'wun 'wo- dɔ -na n -ma bhë -a -gen 'yaa -dhö -an -gɔ kö -waan -a pö ü -dhë. 14-A -kè 'dhö -sü 'ka, pë 'a- dɔ ü wö 'dhiö yö -ga 'ö =ne: 'Ö tɔɔ yi 'bhema -nu -bha -Zlan =ne 'a- gba, 'go mü 'zü a yuö -kè -a -dhë 'ta 'sü -sü 'ka zian -gblooga 'wo- -wun -dhe -na -sua bhë -a -ta -sü 'ka. 'Kee -Zlan -bha tɔng 'ö Moizö -ya nu yi -dhë 'iin -a -wodhiölome -nu -wo 'saadhö 'wo =been' -sü 'ka -Zlan -bha 'sëedhe 'gü, a -an 'ple -dhe 'wun gia-. 15A n -zo -yö yi -bha -Zlan -bha =ne -kɔ wo gia- 'wo wo -zo yöë bhë -a 'dhö -ne -yö -dho game -nu këwunsëézë -nu waa- këwunyaame -nu -an 'ple bho ga 'gü. 16-A -wun 'gü =ne 'a n 'gü dɔ n -de -gɔ 'gbee- kö -wo 'ö 'we -na n 'gü bhë kö -kun 'ö dho -a pö n -dhë 'ma 'wun yaa kè -Zlan waa- me -nu -an wö 'dhiö.

17=Dhe 'ma 'go Zeluzalemë 'ö- -kwe -ya kè -plëézë 'ö 'a -ye n 'zü, 'a nu mü kö -yö kè 'dhö 'aan- nu 'wëüga 'ka kö 'aan- -a nu Zuifö 'bhaa -nu -dhë gbaɔ 'ka, 'go mü 'zü kö 'aan- sla- bho yi -bha -Zlan -dhë. 18=Dhe 'ö sla- bhë 'a- bho -na yi -bha -Zlan -gba -a 'gü -kɔ 'gü bhë, 'wo nu 'wo n yö -a -ta mü. Kö 'aan- -tun -a kè -na 'dhö bhë kö 'ma n -kè 'slööslö -sü -bhöküedhe kè 'saadhö. Me -gbaa gbe yaa kè n 'piö, 'iin 'wun -kaan 'kuë -sü -zë gbe yaa kè mü. 19'Kee me -nu 'wo -kè mü 'wo tɔɔ Zuifö -nu 'wo go Azi -se 'gü, wo =ne 'ö -an -dua' 'dhö -mü kö -ya kè =ne -an -bha 'wun -yö n -ma, -wo nu -a 'ka ü 'dhiö. 20'Iin 'go mü 'zü me 'wo nu =ne 'wun yaa 'a- -kè 'ö za -yö n kun zakanme -bha za -dɔ n -ma -yi 'ka -wa pö. 21-Ya 'kan 'wun 'a- -blee n -wo -ta dhuö 'gbee- 'ka -an 'ple wö 'dhiö -a -bha 'ö -kè: «Game -nu -go ga 'gü -sü -wun 'a- -dhe 'wun gia- bhë, 'ö- -wun 'gü 'wo za dɔ -na n -ma bhë! »

22=Dhe -kè =ne 'wun 'ö -gban Klito -bha Felisö -ya -gen dɔ -së 'ka bhë, 'yö 'kwamadhe kun, 'ö yi kpɔ -a 'gü -a -pö me -nu 'wo -kè mü -an -dhë -sü 'ka =nee: «Ya kè =ne 'se =kɔɔnme Lisiasö -ya nu -wo do kpinngdhö -yö n -gɔ kö 'aan- -a -blee' -ka -dhë.»

23'Ö- pö ö -bha 'dhasi -gɔme -dhë -wo 'dho PöLö 'ka; 'kee kö -wo -potaasü nu -a -dhë -yö yö plaan -nu wo, 'iin kö -wo wo =kwaa' -a 'bhamë -nu -zü, -wo nu -a -dhë pë 'ö- -bha -wun -yö yö -a -bha -a 'ka.

PöLö -yö Felisö waa- Drusilö -an 'dhiö

24=Dhe 'ö -dhekpaayi 'bhaa -ya ziö, 'ö Felisö waa- ö bɔɔ 'wo- -dhe Drusilö 'ö -kè Zuifö dhebo 'ka bhë 'wo nu. 'Ö Felisö -yö me bɔ 'wo nu PöLö

'ka. 'Yö ö 'to to 'wun 'ö -gban -zo -yö Yesu Klito -bha -sü 'ö Pölö 'dhö -a -blee' -na bhë -a -bha. ²⁵'Kee =dhe 'ö -kë =ne Pölö -yö 'wun 'ö -gban -kë kpengdhö -sü waa- me -bha ö -de =koon -sü waa- kwa -bha -Zlan -bha zadodhe 'ö dho kë 'dhiö =zian', mebbeedhe këwun -nu -bha -a -blee' -sü 'gü bhë, 'ö 'suö -yö -da Felisö 'gü 'ö- pö: «-Bhö 'dho -kun! -Ya kë =ne 'ma 'tong yö to, 'a 'ü =dhoo -kë kö 'wun 'ö bhë 'üen- -a 'bhaa =blee.»

²⁶-Yö -kë -a -zo 'piö -be =ne Pölö -yö -dho më ö 'piö 'ö ö gbaa 'wëü- 'ka. Pë 'ö -kë 'ö =ya kë 'ö- =dhoo -kë kö 'waan- 'doo do wo 'ko =bhaa bhë 'ö bhë.

²⁷-Dhe 'ö -kwe =ple =ya ziö, 'ö Pöosiusö Fetusö -yö yö Felisö pin =taa 'sedë 'ka. Felisö -yö -kë -a 'piö kö 'ö Zuifö -nu -dhi -a -dhë -wun kë; 'yö Pölö to -kanso 'gü.

Pölö -ya 'piö kö 'ö 'wun =blee' -'se =koonme =va 'dhiö

25 ¹=Dhe Fetusö =ya -lo 'se 'pian 'ö bhë -a -ta, -a -dhekpacyi =ya kë -yaaga, 'ö go Sezale 'ö dho Zeluzalemë. ²'Ö -dhe bhë -a 'gü slabhome -nu -gome -nu, waa- Zuifö -nu -bha me =vava -nu 'wo dho 'wo Pölö -wun -kan Fetusö 'dhiö -a -pö -a -dhë -sü 'ka =nee ³-yö 'wun -së do kë wo -dhë, 'wo- 'piö kö -yö Pölö bô Zeluzalemë; bhii 'ö too kö =wa 'dho wo 'ko =zlöö -waan Pölö zë zian -ta. ⁴'Kee Fetusö -ya -daa -kë -an -go 'ö- pö: «Pölö -yö -kanso 'gü Sezale, 'go mü ma gia-, a -dho 'ma -dhekpacyi =ne -a 'ka.» ⁵'Ö ko 'zü 'yö- pö =nee: «-Kaa kë kö ka -gome -nu -wo ziö n 'piö, 'yi 'dho Sezale! -Ya kë =ne goon- bhë 'wun yaa 'ö- -kë kö -wo za do -a -bha 'ma!»

⁶Fetusö -yö pë 'ö -mo 'dhoo do -bha -a -kë -an 'piö Zeluzalemë plöö. 'Go mü 'yö dho Sezale. =Dhe -dhe =ya 'po 'ö dho za -do -a 'gü -ko 'gü, 'ö =yaannu ö -bha zakanme -bha -gbloo 'gü, 'yö- pö me -nu -dhë -wo nu Pölö 'ka. ⁷=Dhe 'ö =wa nu Pölö 'ka =wa -lo, 'ö Zuifö -nu 'wo go Zeluzalemë bhë 'wo =nië -a -zü, 'wo 'wun yaa =va =blee -a -go. 'Kee waa -moo -bha kö 'wun yaa 'wo- =blee -a -go bhë kö -waan -a -gen pö. ⁸'Kee Pölö -yö ö -de dha -wun -blee 'ö- pö: «N 'ka Zuifö -nu yi -bha tong gbe -lö 'gü. 'Go mü 'zü, n 'ka 'wun yaa kë yi -bha -Zlan -gba -a 'gü -ko waa- Wlömë -me -nu -bha 'se =koonme =va -an 'ka.»

⁹=Dhe -kë =ne Fetusö -yö -kë -a 'piö kö 'ö Zuifö -nu -dhi -a -dhë -wun kë, 'ö- pö Pölö -dhë: «Ü -dho -moo -bha kö 'ü nu Zeluzalemë kö 'aan- -dhe -ga 'wun bhë -a 'gü a? -Ya kë =ne za 'wo- do -na ü -bha bhë -yö 'wun gia- 'ka kö 'aan- -a do =a?»

¹⁰'Ö Pölö -ya -daa -kë 'ö- pö: «A do -sü 'ka 'se =koonme =va -bha za -kan -a 'gü -ko 'gü; 'a- 'piö kö 'se =koonme =va gia- bhë -yö za bhë -a 'kan. Bhi gia- ü- =doo' -së 'ka =ne n 'ka 'wun yaa gbe kë Zuifö -nu 'ka. ¹¹'Ö =ya kë =ne 'ma Zuifö -nu, yi -bha tong 'gü =siö', 'iin pë 'ö dho kë n zë -gen 'ka, 'ma- kë kö n 'ka -ko n zë -sü 'ka. 'Kee =ya kë =ne 'wun 'wo- =blee' -na n -go =ne, 'wun gia- gbe 'yaa- 'gü, me gbe yaa 'dho -moo -bha kö -yö n do -an kwëe. Me 'a- 'piö kö za bhë -ya 'kan 'ö too 'se =koonme =va.»

¹²-Dhe 'ö Fetusö waa- ö -bha -ya za 'gü -me -nu -wa 'wun 'bhaa -blæ'- wo 'ko ziën, 'ö- -daa -kë 'ö- pö Pölö -dhë: «Pë 'ü- 'piö 'ö tɔɔ 'sɛ -kɔɔnmɛ -va -yö za bhë -a 'kan a? -Dhe 'ö 'pö kö ü -dho dho 'sɛ -kɔɔnmɛ -va bhë -a 'dhiö.»

Pölö -yö Aglipa waa- Belenisö -an 'dhiö

¹³-Dhe 'ö -dhekpaɔyi 'bhaa -ya ziö, 'ö -gludë Aglipa waa- Belenisö 'wo dho Sezale -pö 'gü kö -wo Fetusö 'sɛnɛ bho -a nu -sü -bha. ¹⁴-Wo -kë mü, 'ö Pölö -bha 'wun bhë, 'ö Fetusö -ya -da -gludë 'dhiö, 'ö- pö -a -dhë: «Gɔɔn- do 'ö Felisö -ya to -kanso 'kɔɔdhö -yö zö. ¹⁵-Dhe 'ma 'dho Zeluzalemë, 'ö Zuifö -nu -bha slabhomɛ -gɔmɛ -nu waa- -an -bha mɛ ziizii -nu 'wo nu -a -bha 'wun 'ka n 'dhiö. 'Ö 'wo- pö n -dhë 'a za -lo -a tuö. ¹⁶A- -daa -kë -an -gɔ 'a- pö: «Wlɔmɛ -mɛ -nu -bha wɔ -kɔ 'gü, mɛ 'wo za dɔ -a -bha, 'waa- dɔ mɛ -nu kwɛ kö -a mɛ gia- yaa dɔ mɛ -nu 'wo za dɔ -a -bha bhë -an wö 'dhiö, kö pë 'ö -kë 'wo za dɔ -a -bha bhë kö yaa ö -bha =blæ'-.» ¹⁷'Ö 'wo -ziö n 'piö 'yi nu zö; n 'ka 'töng gbe ziö 'wun bhë -a -ta. 'Ö =dhe -dhe -ya 'po, 'a dho za -dɔ -a 'gü -kɔ 'gü kö 'aan- za bhë -a 'kan. 'Yö 'a- pö mɛ -nu -dhë -wo nu gɔɔn- 'ö bhë -a 'ka. ¹⁸'Ö za -dɔ -a -bha -mɛ -nu -wo nu, 'kɛɛ 'wun yaa -nu 'ö n -ma -zotadhe -yö dho -an 'piö -bezë bhë waa- gbe =blæ'-. ¹⁹'Wun do 'ö wo -nu 'wo- zaɔdhe kë 'ö tɔɔ -kɔ 'ö 'wo wo -bha -Zlan gba -a 'ka bhë 'yaa do. 'Go mü 'zü, mɛ do 'bhaa 'wo- -dhe Yesu 'ö ga 'ö Pölö -ya pö -yɔɔn ö -wo -ta -sü 'ka =nɛ -yö 'bhee- bhë -a -wun -mü. ²⁰'Ö -kɔ 'a dho -a kaa kö 'wun -nu 'wo bhë 'aan- -dhe yö -an 'gü 'ö n 'ka- dɔ. -A -wun 'gü 'ö 'a Pölö -dhɛɛ' kɔɔ =nɛ 'ö =ya kë =nɛ -yö -dho 'we- -bha kö -yö 'dho Zeluzalemë kö 'aan- za bhë -a 'kan 'ma. ²¹'Yö Pölö -ya pö 'gbönggböng =nɛ ö- 'piö kö 'ö to -kanso 'gü kö 'sɛ -kɔɔnmɛ =va gia- -yö za bhë -a 'kan. 'Ö- -wun 'gü, 'a- pö n -ma 'dhasi -nu -dhë, -wo wo -zo kë -a 'piö, -yö 'dho -yö yöë yi 'a dho -a bɔɔ 'sɛ -kɔɔnmɛ =va 'dhiö -a -bha.»

²²'Ö Aglipa -ya pö Fetusö -dhë: «A- 'piö kö gɔɔn- 'ö bhë, ma gia- 'a- -wo ma.» 'Ö Fetusö -ya pö -a -dhë: «=Dhia' 'ü dho -a -wo ma.»

²³-Dhe 'ö- -dhe -ya -kpaɔ, mɛ -nu -wo -ziö Aglipa waa- Belenisö -an 'piö -an -sü =va -sü 'ka, 'wo nu 'wo =daa' -bhɔkuëkëdhe =va 'gü. 'Go mü 'dhasi -nu, 'dhasi =lame -nu waa- pö- =kɔɔnmɛ -nu -wo -nu mü. 'Ö Fetusö -ya pö ö -bha 'dhasi -nu -dhë -wo nu Pölö 'ka; 'wo nuë. ²⁴'Ö Fetusö -ya pö mɛ -nu 'wo nu wo 'ko =bhaa bhë -an -dhë: «-Gludë Aglipa, mɛ -nu 'ka nu 'saadhö zö bhë, gɔɔn- 'ö Zuifö -dhe =va -dhe -nu -wo za dɔ -a -bha 'wo nuë n 'dhiö Zeluzalemë -blæzë 'ka, 'ö 'wo nuë -a kë =plɛ -naa 'ka zö, 'ö 'wo =gblaa gbla wo -wo 'ka =nɛ -wa zë bhë, -a gɔɔn- bhë yö =ga 'ö =nɛ. ²⁵'Kɛɛ ma -zë, n -ma 'ka, pë yaa 'ö dho -a kë kö -yö kë -a zë -gɛn 'ka, n 'ka- yö. 'Kɛɛ -dhe -kë =nɛ yö gia- -ya 'piö kö 'ö 'dho 'sɛ -kɔɔnmɛ =va 'dhiö bhë, a- -yö -së kö 'a- bɔ 'ma. ²⁶'Kɛɛ pë 'bhaa 'a dho -a -ya 'sëédhe 'gü kö 'aan- -a bɔ 'sɛ -kɔɔnmɛ =va -dhë, -a -bha 'wun 'ö bhë -a -wun 'gü 'maa- dɔ. Pë 'ö -kë 'a nuë ka 'dhiö,

'kεε bhi -gludë Aglipa, 'a nuë ü 'dhiö vεedhë kö -yö kë 'dhö kö -a -dhεε' -ya 'kpo -sia, pë 'a dho -a -bεεn', kö 'aan- -tun -a -bεεn' -na 'ö bhë. 27-A -truën gbe 'yaa -dhö kö 'a -kanso 'kɔɔmε bɔ 'sε -kɔɔnmε -va -dhë kö za 'wo- dɔ -a -bha bhë, n 'ka- -gen -blεε' -'sε -kɔɔnmε -va -dhë -së 'ka.»

Pɔlö -yö ö -de -ta -za -dɔ Aglipa 'dhiö

26 1'Ö Aglipa -ya pö Pɔlö -dhë: «-Potaasü -yö ü -gɔ kö 'üën- ü -de -ta -wun -blεε'-.» 2'Ö Pɔlö -yö ö -kɔ -po -a -zɔn -sü 'ka -nεε ö 'dhoë- ö -de -ta -wun -blεε 'ö- pö: 2«-Gludë Aglipa, n -zuögludhi -sü -mü kö -dεε 'a dɔ ü 'dhiö, 'a n -de -ta -wun 'ö -gban 'wun 'ö Zuifö -nu -wa dɔ n -ma -a -bha bhë 'a n -ma -blεε' -ü 'dhiö. 3Bhii bhi gia- ü Zuifö -nu -bha wɔ -kɔ -dɔ. 'Go mü 'ü -an -bha zaɔdhe -kë -a 'gü -wun -nu dɔ. -Dhe 'ö 'dhö, a- -dhe ü -gɔ kö 'ü ü 'to kë n -ma -zuösaadhe 'ka.

4Zuifö -nu 'saadhö, n -ma -tosiadhe kë -kɔ 'a -'kaa' 'ö sü -a 'ka n -ma -dadhëüdhe -bha 'ö dho 'ö yöë -dεε -bha -wa -dɔ. 'Ö -kɔ 'a -tosiadhe -kaa' n -ma 'sε 'gü waa- Zeluzalemë plöö, 'wo- dɔ 'pö. 5'Ö -ya kë -ne -wa 'piö kö 'wo n -ma -tɔmɔdhe kë kö -wo -dho -a pö, 'wun 'a- -blεε -ne 'wun gia- -mü. 'Ö tɔɔ -wo n -dɔ Falizi kpö -nu 'ö 'wo Zuifö -nu -bha tɔng 'ö -an -bha -Zlan -gba -a 'gü -kɔ 'gü, 'wo- kun wo -faan' 'ple 'ka, 'wo -ziö -a 'ka mε 'bhaa -nu -ta, -a 'gü -mε dɔ 'ka 'ö- -dhe -ya -glɔɔ. 6'Ö zlöö -ne bhë 'ma kë za -dɔ -a -bha -mε 'ka. Pë 'wo- -za -lo -na n tuö -a -wun 'gü bhë 'ö tɔɔ a -ya -sü 'ka pë 'ö -Zlan -ya 'tɔ go yi 'bhema -nu -dhë 'ö kë -ne -a -bha -Yame -dho nu bhë -a -gɔ. 7Pë 'tɔ 'go -wo 'ö bhë, yi -bha 'gunng -gɔ 'gɔɔ- dɔ ö ga -ple 'wo bhë -wo -ya -sü 'ka -a kë -yi -gɔ; 'yö 'wo yuö kë -na yi -bha -Zlan -dhë 'töng 'saadhö 'ka. Ü- -yö bhë -a, -gludë; 'wun 'ö bhë -a -dhe 'wun gia- -wun dɔ bhë 'ö Zuifö -nu -wo za dɔ -a -wun 'gü n -ma bhë.»

8'Ö Pɔlö -yö -sië mε -nu 'wo -kë mü bhë -an 'piö 'ö- pö -an -dhë: «-Më 'ö -kë 'ö 'ka- pö ka 'ka 'dho -mɔa -bha kö kwa -bha -Zlan -bha mε -bho ga 'gü -sü bhë ka 'ka 'dho -a -dhe 'wun gia- -ε?

9Ma -zë, a- -ya n -zuë 'dhiö -be kö 'a pë yaa 'ple kë Yesu 'go Nazaletë 'ka. 10Pë 'a -kë -a kë -dhiadhö Zeluzalemë -ne 'ö bhë. Slabhömε -nu -gɔmε -nu -wo -kɔ -mɔ 'wun -bha -sü -nu n -dhë, 'ö Yesu -wun -dhe 'wun gia- -mε -nu bhë, 'a -an -dhevadhe -da -kanso 'gü. 'Ö 'go mü -wa za -lo -an tuö kö -waan -an zë, 'ö yi -wo -yö -kë -a 'gü dɔ. 11'Ö- 'bhaa -nu -ya kë, 'a 'klobhɔdhe -wɔ -an -ta, Zuifö -nu -bha -bhɔkuëkɔ -nu 'gü, 'a -gban -an -bha kö -wa pö wo 'ka 'dho dho wo -bha -zo -yö Yesu -bha -sü 'ka 'dhiö gbɔ. N -ma -naazuédhe -bha -kë 'gbee- -sü 'gü, a -dho 'kwipö gbe -nu 'gü 'ö 'a -an 'klo bhɔ 'ma.»

Pɔlö -bha ö -zuö' -dhië -Zlan 'piö -kɔ -wun -blεε -sü

(Këyuö -nu 9.1-19; 22.6-16)

12'Ö Pɔlö -yö 'wun -blεε 'ö dhoë 'dhiö, 'ö- pö: «-Kɔ dɔ bhë -ne 'ö -kë -a 'ka, 'ö slabhömε -nu -gɔmε -nu -wo -kɔ -mɔ 'wun -bha -sü nu n -dhë, 'wo

n bɔ Damasö plöö. ¹³Yö 'a -da zian -ta; =dhe 'kwa dɔ lënnɔ 'gü, -gludë, 'ö -dhepuudhe 'ö go dhang- 'gü 'ö- 'bhü -yö -ziö lan- 'bhü -ta bhë, 'yö sɔ ma 'dhö, ma mɛ -nu 'yi -kë 'ta 'sü -sü 'gü bhë 'dhö yi -ta. ¹⁴Ö -dhe 'yi- bha 'saadhö yi 'plë 'yi -püö sia-. A 'we -wo do 'bhaa -ma. 'Ö 'we -wo bhë 'ö- pö n -dhë Eblö -wo 'gü: «Sölö, Sölö, -më 'ö -kë 'ü n 'klo bhɔ =ɛ? 'Ko zë 'ü- wo -na n 'ka bhë, pë 'dhiö- 'ü- kë -na ü -de 'ka bhë ɔɔ!» ¹⁵=Dhe -ya kë 'dhö, 'a- =dheɛ' kpɔ 'a- pö: «Dö -mü ü 'ka ɛ, n Dëmɛ?» 'Ö Dëmɛ -ya pö: «Ma Yesu, 'ü n 'klo bhɔ -na bhë. ¹⁶'Kɛɛ -bhö -luu-', 'ü dɔ ü -gɛan! A n -de -zɔn ü -dhë kö 'üën- kë n -ma yuökëmɛ 'ka; ü -dho kë n -ma -goo- 'ka kö -kɔ 'a n -de -zuan 'ü -dhë =dɛɛ bhë 'üën- -a =bleɛ'- mɛ -nu 'wo to -an -dhë. 'Go mü, pë 'a dho -a -zɔn ü -dhë 'zü, 'ü dho -a =bleɛ'- -an -dhë 'pö. ¹⁷A -dho ü bɔ Zuifö -nu waa- mɛ -nu 'waa Zuifö 'ka -an 'piö. =Wa dɔ ü -gɔ 'yënnɔ a -dho ü bho -an kwɛɛ kö -kun 'wo dho ü zë. ¹⁸A ü -bɔ kö 'üën- -an 'yan 'po kö -waan 'go -dhetiidhe 'gü -waan nu -dhepuudhe 'gü. 'Go mü 'zü kö -wo 'go Satan -kɔ -löö -wo nu -Zlan 'piö. -Yö kë 'dhö -ya kë =nɛ =wa n -wun -dhe 'wun gia- kö -Zlan -yö ziö -an -bha =sɔɔn yaa -nu -ta, 'go mü kö -waan wo -bha -yadhɛ yö, mɛ -nu 'ö -Zlan -yö -an sü bhë -an ziën.» »

Pölö -yö ö -bha yuö kë -kɔ -wun -bleɛ

¹⁹Ö Pölö -yö 'wun =bleɛ 'ö dhoë 'dhiö -a pö -sü 'ka =nɛɛ: «-Kɔ 'ö bhë -a 'ka, -gludë Aglipa, 'ö 'yanpiöpë 'ö go dhang- 'gü 'a- yö bhë, 'ö 'a 'wun ma -a -ta. ²⁰Ö 'a -Zlan -wo =bleɛ mɛ -nu 'wo Damasö plöö -an -dhë. 'Ö 'a- =bleɛ mɛ -nu 'wo Zeluzalemë plöö -an -dhë. 'Go mü 'zü 'a- =bleɛ -an mɛ 'bhaa -nu 'wo Zude -sɛ -dhe 'saadhö 'gü -an -dhë. 'Ö 'a -yɛ n 'zü 'a- =bleɛ mɛ -nu 'waa Zuifö 'ka -an -dhë -a -pö -an -dhë -sü 'ka =nɛ -wo wo -bha -tosiadhe -dhië' -kwaa, -go wo -bha =sɔɔn yaa -nu 'gü -sü 'ka kö -wo =dhië'- -Zlan 'piö. 'Go mü -wo këpë -nu 'ö -dho -a -zɔn giagiawo =nɛ =wa wo -bha -tosiadhe -dhië' -kwaa -an kë. ²¹N 'kun 'ö Zuifö -nu -wa wo kö a yi -bha -Zlan -gba -a 'gü -kɔ 'gü, 'ö 'wo- -kë kö -waan n zë bhë -a -gɛn 'plë =nɛ bhë. ²²'Kɛɛ -Zlan -yö -nu n 'piö -kplawo, 'ö dho 'ö yöë =dɛɛ -bha kö 'aan- n -ma -tɔmɔdhe kë, mɛ -nu 'ö -an =bhlë 'yaa -dhö waa- mɛ -nu 'ö -an =bhlë 'dhö -dhö -an 'dhiö. N 'ka 'wun gbɛ 'bhaa =bleɛ', -a 'ke 'ö yaa kë 'wun 'ö Moizö waa- -Zlan -wodhiölome 'wo- =bleɛ 'dhiö -a 'ka =nɛɛ: ²³-Zlan -bha -Yamɛ 'klo dho bhɔ 'ö ga, 'ö -kë mɛ =bleɛzë 'ö go ga 'gü -a 'ka kö -yaan dhasü 'ö -kë =nɛ -dhepuudhe 'dhö bhë -a -wun =bleɛ'- Zuifö -nu waa- mɛ -nu 'ö 'waa Zuifö 'ka -an -dhë. »

Pölö -ya 'piö kö Aglipa -yö Yesu -wun -dhe 'wun gia-

²⁴Pölö -yö -kë ö -de dha -wun =bleɛ' =dhia =nɛ -kɔ bhë -a 'dhö, 'ö Fetusö -yö -gbla 'ö- pö: «'Blɔɔn- =ya -da ü 'gü a, Pölö! 'Sëédhe =daan' 'ü- wo =duö bhë =ya ü kë 'blɔɔnzë -a?» »

²⁵Ö Pölö =ya -daa -kë -a -gɔ 'ö- pö: «'Blɔɔn- yaa -da n 'gü, 'sɛdë =va. 'Wun -nu 'a -an =bleɛ' -na bhë, -wo 'wun giagia 'ka, 'ö 'wo 'kpaakpadhe -zian -ta.

26-Gludë Aglipa -yö pë -nu 'wo bhë -an -dɔ. -Dhë -kë 'dhö, a -dho -mɔa -bha 'a -an -blee -potaasü 'ka -a wö 'dhiö. A- =dɔa' =ne 'wun -nu 'wo bhë -yö -an 'ple -dɔ, bhii pë -nu 'wo bhë -a gbë yaa kë -bin -sü 'ka.» 27'Go mü 'ö Pölö -ya pö -gludë Aglipa -dhë: «-Gludë Aglipa, 'wun 'ö -Zlan -wodhiölome -nu -wa -blee bhë, ü- -dhë 'wun gia- -a? A- =dɔa' =ne ü- -dhë 'wun gia-!»

28'Ö Aglipa -ya pö Pölö -dhë: «-Yö ü =zuö' 'piö =ne ü -dho n kë Klito -bha me 'ka 'gbee- -ta -a? Ü 'ka 'dho -mɔa -bha!»

29'Ö Pölö -ya pö: «'Kö -kë =ne -yö -kë 'gbee- -ta, 'iin -yö -kë ü -de =zuö', a -bhea -Zlan -dhë kö -kun 'ö -kë bhi -de 'sloo ü 'ka, 'këe me 'ple 'ka ka 'to 'to -na n -ma zö =dëe bhë kö ka 'ple 'ka kë Klito -bha me 'ka =ne n 'dhö. 'Këe 'maa- 'piö kö 'ka kë -kanso 'kɔɔme 'ka =ne -kɔ 'a dɔa =ne -a 'dhö.»

30=Dhë =ya kë 'dhö, 'ö -gludë 'dhö, 'sedë 'dhö, Belenisö waa- me -nu 'saadhö 'wo -kë wo 'ko =bhaa mü bhë, 'wo -luu. 31'Ö =dhë =wa 'go wo pin -bha, 'wo- pö wo 'ko ziën =ne: «Gɔɔn- 'ö =ne 'wun yaa 'ö dho kë -a kë -me 'ka kö -yaan kë -a zë -gen 'ka, 'iin -a -da -kanso 'gü -gen 'ka 'yaa -dhö.»

32=Dhë =ya kë 'dhö, 'ö Aglipa -ya pö Fetusö -dhë: «Gɔɔn- 'ö =ne -yö -kë -bezë =ne yaa 'dho 'se =kɔɔnme =va 'dhiö -sü -dhë kwa -gɔ -bezë kö kwa -dho -mɔa -bha 'kwa -potaasü nu -a -dhë. =Ee, -dhë 'ö 'dhö bhë, -yö -dho to -kanso 'gü 'ö 'kwa- bɔ -a -dhë.»

-Wo Pölö -bɔ Wlɔmë

27 1=Dhë 'ö 'se =kɔɔnme -nu -wo =ya kë -a 'gü do =ne, yi -dho 'yi -da 'yitagɔ 'gü 'yi dho Itali -se 'gü, 'wo Pölö waa- -kanso 'kɔɔme 'bhaa -nu -an -lo 'dhasi -gɔme 'ö -kë Wlɔmë 'në 'ka 'wo- -dhe Zulusö bhë -a kwëe.

Zulusö 'ö bhë -yö -kë 'se =kɔɔnme =va -bha 'dhasi kpö -nu -gɔme do 'ka. 2'Ö 'yi -da 'yitagɔ 'ö go Adramitö -pö 'gü -a 'gü, 'ö dho dho 'yitagɔ =gbaannu -dhe me 'ö Azi -se 'gü -a -bha bhë -a -bha, 'ö 'yi dhoë. Alitaakö 'ö -kë Masedoni mi 'ka 'ö go Tesalɔnikö bhë, -yö -kë yi 'piö mü. 3'Ö -dhekpɔyi me 'ö yö -a 'piö, 'yi -lo Sidɔn -pö 'gü. Zulusö 'glu -yö -kë -së Pölö 'ka; 'yö -potaasü nu -a -dhë, 'ö bɔ 'ö 'bhame -nu 'wo -kë mü -an 'piö, kö pë 'ö -bha -wun 'dhö -a -bha -waan -a nu -a -dhë.

4=Dhë 'yië 'go mü, 'tëe -yö -kë ziö =dhia. 'Ö- -wun 'gü, yi -bha 'ta 'yi- sü 'segɔ 'ö 'yi ziën 'wo- -dhe Siplë -a 'sɔɔ bhë, 'yi dho -a 'pian me 'ö 'tëe 'yaa -ma yië- 'yitagɔ -bha -a 'piö bhë -a 'ka. 5'Yi 'yoo -kan Silisi -dhe waa- Panfili -dhe -an 'sɔɔ, 'yi nu 'yi -lo Mila -pö 'ö Lisi -se 'gü bhë -a -bha. 6=Dhë bhë -a 'gü =ne 'ö 'dhasi -gɔme bhë 'ö 'yitagɔ 'ö go Alezandri -pö 'gü, 'ö 'dho -na Itali -se 'gü 'ö- yö -a -bha. 'Yi go yi -bha 'yitagɔ 'yi nuë bhë -a 'gü, 'yi -da -a me 'ö bhë -a 'gü 'yi dhoë.

7=Dhë 'yië yi pë 'tee =yɔɔn 'dhiö, 'ö 'buu -yö yö ziö -sü -bha yi -bha 'yitagɔ -bha 'gbee- 'ka. 'Yö -dhekpɔyi =plëzë 'piö, 'yi yi =zɔa, 'yi dho 'ö 'yi -loë' Kinidö plöö -dhe =tei' 'ka, =sëëbhodhe 'ka. =Dhë 'ö -kë =ne 'buu yaa

'we -a -bha yi -gɔ kö 'yi 'dho 'pian me 'ö bhë -a -ta, yi -wa 'se 'pian me 'ö 'yi ziën 'wo- -dhe Kletö -se bhë -a 'sɔɔ 'pian 'ö bɔ 'se 'pian 'wo- -dhe Kapö Salëmɔne -a 'ka. 'Pian 'ö bhë 'buu 'yaa zië. ⁸'Yitagɔ 'yi -kë -a 'gü bhë, -yö -wa 'kpong 'dhiö, 'ö 'yi -lo -sëëbhodhe 'ka -dhe 'wo- -dhe 'yitagɔ -dɔdhe -së 'ö Lase -pö 'sɔɔ bhë -a -bha.

⁹-Dhe 'ö -dhekpacyi -plëëzë =ya ziö yi -ta mü, 'ö 'ta -sü 'yi -ta -sü -yö -kë 'gbee-, bhii 'ö tɔɔ -yö -kë -kwe 'dhiötöyi 'ka -klöö'. 'Ö Zuifö -nu -bha 'wlaan -me 'ö =waa- kë 'wo- =tei' dɔ =ne -Zlan =ya ziö wo -bha =sɔɔn yaa -nu -ta bhë kö =waa- kë 'saadhö. Bhii -dhe 'ö kë -na 'dhö kö =ya 'to 'tee kö 'buu 'gbee- -yaan nu. -A -wun 'gü, 'ö Pɔlö -yö -dhio dɔ -an -dhë =nɛ: ¹⁰«Gɔɔn- -nu, 'ma- yö =ne 'ta 'ö =ne 'kwa dhoë 'dhiö, -yö -dho kë kwa -bha 'gbee-, 'ö tɔɔ 'yitagɔ waa- =kwɛ- -nu, -an 'ple -wo -dho =siö, 'go mü 'zü, 'yö dho kë kwa gia- kwa 'gü =siö'- -gen 'ka.»

¹¹-Yö -kë 'dhö 'kɛɛ 'dhasi -gɔme bhë -yö ö -zo -yö 'yitagɔ -yuökème -nu -gɔme waa- 'yitagɔ dème -nu -bha 'ö =zië' Pɔlö -ta. ¹²'Yitagɔ -dɔdhe 'ö bhë yaa kédhe -së -dhe 'ka kö me -nu -waan 'to mü 'buu 'gbee- bhë -a 'töng 'ka. 'Yö me -nu 'ö waa- Pɔlö -nu 'wo 'ta -sü -na bhë -a medhevadhe -wa -ya wo =zuö' 'piö kö 'wo 'go mü, 'wo 'dho 'zü 'yoo -ta; 'wo- kédhe =mɛɛ kö 'wo -lo 'yitagɔ =gbaannu -dhe me 'ö Fenisö 'ö Kletö -se 'gü bhë -a -bha. Fenisö 'ö bhë -yö -kë lan- 'dho =zian'. -Dhe bhë =ne 'ö -kë -an -dhë -së kö 'wo 'buu 'gbee- 'dhiö 'gan mü.

'Tëë pë 'tee -bha -ziö 'yoo -ta -sü

¹³'Tëë pë 'tee 'ö go goo =zian' -yö -kë ziö =dhia. 'Yö 'wo yö wo -zo 'ta -sü 'gü =ne 'wun 'wo- -ya 'ko 'dhiö -kë wo =zuö' 'piö bhë, -a -de 'dhoë- kë. 'Wo -piö kpö 'gbiin- 'ö -kë 'yitagɔ =gbaannu -a -bha -pë 'ka, 'ö 'yi -löö bhë 'wo- bho -a -gɔ, 'ö 'yitagɔ -yö yö 'ta 'sü -sü 'gü 'tëë bhë -a =kwa'. 'Wo dhoë 'dhö, 'kɛɛ waa 'dho 'kpong 'dhiö -dhe 'ka =gbiin. ¹⁴-Dhe 'ö 'töng pë 'tee =ya ziö 'ö 'buu 'gbee- 'wo- -dhe 'buu 'ö go dhuö =zian' 'ö go Kletö -segɔ 'ö 'yi ziën bhë -a 'piö =zian', 'ö -ya ziö -sü -bha 'gbee- 'ka 'pian 'ö bhë -a -ta. ¹⁵'Ö yi -bha 'yitagɔ -zaan zan. Yi- kédhe -mɛɛ kö 'yiën- 'dho yi -bha 'ta 'ka 'dhiö 'buu 'go =zian' 'kɛɛ yië -mɔa -bha. 'Ö 'yi yi -kwa yi -bha 'yitagɔ -zü, 'ö 'buu -ya -blü zian 'ö 'dhi -a -dhë -a 'ka. ¹⁶'Ö 'yi dho, 'ö 'yi -lo 'se 'pian 'tete 'ö 'yi ziën 'wo- -dhe Koda -a 'sɔɔ. 'Ö 'yi bɔ -a 'pian me 'ö 'buu 'yaa -maa 'ka =duö bhë -a 'ka. 'Ö -dhe bhë -a 'gü 'ö 'yitagɔ 'tete 'ö -kë -klu -sü 'ka 'yitagɔ =va =zlöö bhë, 'yi- bho mü, -yö kë 'dhö kö =kun 'ö 'yi kpö dho a wü; 'kɛɛ -a -bho mü -sü -yö -kë 'gbeegbee. ¹⁷'Wo 'yitagɔ 'në 'tee bhë 'wo- =luu, 'wo- dɔ -a =va -ta. 'Wo =bhüöga do -nië -a =va -zü 'to kö -a 'lü 'pen -nu -waan to 'kuë- kpinngdhö. 'Ö zlöö -bha bhë, 'suö -yö yö -an -kë -sü -bha 'ta 'sü -sü 'ö 'yi -ta bhë -a 'ka. 'Ö tɔɔ -wo wo -zo -ta =nɛ wo -bha 'yitagɔ -yö -dho -gban 'yënnɔ -tɔn -nu 'wo 'yi -löö Libi -segɔ 'dhiö bhë -an -bha. 'Ö- -wun 'gü, 'wo 'lü 'pen 'gbea 'ö 'yitagɔ =zlaa -na bhë, 'wo- -da yiö. 'Ö 'wo wo -kwa 'buu

-zü, 'ö 'yitagö bhë 'ö- -blü zian 'ö 'dhi -a -dhë -a 'ka. 18 'Buu 'gbee- -yö -kë -ziö yi -bha -dhiadhö, 'ö dho -a 'ka 'dhiö 'gbee- 'ka. 'Yö -dhekpacyi 'ö yö -a 'piö, 'wo yö -kwæ- -nu 'wo 'yitagö 'gü, -an -lo yiö -sü -bha. 19 'Ö -dhekpacyi me 'ö yö -a 'piö 'zü, 'ö wo gia- 'wo pë 'bhaa -nu 'wo 'yitagö 'ta 'sü -na bhë 'wo -an 'bhaa -nu -lo yiö. 20 'Ö -dhekpacyi =plëzë 'ka, -a kédhe gbe yaa kë -dhö yi -gö kö 'yi yi 'yan dɔ lan- waa- 'susongga -nu -an -bha; bhii wo =ne 'ö 'yië -an ga -bezë 'ö yi dho yi 'go -zian 'iin yi 'dho -zian -nu dɔ. 'Buu -yö -kë ziö -sü 'gü 'gbee- 'ka -kplawo; -dhe 'to -na zlöö kö yi yi -zo 'ta -na =ne yi 'ka 'dho dha gbɔ.

21 Me -nu 'wo -kë 'yitagö 'gü waa -bhöpë -bhödhe gbe yö -dhekpacyi =plëzë 'ka. 'Ö Pölö -yö =luu -an 'plë 'dhiö mü, 'ö- pö: «Gɔɔn- -nu, ka ka 'to -to n -wo -bha -bezë, -yö -dho kë -së; bhii kwa dho kwaa- to Kletö -bezë kö pë 'gü =siö' -sü =suu'- =ne -a gbe yaa 'dho yö kwa -bha. 22 'Këe dɔ 'kwa- wo =ne, a -bhea ka -dhë kö 'ka ka 'gü dɔ 'gbee-, bhii me gbe yaa 'dho ga ka ziën, -a 'ke yaa kë 'yitagö -bha =siö' -sü 'ka. 23 A- 'wun -dɔ 'dhö 'ö tɔɔ -Zlan 'a- -bha 'ka 'a yuö kë -na -a -dhë bhë, -a -bha bɔme do -yö -wo n -ta gbeng =dɛɛ, 24 'ö- pö n -dhë: 'Pölö, kö =kun 'ö 'suö -yö ü -kë, ü =dua' -mü kö 'ü 'dho 'se =kɔɔnme =va 'dhiö kö 'ü 'wun -nu =blee'- -a -dhë. 'Go mü 'zü, -dhe 'ö -Zlan 'glu 'dhö -së, -yö -dho 'wun -së kë ü -dhë, bhii 'ö tɔɔ -yö -dho me -nu 'saadhö 'wo ü 'piö 'yitagö 'gü bhë, -an -dha 'pö.» 25 Pölö -yö -dho 'wun =blee' -sü 'ka 'dhiö 'ö- pö -an -dhë: «'Wun 'ö -Zlan -bha bɔme -ya =blee bhë -a -wun 'gü, gɔɔn- -nu, -ka ka =faan' 'sü, bhii a n -zo -yö -Zlan -bha; -yö -dho -a kë =ne -kɔ gia- 'ö- pöë n -dhë bhë -a 'dhö. 26 'Këe yö 'ka 'dho kë 'pëpë, bhii kwa -bha 'yitagö -yö -dho wü 'buu 'ö dho kwa -blü 'kpong 'piö -dhe do 'bhaa 'gü bhë -a =kwaa'.»

27 -Yö -kë gbeng -yi 'gɔɔ- do ö ga -yiisië -naa 'ka, kö 'buu -yö =tun dho yi 'ka, 'yoo 'wo- -dhe Meditelane bhë -a -ta -kplawo. =Dhe gbeng ziën -dhe 'dhö dɔ -na, 'ö 'yitagö -yuökëme -nu -wo wo -zo -ta =ne yi =yɔɔn -na 'se 'sɔɔ. 28 'Ö 'wo -an -bha =bhüöga 'wo 'yi -löö -dhe dan -na -a 'ka bhë, 'wo- =yɔɔ 'yi -löö, 'ö 'yi -glu =duan' -yö -kë =nee 'metrë 'gɔɔ- -yaaga ö ga 'slaple 'dhö. 'Ö -dhe =wa =yɔɔn 'dhiö, 'wo- -zuö yiö 'zü, 'ö 'yi -glu =duan' -yö -kë =nee 'metrë 'gɔɔ- =ple ö ga 'slëaga 'dhö 'zü. 29 -Wo wo -zo -ta =ne 'wa 'dho 'ta 'ka 'dhiö 'buu -yö -dho -an -bha 'yitagö -gban -guö -bha bhii 'ö tɔɔ 'yi -glu =duan' yaa kë =gbiin =duö gbɔ. 'Ö 'wo wo -bha -piö kpö -yiisië 'ö -kë pë =gbaannu -a -bha -pë 'ka bhë 'wo -an =yɔɔ 'yitagö =zlöö yiö -dhe bhë -a 'gü 'ö 'yitagö -yö =gbaannu mü. 'Ö 'wo =bhea wo -bha -zlan -dhë kö -dhe -yö 'po 'zodhö.

30 'Ö yië- 'yitagö -yuökëme -nu -wa kédhe -mëe kö 'wo =duë 'wo 'go 'yitagö 'gü. 'Wo 'yitagö 'në 'tee 'ö -kë -a =va -ta bhë 'wo- =yɔɔ 'yi -ta, -a pö -sü 'ka =nee wo- 'piö kö 'wo -ya -a 'gü kö 'wo 'dho, 'wo -piö kpö 'bhaa -nu =yɔɔ'- yiö 'yitagö =vazë 'dhiö. 31 'Yö Pölö -ya pö 'dhasi =këng' do -gɔme waa- 'dhasi -nu -dhë: «'Kwaa- 'yitagö -yuökëme -nu 'wo =ne waa 'to 'yitagö 'ö =ne -a 'gü =sia, me 'plë ka 'gü -dho =siö'-.»

³²-Dhe =ya kë 'dhö kö 'dhasi -nu -wo =bhüöga 'ö 'yitagö 'në 'tee kun bhë -an 'kan -na kö 'yitagö 'në 'tee bhë -yö =yoo' -na yiö.

³³-Dhe 'töng 'bhaa =ya ziö, kö -dhe -yö 'po -na bhë, 'ö Pölö -yö =bhea -an 'plë -dhë kö -wo pë -bhö, 'ö- pö -an -dhë: «-A -dhekpacyi 'göo- do ö ga -yiisië -mü =dëe, 'ö 'ka -ya -sü 'ka ka -de =zönnng' -ta, 'ö 'kaa -bhöpë gbe -bhö. ³⁴=Dhe 'ö 'pö, 'a -bhea ka -dhë kö 'ka pë -bhö. Bhii 'ö töo ka -bha -wun -yö pë -bhö -sü -bha kö 'kaan- ka -faan' 'sü 'zü 'iin 'go mü 'zü kö 'kaan- dha. Pë 'dhiö- gbe 'ka 'dho kë më gbe 'ka ka ziën.»

³⁵=Dhe =ya yën -a -pö 'dhö -sü -bha, 'ö =bluu' -sü, 'ö -bhea -Zlan -dhë me 'plë wö 'dhiö mü, -a zuö pö -sü 'ka -bhöpë 'ö- nu -an -dhë bhë -a -wun 'gü. 'Ö- =kaan, 'ö yö -a -bhö -sü 'gü. ³⁶'Ö -an =zuö' -yö -kë -saa, 'ö 'wo- bhö 'pö. ³⁷Më 'yi -kë 'yitagö 'gü yi -kë më -lü -këng' =plë waa- më -lü 'göo- 'slaple ö ga 'slado 'ka.

³⁸=Dhe 'ö më 'ö -dhö 'ö- 'gü =ya dö, 'ö 'blee- =bhoo' -nu 'ö -kë -an -gö 'yitagö 'gü bhë, 'wo- -lo yiö kö 'yitagö -yaan 'to 'föngfö.

'Yitagö -bha -to yiö -ko

³⁹=Dhe 'ö -dhe =ya 'po, 'yi 'se yö yi 'dhiö, 'këe yië- 'yitagö -yuökëme -nu waa- dö. 'Këe -an 'yan -yö -kpan 'yi 'kpong 'dhiö -dhe -së 'ö -kë 'yoo -dhe 'ö dho 'kpong 'gü -a -bha. 'Ö 'wo- këdhe =mëe kö 'wo 'dho 'wo wo -bha 'yitagö =gbaannu 'ma. ⁴⁰'Ö 'yitagö -yuökëme 'bhaa -nu -wo pë =gbaannu -a -bha -pë =bhüöga -nu -kan, 'ö pë =gbaannu -a -bha -pë -nu -wo to yiö. =Dhe 'wo- kë -na 'dhö kö -a më 'bhaa -nu -wo 'lü 'pen -nu 'wo 'yitagö =doo' -na -a 'ka 'ö 'wo -kë 'yitagö =zlöö bhë kö -wo =bhüöga 'po -na -a -bha, -yö 'to -na yiö. 'Ö 'wo so 'pen do -luu 'yitagö bhë -a 'dhiö =zian', -yö kë 'dhö kö 'buu -yö 'yitagö -blü 'kpong 'dhiö. ⁴¹'Këe yië- 'yitagö -yö -gban 'yënnng -tön -bha yiö, 'ö =gbaannu; kö -a 'pian më 'ö 'dhiö zian bhë =ya -nëng 'yënnng 'gü. 'Ö to mü, bhii 'ö töo -a ziödhe gbe yaa kë -dhö. 'Këe kö 'yitagö 'pian më 'ö =zlöö =zian' bhë -yö 'wü -na, 'yi kpö 'ö ma -na -a -bha 'gbee- 'ka bhë -a -wun 'gü.

⁴²'Ö 'dhasi -nu -wa -kë -bezë kö -waan -kanso 'kooome -nu zë, -yö kë 'dhö kö -kun 'wo dho 'yi kë -waan wo -de dha. ⁴³'Këe 'dhasi -këng' do -göome 'ö- 'piö kö 'yö Pölö dha bhë, -ya -pö -an -dhë -wo më 'plë dha. 'Ö- pö më -nu 'wo 'yi kë -dhe dö -an -dhë, -wo -püö 'yië- 'dhiö, -wo 'yi kë -wo dhoë 'kpongtaa. ⁴⁴'Go mü 'zü 'ö- pö më -nu 'wo to -wo ziö -an 'piö -klu 'yitagö 'lü 'fa -nu waa- pë 'bhaa -nu 'wo 'go -na -a 'gü bhë -a -bha -sü 'ka. -Kö 'ö -kaa' 'ö yi 'plë 'yi dhaa bhë 'ö bhë.

Pölö -yö Malütö 'se 'ö 'yi ziën -a 'gü

28 ¹=Dhe 'ö yi 'plë 'yië dha, 'yi- =tei' dö zlöö =ne 'se 'ö 'yi ziën 'yi baa 'yi dha bhë -a 'tö töo Malütö. ²'Ö më -nu 'wo -kë mü 'wo wo -zo -kë yi 'piö 'gludhi =va 'ka. =Dhe 'ö -kë =ne dha -yö -kë ban -sü 'gü kö 'nene =ya kë =va bhë, -wo 'siö =va -da, 'wo yi =dhoo -kë -a -bha mü. ³'Ö Pölö -yö

'wɔ -kɔ 'në 'sɛɛn- 'bhaa -nu sü kö -yaan -a -lo 'siö-. 'Ö -mɛɛ -yö go 'wɔ -kɔ -nu 'wo bhë -an ziën, 'siö 'ö dɔ -na bhë -a -wun 'gü, 'ö Pɔlö kun ö -kwaä, 'yö duënu -a -kɔ -bha. ⁴-Dhɛ 'ö 'se 'ö 'yi ziën mü bhë -a 'gü -mɛ -nu -wa -mɛɛ 'ö dun Pɔlö -kɔ -bha bhë -a yö, 'wo- pö wo 'ko ziën -nɛɛ: «Gɔɔn- 'ö -nɛ 'kwa dho, -yö -dho kë mɛzɛmɛ 'ka. Bhiü kwa -bha -zlan 'ö 'kwa- -dhɛ -kë kpɛngdhö -sü 'ö yö -nɛ 'ö- dha 'yoo -gɔ bhë, 'yaa- 'piö kö -yö kë dhame 'ka.» ⁵'Kɛɛ Pɔlö -yö ö -kɔ -kpɛnng 'siö -ta, 'ö -mɛɛ bhë -yö go -a -kɔ -bha 'ö -püö siö, 'ö yaa pë 'dhiö- gbe kë -a 'ka. ⁶Mɛ -nu -wa -pö -bezë, -yö -dho -bhla 'iin -yö -dho kan -a -ta 'ö -püö sia-, 'ö ga -mɛɛ bhë -a -kwaä'. 'Kɛɛ -dhɛ 'ö- -dhɛ -ya =glɔɔ, 'ö =waa- yö -nɛ pë 'dhiö- gbe yaa kë -a 'ka, 'wo wo -wo =dhië -kwaä, 'wo yö -a pö -sü 'ka -nɛɛ: «Mɛ 'ö -nɛ -zlan -mü -a 'ka.»

⁷-Dhɛ bhë -a 'sɔɔ, 'se 'bhaa -nu -wo -kë mü. -Wo -kë Publiüsö 'ö -kë 'se bhë -a 'gü -mɛ -nu -gɔmɛ 'ka -a -bha 'se 'ka. 'Ö Publiüsö bhë 'ö yi -nia kun -dho 'ka, 'yi -wɔ -a -gɔ kɔɔ -dhɛkpaɔyi -yaaga 'ka.

⁸Publiüsö dë -yö -kë =waannu =süë' 'ö tɔɔ 'gii- yö -kë -a -bha, 'ö 'go mü 'zü, 'gu =pio' =yua' -yö -kë -a kë =dhia. Pɔlö -yö -dho, 'ö -wo -a 'piö kɔɔ, 'ö =bhɛä ö -kɔ -kpa -a -ta -sü 'ka, 'ö- -dhɛ -yö bo.

⁹-Dhɛ =ya kë 'dhö, 'yuame -nu 'wo -kë 'se bhë -a 'gü mü, -wo -nu 'ö -an -bha 'yua -yö bo. ¹⁰'Wo yi =bhlë kpɔ -kɔ =suu' -saadhö -ta. 'Ö 'go mü, =dhɛ 'yi 'dhoë- yi -bha =kwɛɛ- -nu dhu, 'ö pë -nu 'saadhö yi -bha -wun dho yö -a -bha 'ta 'sü -pë 'ka, 'wo- nu yi -dhë.

Pɔlö -lo Wlɔmë plöö -kɔ

¹¹-Dhɛ 'ö 'su -yaaga =ya ziö, 'yi -ya 'yitagɔ 'ö go Alezandri -pö 'gü -a 'gü. 'Yitagɔ 'ö 'dhö bhë, -wa -dhɛ «-zlan -nu -flɛanzë». Yö -nɛ 'ö 'tëë 'gbee- 'töng -kë 'se 'ö 'yi ziën bhë -a 'gü. 'Ö 'yi dho -a 'ka. ¹²'Yi -lo Silakusö -pö 'gü; yi -dhɛkpaɔyi -yaaga -kë mü. ¹³-Dhɛ 'yië 'go mü, 'yi -wa 'kpong 'dhiö, 'yi dho 'yi -lo Lezio plöö.

=Dhɛ -dhɛ =ya 'po, 'ö 'tëë 'ö go goo =zian' 'ö yö ziö -sü 'gü. 'Yi -dhɛkpaɔyi =plɛ -kë 'yitagɔ 'gü 'yiëë- =tun -lo -na Puzɔlö -pö 'ö 'yitagɔ -dɔdhɛ 'dhoë- -bha bhë -a 'gü. ¹⁴'Ö pö- bhë -a 'gü 'yi -kpɛn Yesu -wun -dhɛ 'wun gia- -mɛ 'bhaa -nu -bha. 'Wo- pö 'yi 'dhɔɔgɔ do kë yi 'ko =bhaa mü. 'Ö 'yi 'dhɔɔgɔ do kë -an 'piö mü 'yiën- =tun 'dho -na Wlɔmë.

¹⁵-Dhɛ 'ö Yesu -wun -dhɛ 'wun gia- -mɛ -nu 'wo -kë Wlɔmë, =waa- ma -wa -pö 'ka -nɛ yi zian -ta nu -sü 'gü, 'wo nu yi -gɔ zian-, 'wo loë Apiusö 'dhɔɔkuëdhö.

=Dhɛ 'yi nu -na 'yi -lo pödhɛ 'wo- -dhɛ «-Nia -kun -a 'gü -kɔ -yaaga», 'yi -kpɛn mɛ 'bhaa -nu -bha 'zü kö -wo nu -na yi -gɔ zian-.

=Dhɛ 'ö 'yië -kpɛn mɛ -nu 'wo bhë -an -bha, 'ö Pɔlö -yö -Zlan zuö pö; 'ö =faan' sü, 'ö 'yi kpɔ yi 'kuë- 'yi dhoë Wlɔmë plöö. ¹⁶-Dhɛ 'yië -lo Wlɔmë, 'ö Wlɔmë -mɛ -nu =kɔɔnmɛ -nu -wo -we Pɔlö -gɔ -a -bha kö -yö 'to ö -de -gɔ kɔɔ, 'kɛɛ 'dhasi do -yö ö -zo -kë -a 'piö, -yö kë 'dhö kö -kun 'ö dho =duë.

Pölö -bha -Zlan -wo -blee Wlömë plöo -sü

¹⁷Dhe 'ö -dhekpasyi -yaaga -ya ziö, 'ö Pölö -yö Zuifö -nu me ziizii -nu 'wo -kë Wlömë mü -an -dhoo -kë.

=Dhe 'ö =wa nu wo 'ko -bhaa, 'ö Pölö -ya pö -an -dhë: «N dhegluzë -nu, n 'ka pë yaa gbë kë kwa -bha 'següme -nu 'ka, 'iin wö -kò 'ö kwa 'bhema -nu -wa nu kwa -dhë -a 'ka. 'Kee Zuifö -nu -wo n kun 'wo n -da -kanso 'gü Zeluzalemë, 'ö 'wo n -do Wlömë -me -nu kwëe. ¹⁸Me 'wo bhë -wo n -dheë' -kpo pë 'a- -kë -a 'ka, 'ö 'wo- -kë kö 'waan- wo =kwa'- n -zü, 'ö tso 'wun yaa 'a dho kë -a kë -me 'ka kö -yaan kë n zë -gen 'ka yaa kë -dhö. ¹⁹'Kee Zuifö -nu waa 'we -a -bha. 'Ö- -wun 'gü, n =dua' -mü kö 'a- pö =ne 'se =koonme =va 'yö dho za bhë -a 'kan. 'Kee pë 'bhaa 'ö- -wun 'gü 'ö za dho -ya -a -dhë, n -ma 'següme -nu -bha 'se =koonme =va 'dhiö 'yaa -dhö. ²⁰Pë 'ö -kë 'a ka =dhoo -kë 'ö bhë. 'Wun 'ö -gban me 'ö Izlaelö -següme -nu 'wo wo -zo yö -na -a -bha bhë -a -wun =ne 'ö 'a- kë -a -dhë ka 'yaan 'dhiö zö =ne -kansogüme 'dhö bhë.»

²¹'Ö 'wo- pö -a -dhë: «Yiëë 'sëedhe 'ö go Zude -se 'gü 'ö -gban ü -bha -a gbë yö, 'go mü 'zü, yi dheglume 'ö dho go 'ma kö -yaan 'wun -tao =blee' -yi -dhë, 'iin -yaan 'wun yaa =blee' -ü -go yaa kë -dhö. ²²'Kee yi- 'piö kö 'ü ü =zuö' 'piö -wun -nu =blee' yi -dhë. Bhii 'ö tso yi- =doo' -ne me kpö 'ü -kë -a 'gü -me do 'ka bhë, -dhe 'saadhö -a 'gü, me 'ple -wa -wun yaa -blee.»

²³'Ö waa- Pölö -nu 'wo yi do kpo wo 'ko -nu -go.

=Dhe yi bhë -ya -lo, 'ö me -gbaa =va -wo nu -dhe 'ö Pölö -yö -ya -a -bha bhë -a -bha. 'Ö sü -dhiadhio -bha 'ö dho 'ö yöë 'yinia -bha, Pölö -yö 'wun -nu 'ö -gban -Zlan -bha -gludë -dhe -bha -a -gen -pö -an -dhë, -a këdhe =meë' -sü 'ka kö -waan 'we 'wun 'ö -gban Yesu -wun 'ö baa Moizö -bha tongo -wo -nu waa- -Zlan -wodhiölome -nu -bha 'sëedhe -be -wo -ta bhë -a -bha. ²⁴Me 'bhaa -nu -wo 'wun 'ö Pölö -ya =blee bhë -a -yö 'wun gia- 'ka, 'ö 'wo -we -Zlan -wo -bha. 'Ö me 'bhaa -nu waa 'we -a -bha kö 'wo- -wo -dhe 'wun gia-. ²⁵'Wo zaodhe -kë wo 'kuë -waan =tun 'dho -na wo -go koo, 'kee -an -wo yaa kë do. 'Ö Pölö -ya pö -an -dhë =neë: «'Wun 'ö -Zuu 'slööslo -ya =blee ka 'bhema -nu -dhë 'ö baa -Zlan -wodhiölome Ezai -ta bhë 'wun giagia -mü. ²⁶Bhii 'ö tso -ya -pö =neë: -Zlan -ya -pö: -Bhö 'dho 'se 'ö -ne -a 'gü -me -nu 'piö, 'ü- pö -an -dhë: Ka -dho ka 'to to -së 'ka giagiawo, 'kee kaa 'dho -a -gen ma. 'Go mü 'zü, ka -dho -dhe -ga -së 'ka, 'kee kaa 'dho -dhe yö. ²⁷'Ö tso 'se bhë -a 'gü -me -nu waa 'we -a -bha kö 'wun 'a- =blee' -na bhë -wa -gen ma. =Wa wo 'to ta, 'go mü 'zü =wa wo 'yan ta. Waa- -kë 'dhö -bezë, kö -an 'yan -yö -dho -dhe yö 'ö -an 'to -yö 'wun ma, 'go mü 'ö -an =zuö' -yö 'wun -bho 'koo do; 'ö -ya kë 'dhö 'wo dho =dhië' -n 'piö kö 'aan- -an dha.» ²⁸'Ö Pölö -yö 'ö -wo -zuöatadhe -kë 'ö- pö: «=Dhe -kë 'dhö a- -pö ka -dhë zlöo -bha, -Zlan -yö 'ö -bha me dha -sü -wun bo -na me -nu 'ö 'waa Zuifö 'ka -an 'piö. Wo -zë, -wo -dho wo 'to to -a -wo -bha.»

²⁹((-Dhe Pölö =ya yën 'wun 'ö bhë -a =blæ' -sü -bha, Zuifö -nu -wo -dho wo -gɔ kɔɔ zaɔdhe =va kë -sü 'ka wo 'kuë.))

³⁰-Kwε =plε 'ö Pölö -ya -kë 'kɔ 'ö- sü bhë -a 'gü. 'Ö mε -nu 'saadhö 'wo nu -lo -a 'piö =dhia 'wo- yö mü. ³¹'Yö -Zlan -bha -gludëdhe -wun -blæ -an -dhë -dhe bhë -a -bha, 'yö 'wun 'ö -gban kwa Dëme Yesu Klito -wun -bha bhë, 'yö mε =daan -a 'ka -zogbandhe =va waa- -potaasü -an 'ka.